

ASO GAFUA, 26 IUNI 2017

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amata nei Taulumaga ma Galuega a le Fono Aoao Faitulafono.

E avea foi lenei avanoa ou te faatalofa atu ai ma le agaga faaaloalo i lau Afioga i le Taitai o le Malo, faapea foi le paia mauuluga o alii ma tamaitai o le Kapeneta, o Minisita Lagolago, aemaise foi o Taitaifono o Komiti eseese o le Palemene ma le mamalu o le Palemene faapea foi Faauluuluga o Matagaluega ma Faalapotopotoga a le Malo o lo o latou faatinoa faiva alofilima, ia ae a se manuia o le atunuu.

E faatalofa atu foi i le Failautusi o le Fono ma le Sui Failautusi ma le augalulue o le Fono Faitulafono i le latou auaunaga e faifaipea aua le tautuaina o lenei Palemene.

TUUIINA ATU O PEPA

Na tolaulau e le Failautusi Pepa nei ua faataatia i luga o le Laulau a Fono e tusa ai ma le Tulafono Tumau 49.

1. S.R. 2017/6, Tulafono Faafoe o Fesootaiga (Puipuiga o Tagata e Faaaogaina Auaunaga) 2017.

TULAFONO TAU FAAOFI O LE FAATATAUINA O TUPE 2017/2018
- felafolafoaiga i luga o le faitauga faalua faaaau mai aso
23/6/2017 - Aso 4

FOFOGA FETALAI: E tolopo felafolafoaiga i le aso fono talu ai, o lo o saunoa le Afioga i le Minisita mo Faatoaga ma Faigafaiva e tali atu i mataupu sa laga e sui usufono mamalu.

I le agaga o le faaaloalo, ou te tapa lau Afioga i le Minisita mo lau saunoaga e faaaau ai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Susuga Hon LAAULI LEUATEA POLATAIVAO FOSSIE SCHMIDT (Minisita mo Faatoaga ma Faigafaiva): E faafetaia le alofa o le Atua i lau Afioga i le Fofoga Fetalai i le alafai mai i faguga lelei le soifua manuia o lo tatou Maota i lenei taeao fou. Ma e ou te piiama i lau faatofalaiga e ala i le tatou faasagi ma le faapolo i le Atua e tatou te nono ai manu aua le tatou Fonousu i lenei taeao.

E faafeiloai atu i tulaga aloaia i lau Afioga i le Fofoga Fetalai aemaise o le Taitai o le Malo le mamalu o le Kapeneta ma le Fonousu a Samoa. E faapea foi ona faatalofa atu i le tapuaiga a si o tatou atunuu Samoa, ia faafetai tapuai faafetai tatalo.

E asuasu atu vai i puega ona ua le mafai ona mauaina i tulaga o uaealesi faasalalau i le aso ua sola le taumafai atu o le tali atu a le Matagaluega, ia o nisi o faaletonu faatekonolosi. Ae i ai le talitonuga, o le a i ai se taimi ona molimoli atu pea lea leaga e taua le tali atu mo le malamalama o le tatou atunuu i mataupu uma sa laga e Afioga i sui usufono, ina ia manino ma malamalama le tulaga o agai i ai le tatou Malo aemaise le tauavagameaina o lenei Matagaluega.

E manatu o le a sii le vaatele, le paia ma le mamalu e o le tatou Maota, ia tatou aleaga lea ma alepuna, tatou oloolopitovaa, ina ia ulimasao le tatou galuega i lenei aso.

E faaiu le faamatalaga a lenei Matagaluega i le la vaiaso ua see atu le faamatalaga e uiga i le fesoasoani a le Malo o Saina e ala i le tatou Vegetable Samoa and China Vegetable Corporation i le tulaga i le faaleleia o mea tau fua o fualaau aina fua o fualaau taumafa mata, e pei ona tauavagameaina mai le tele o tausaga, lua i le tolu tausaga talu ai. Ma o lea ua tatou taunuu nei i le vaega lona fa o le polokalame lenei. O le faanaunautai a le Matagaluega e pei ona laga e nisi o sui usufono mamalu, o le faaauauina lea o le tamaoiaiga i tulaga tau fua o fualaau aina i totonu o lo tatou atunuu, o lea na mafua ai ona pasia aloaia e le Kapeneta i le tausaga na tea nei, e toe taloasaga i le Malo o Saina ina ia fai le phase four o le poloketi lenei, ma o le agaga faafetai lau Afioga i le Fofoga Fetalai, e faafetai ai i le Malo o Saina ua talia aloaia le vaega muamua o le phase four. E manatu e le o toe po malae o lena ua i luga o upega tafaiilagi ma tatou nusipepa, le taunuu mai o le vaega fou lenei e sefulu ma ona tupu tagata Saina faapitoa o le polokalame lenei mo le atunuu atoa. O le faamoemoe la o le Matagaluega i le polokalame lenei, ua uma le taimi o tatou demonstration sa avea ai le 20eka lea sa i uta i Nu'u e faataitai ai ma faatino ai ma o atu i ai le aufaifaatoaga, e tilotilo ma matamata pe faapefea ona toto mea nei o fualaau taumafa mata, o kapisi, kukama, tamato, pi, o polo, o a lava ituaiga fualaau eseese, ia o lea sa faatino mai i le polokalame lenei i le lua tausaga talu ai.

O le polokalame la lea ua faatulaga lau Afioga, o le a agai loa i tua atu o faifaatoaga, ma ua uma foi ona tapena le polokalame lenei e omai uma la ma meafaigaluega nei sa taua i totonu o le tatou Maota, e i ai uma tulaga e faatino ai gaioioiga e faatino ai mea lava tau fualaau, e omai ma palau lima, o palau toso, tulaga o mea faigaluega eseese.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

O le faafaileleina o tulaga tau irritation o vai, tulaga tau tunnel houses, ina ia mafai ona laa loa i fafo le faamoemoe. O le polokalame e 4 Saina i Savaii ae 5 Saina i Apia nei, o le faamoemoe o le a tuu atu loa i tua i le aufaifaatoaga ma latou la nei na lesitala i polokalame i mea nei, e pei ona alu atu le faalauiloa a le Matagaluega i le tele o taimi, ina ua taunuu mai Saina sa valaaulia ma faalauiloa aloaia e le Matagaluega e omai e lesitala ma vaavaai i aoaoga nei. O lea la ua tatou laa loa i tulaga, o latou lava na finafinau ma tinou ma mananao i polokalame nei, ua faamaumau uma e le tatou Matagaluega, e mafai loa ona faasoa atu polokalame nei mo latou. A o le agaga sili ona taua lau Afioaga, ona o mea nei sa tatou mafatia ai i le tele o tausaga.

O tulaga tau faamaumauina lava o si o tatou atunuu, e le lalo ifo i le \$5miliona le tupe faaalu a le Malo i le aumaia o fua o fualaau aina mai fafo, pei ona silasila talu ai nei e le i mamao atu na tatou vaai ai i kapisii lapotopoto, o lettuces, e oo i kukama, tamato, ua aumai mai fafo. O le agaga lenei na matuai tinou ai ma sailiili le Matagaluega i le tatou phase four lenei e le tatau ona toe faatupulaia lea mea, ua manatu ua lava ma totoe le tapenaga o lea ua agai i ai le Malo o Saina, o lona uiga ua tatau ona tatou faasaga loa e replace le mea lea sa alu ai tatou tupe mai fafo, a ia lava mea tau fualaau aina e gafataulimaina ai le fofoga taumafa a le atunuu, o le faiga o tulaga i le agai i aoga, faiga o tulaga agai i le soifua maloloina, ma totonu lava o afioaga i le atunuu nei. Ua uma ona faatalatalanoa e le Matagaluega ma wholesale lapopoa nei e i totonu o le tatou atunuu, o latou nei o lea e okaina mai oloa, o Frankie, Ah Liki, Amau, po o le a se faiga e mafai ai ona amata loa ona faasolosolo atu fua nei o faaeleleaga a le atunuu lea ua amata ona tali mai. Ma ua maea ona sainia nisi o feagaiga ma nisi o kamupani, e aumai loa latou lisi o fualaau aina nei, ina ia mafai loa ona tuusao atu i lima o le aufaifaatoaga e amata ai le market linkage, ina ia avatu fua o tatou faaeleleaga e faatau i totonu o Super Maketi nei o wholesale nei, ae tau taofiofi mea nei e aumai mai fafo, ina ia toe alu sao le tamaoaga, o le fefaatauaiga lava ia i totonu o lo tatou atunuu. Ma o le tulaga aupito i sili lenei ona atagia ai le lagolago mai, ou te faafetai ai le kamupani a Frankie, o lea ua i aao o le Matagaluega a latou oka, oka i le vaiaso, tai 800 pepa kukama, 1000 fusi kapisii ma isi mau mea eseese o lo o ua latou tuu mai i le Matagaluega o lo o fitoitonu ma le tulaga lea o le market linkage e agai loa e tufatufa atu i nai tagata faifaatoaga lea sa leai se tulaga faapea sa i ai muamua, o le tulaga sili lenei ona faafetai. Ae pei ona ou taumafai e faamatalatala atu, o le tele o le talosaga sa ave ia Saina, ona o lo tatou atunuu, e le faigofie le galueaiina o elelee i tulaga faapenei, o lo tatou atunuu e tele le goa, tele maa, tele faafitauli ona o le tulaga sa i ai fua o le lauelele lava ia o Samoa. Ae o le tali mai a Sainai le mea lenei sa talosaga i ai e manaomia ni masini lelei i le tulaga tau faatoaga, mechanization, o lea foi ua amata ona ataata mai le tala lelei o le a faapena foi ona fesoasoani mai le Malo o Saina e aumai masini lelei lenei e faatulaga lelei i le tulaga e talafeagai ai i le mea lenei o le mechanization ina ia mafai ona faataatia lelei alafua i le mea e tatau ona i ai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O le faataitaiga, a faapea o oe e i ai lau 2eka po o le 5eka o atu le asiasiga landscape lelei, aveese maa, aveese tagutu laau, aveese uma mea, palau lelei faatulaga faataatia suavai, faataatia auala, ia ona faafao loa i ai ma le tunnel house lea, ia ona ou manatu lea, e le toe masalosalo fua o faaeleeleaga e maua mai i le mea lea, o le a matuai atoatoa ma lelei mafai loa ona tatou tali atu i manaoga o le tatou maketi.

O le isi laasaga sili lava na aumai i le polokalame lenei, o le mea lenei o le biogas lea foi sa tau laga i lauga a sui usufono, o le fausia lea o tatou pa puaa ae maua ai le kesi lea e ola ai le eletise, maua ai ma le kesi e fai ai kuka. O lo o i uta nei o le tatou demonstation i Nu'u se tasi nei o mea taua tele o lo o i ai e tasi o faalapotopotoga o le YWAM ma sa maitaulia le tele o le faasaoina o tupe e ala i le eletise, e ala i le kukaina o meaai ona o le mataupu lea, o le faaaogaina o otaota o manu, se i vaeane, ae maua mai ai lenei faamanuiaga. Ma o le itu sili lea lau Afioga i le Fofoga Fetalai na agai ai se lagona e lagolago ma toe ave le talosaga ia Saina, ina ia alofagia o fea e tatou te toe o i ai i le faamapueina o le poloketi lenei e tatou te manaomia mea lelei ina ia gafataulimaina ia lelei fua o faaeleeleaga ma le productions e maua mai. Aua sa tatou o lava i le mea lea a lava a si sefulu gafa faatafafa a le toeaina o kapisu, a uma lava ua uma. A o le commercialization ma le mechanization, o se tulaga aupito i sili lea ona talafeagai e mafai ai ona faalautele le tulaga o tupe maua ma tupe e atinae ai le aufaifaatoaga. Ua uma foi ona tatou vaai i le tulaga o lo o i ai le taulogologo a le Matagaluega a le Ofisa o Faatoaga e i ai le polokalame lea a tamaiti, eat the rainbow, none communicable diseases protection. E mai fea lea mea? E mai i i i fua o fualaau aina, fua o fualaau taumafa mata, tau taofiofi tamaiti e ai mea suamalie ma mea uma nei e faalalava solo mai e maua ai le faamai. Ia e le natia i le tausaga na tea nei sa taumafai ai le tatou SPAGHL, lau Afioga i le Fofoga Fetalai, o se polokalame taua ina ia ina ia sui le apatite sui le nutrition programme a alo ma fanau. Ia ua ou taunuu mai i le Matagaluega, o le auala tonu lava lea e fesoasoani ai i le taumafaiga a le Ofisa o le Soifua Maloloina, ina ia uunai le totoina o mea nei i totonu o aoga, ua uma foi ona ou tuumumusu i le Minisita mo Aoga, tatou taumafai ia tofu lava le aoga ia ma lona garden.

Sa tatou omai i aso ia 1980, 1981, 1982, 1983, 1984 sa ou aoga, e i ai lava le garden a le aoga, Agricultural Science ma aoao ai le totoina o mea eseese ae maua ai ma mea taumafa a tamaiti. Peitai ia e na o se mea e faatupu manatu, ina ia mafai ona tatou toe maua le faamama avega i matua ia aemaise foi alo ma fanau ina ia taumafa i mea soifua maloloina e ala i fua o fualaau aina ma isi mea faapena.

Na fautua mai foi le sui usufono mo Palauli Sasae le Afioga Misa, ia o timaiga ia e manaomia e le Matagaluega, fai mai le saunoga a le Faasisina ma Lilomaiava, *‘Laauli, a e silasila nei i aoga, oka se toatele o matua la e o atu e avatu tamaiti i le aoga. Ia na ona o atu lea nofonofo, tapilipili le ili ma fai talanoaga ma mea faapena.*

26 IUNI 2017

**Tulafono Tau Faaofi o le Faatatauina o Tupe 2017/2018
- felafolalofoaiga faaaauu i luga o le faitauga faalua**

Ae o polokalame ia, a mafai ona faatino tuu i matua nei e o ifo e fesoasoani, e fai gardens nei ma o fai faatasi meaai a tamaiti, ae faaoga ai la mea nei e taumafai atu ai le Matagaluega a le Ofisa o Faatoaga e o atu e avatu uma fatu eseese o mea eseese avatu mea uma e atinae ai ia totonu o aoga. O le faamoemoega lena ma e faafetai ai i le faamanatu a le Afioga i le sui usufono. O tulaga ia e tatou te faataavili faatasi ai le fesoasoani e le gata ina taugofie mo tatou aoga, ia e faapena foi ona soifua maloloina ai alo ma fanau.

Ia o tulaga e pei ona tatou talanoa i tulaga o palau, a outou Afioga i sui usufono lafo mai, ua uma ona tatou talatalanoa, ua uma foi ona faaooina i le Malo o Saina, a o lea o le a tatou amata i i. Ae le natia ai e avanoa, e avanoa pei ona ou fai atu e 3 tatou palau lelei la e i uta. E avanoa po o ai se sui usufono e finagalo i le tulaga lea e avatu e faaleleia ai tulaga tau fualaaui aina ia ma avatu fatulaaui ia ma avatu tatou Saina lea ua i inei.

O le itu taua lena o i latou ua i ai le tomai faapitoa e o atu, ia ae le mafai ona nonofo nonofo Saina ma le Matagaluega soona o atu. E ala la ona o atu, ia ona o le talosaga mai ma faatalaauula aua e o atu fai survey, ia ma aumai lou manaoga o atu e vaai aua e tatau ona tilotilo muamua ma vaai po o se mea lafulemu ia po o se mea gaoa, po o se mea malifa po o se mauga po o se vanu. Ia ona avatu lea o fautuaga a le Matagaluega, ina ia manuia le tulaga o lea faamoemoe.

O lo o talia nei e pei ona fai atu masalo e le o toe mamao a lea ua talia le tatou phase muamua lea 7.5 miliona.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai...

FOFOGA FETALAI: Ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E taua tele le mataupu lena sa soalaupule foi e le Kapeneta. O le mea lea na taua e le Minisita, e o atu lelei lava le Ofisa e vaai, ia mea ia e fia faaoga i ai ia palau, ina ia faaoga tatau.

E le natia, e mafua le mea lea, ona o tatou palau ia na tufa i le atunuu i isi foi polokalame faapenei, na tofu lava le itumalo ma palau. E le i umi lava ae malepelepe uma palau na, ua lau ai maa e ave e fausia ai mo mea o faavae o fale o aiga. Ua matua sese atoa le faaogaina. O le ala lena ina ia aua ne i toe faaluaina mea ia e taua tele ai le mea lea o le aumai muamua o le polokalame, ia ona o atu lea o le Ofisa e vaai. Ia ma o atu foi latou e faagaioi na ona uma lava toe aumai le palau. E taofia ai le mea o le faaoga sese, i le tulaga foi lea o mea faitete o mea a le Malo, a avatu e malepe ai malepe ai.

E pei la o le itu lena ua ou toe tulai atu ona ua faatalanoaina le mataupu lena, na toe agai lelei lava mafaufau i tua, i tua i mea sa tatou faia, o le lau mai o palau avatu i nuu i tua pule ai le pulenuu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaaauu i luga o le faitauga faalua**

Ia e le i umi lava ae malepelepe uma le fia o selau ma selau o palau taugata na aumai e atiae ai le tatou atunuu.

FOFOGA FETALAI: Malo faafetai, tulai mai le Minisita e faaaauu le saunoaga.

Susuga Hon LAAULI LEAUTEA POLATAIVAO FOSSIE SCHMIDT: Faafetai atu i lau Afioga i le Palemia, e moni a au, ma e leai lava se mea e lilo o lea sa tatou maitau i faamaumauga sa i ai. E le gata foi i palau ae sa tufa fua fetalaisa, e uma ane ua ta ato i le vanu, faafau solo ma le aoga ae ui o lea, ua mavae na atuvasa. O le agaga o le taumafai ia aua ne i tatou toe foi i faaletonu ia tatou aoaoina faatonutonufolau ai le lumanai. A o faamoemoega lena o le tatou Malo, ina ia aua ne i tatou o i le auala sa tatou o ai muamua, ae ia tatou alu i le autafeloa. Tatou omai lea i tulaga sa laga e sui usufono i tulaga tau lafumanu, ia e le natia foi, o le tasi lenei tatou atinae sili ona taua i lo tatou atunuu. Ae ia....

FOFOGA FETALAI: Malie lau Afioga o lo o tulai mai le faauilavea a Falealili Sisifo.

Afioga Fuimaono Teo Samuelu Teo (Falealili Sisifo): E leai se agaga ona ua logo faavatutui le Maota i le folasaga a le Afioga i le Minisita, talu ai ona o lea ua taua mea nei o palau sa afea foi e se faamatalaga. O se faafesili, manaia tele le folasaga a le Afioga a le Minisita, i tulaga o kesi foi ia lea e maua mai i otaota o meaituaolo se i tulou. Na ona faafesili, po o le vaega la lea o tatou palau lea e o ai i le kesi lea po o le mea la e faaoga lava le diesel masani faamolemole?

FOFOGA FETALAI: Malo, se e le i oo i le taimi e faaoga ai palau, ia se i tu mai pea lau Afioga i le Minisita.

Susuga Hon LAAULI LEAUTEA POLATAIVAO FOSSIE SCHMIDT: E i ai le upu a le tamaloa Safata, fai mai le tamaloa Safata, *'be careful'*. A fia malamalama la i le upu lea ona e fesili ifo lea i le Afioga i le sui usufono mo Safata lena e latalata ane e malamalama lelei i le upu lea.

FOFOGA FETALAI: Se i toe saunoa mai i le upu a le tamaloa.

Susuga Hon LAAULI LEAUTEA POLATAIVAO FOSSIE SCHMIDT: Ia o le a le afaina lea, lau Afioga i le....

FOFOGA FETALAI: Ia malo faafetai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaaauu i luga o le faitauga faalua**

Afioga Leana Ronnie Posini (Safata Sisifo): Lau Afioga i le Fofoga Fetalai ona o lea ua taua foi si o matou itumalo, masalo ua leva ona maliu le tamaloa lea sa faia le upu lea faamolemole ma le agaga faaaloalo.

FOFOGA FETALAI: Ua lelei faafetai. Ia se i tulai mai le Afioga i le Minisita.

Susuga Hon LAAULI LEUATEA POLATAIVAO FOSSIE SCHMIDT: Faafetai o lea e maua e Leana le upu lea.

Ia o anafea na e silafia ai e alu se bio gas i se palau? Ia ui i lea, o lena e te nofo ma le tali o lau fesili. Ae taua ia o le polokalame lea o le bio gas. Fuimaono, ou te tautino atu o se faamama avega lea mo le tatou atunuu. O le kesi e te maua mai i otaota o manu, ma otaota o mea e pala. O la e i tua i le tatou demonstration la i uta i Nuu. A i ai se Afioga se sui usufono e fia maua ma fia tilotilo o la e avanoa, e tele ae le o mafai ona oo i ai le tulaga o le faatinoga ia ona tele o nisi o faafitauli e pei ona ou fai atu, ae la e maua le avanoa e silasila ai mo lea faatinoga taua.

Ona ou oo mai lea i le...

FOFOGA FETALAI: Faamalie atu i lau Afioga i le Minisita ona o lo o tutulai mai le sui usufono mo Falealili Sasae.

Afioga Fuimaono Teo Samuelu Teo: Lau Afioga i le Fofoga Fetalai, o lo o faaoga le isi vaega mo le silafia e le Afioga i le Minisita. O lo o i ai ia nuu o Falealili, o lea ua faaoga le kesi foi lea e maua mai i le fue, ia mo le silafia la e leai matou te le o faaogaina la ia le vaega lea e pei ona saunoa, ae o la ua faaoga le kesi lea e pei ona o atu ai le isi polokalame faaoga ai le fue sosolo lea i uta o tatou laufanua. Ae o lea la e sologa lelei lava kesi la e faaoga e Falealili, faafetai.

FOFOGA FETALAI: Malo, ia se i tulai mai le Afioga i le Minisita.

Susuga Hon LAAULI LEUATEA POLATAIVAO FOSSIE SCHMIDT: Ou te taofi o mea e aumai i le Maota lau Afioga i le Fofoga Fetalai na o mea moni ma faamaonia. Ae o lea e fou i lau faalogologo atu le tulaga i le saunoaga a le sui, ae afai o lelei, o le a le mea e tuu ai na mea lelei? O le a le mea e tuu ai na mea matagofie ae le faasoa mai. Faatoa ou faalogologo atu i le tulaga lea, ae afai e manaomia ai le lagolago a le Matagaluega, ia e fialia le Matagaluega e o atu e lagolago lena poloketi.

Tofa Aumua Isaia Lameko (Falealili Sisifo): Lau Afioga i le Fofoga Fetalai, o se mea e fia faasao.

FOFOGA FETALAI: Tulai mai le sui usufono mo Falealili Sisifo.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Tofa Aumua Isaia Lameko: Faafetai mo lenei avanoa. Mo le silafia o le tala moni ia faamatalaga ia e fai atu e faatatau i le kesi lea o lo o maua mai i le fue o lo matou nuu i Sapunaoa i le pitonuu o Piu. O lo o tu ai se tasi o Poloketi Non Governmental Organisation lea o lo o faaaogaina e le eletise i le taimi nei. Ia o le faasaoga lea lau Afioga i le Fofoga Fetalai, faafetai.

FOFOGA FETALAI: Ia malo faafetai, ia....

Susuga Hon LAAULI LEUATEA POLATAIVAO FOSSIE SCHMIDT: Faafetai, ia o lena ua maua lena itu lelei. A i ai se mea e manaomia ai le fesoasoani a le Matagaluega, ia po o le Matagaluega foi o Eletise, ia o le tatou ato e fefaasoai.

Ona ou oo mai lea lau Afioga i le tulaga tau lafumanu, saunoa nisi o sui usufono i le tulaga o lo o i ai tatou lafupovi, mamoe, puua, moa ma isi. Ua tatou talanoa foi i le tulaga ua saunoa nisi sui usufono, po o le a le mea ua mafua ai ona le toe aumai nisi tatou uta povi, ina ia taumfai e toe faatupu tele le tulaga o le fuainumera o tatou povi i Samoa nei.

O le polokalame lenei sa fausia e le tatou SACEP, sa aumai ai le polokalame faapitoa e 40 povi na aumai muamua. E aumai ai le mea lenei e tau o le Breeding Programme. Ou te le i malamalama tele ae ina ua avea au ma Minisita, na ou fesiligia mai o ai le polokalame lenei mo le atunuu. Ma o se polokalame ua faatulagaina e le World Bank, ina ua uma ona fai suesuega po o le a le polokalame e talafeagai ma Samoa. E le natia masalo po ua 4 pe 5 a tatou uta povi ua aumai, uta povi lava e gata ai uta povi. Na matua sau lava le vaa mai fafo e aumai ia uta povi.

Ae o le a le mea lea e tupu ia tatou? E pei o le alu o le toliga o le vi le leai o ni povi. Na mafaufau ai na oo mai ai le sui o le World Bank ma ma talatalanoa, fai mai e i ai le faafitauli lea e tataua ona address mo tatou. E tataua ona ave le fautuaga, o i na mafua ai ona aumai le polokalame lea na ioeina e le Afioga ia Le Mamea, e aumai na o povi e 40, povi poa e aumai e fai ai le Breeding Programme i le atunuu. O le mea tatou te manaomia o le toto o povi fou, e toe faafeusuai vaeane le taeao ma a tatou povi fafine ona fanau mai lea o le povi toto fou, toto fou atoa mai fafo. Ona fananau mai lea o latou fanau o povi afa, ona toe o atu foi lea o povi nei ma toe feusuai ma a tatou povi fafine ona fanau mai lava lea vaeane le taeao, ma maua ai le toto fou mo a tatou povi.

A feeseeseai toto o povi e faia faafeusuaiga lau Afioga i le Fofoga Fetalai, e vave ona fananau povi ola mai povi e maloloina, ola mai povi e lelei, ola mai povi ma tupu faateleina, e i ai le avanoa e mafai ona fanau faalua i le tausaga. Ae afai tatou te toe femilosai ia toto o povi Samoa i povi Samoa, e fai o le avivilu, tuai na fanau, mamai ma tele isi faafitauli.

Ae ina ua ou suesuea lelei le mataupu lea, o lea na ou iloa ai, oka o se faautautaga e aupito i sili ona taua e fai, o lea la faatoa tatou alu nei, lea faatoa 2, 3 tausaga o faatamilo le Breeding Programme lea e fai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Filifili lelei le 11 i le 15 a tatou multiplies ona ave lea i ai o povi ia na aumai mai fafo e fai ai le faafeusuaiga, maua mai tamai povi ma tufatufa atu i tua o le tatou aufaifaatoaga.

O le tele ia o le faitio lau Afioga i le Fofoga Fetalai, ae sa taumafai pea e faamalamalama le atunuu, malilie se i tatou faaitai i le auala lea. Se i tatou vaavaai ma tatou tilotilo pe faamata o i e nofomau ai i le mafaufau o le tagata faifaatoaga le taua o faiga faatekonolosi ma faiga faa-technical advice a le Matagaluega ina ia mafai ona tulai mai ia le faatoaga o mea tau lafumanu, tupu ola lelei soifua maloloina.

O le taimi lenei, o lea e tau faufau lau fautuaga e ave i le Kapeneta, o lea e faafofoga mai Afioga i Minisita, ona e i ai le faaaitaui lea e feagai ma tatou, o le fasi faaletatau o manu. E le i lalo ifo o le 15,000 le speed o le fasi lea, tatou faalavelave faasamoa. O le matuai fefefe o le World Bank e vaai i fuainumera nei ona e le mafai ona toe tupu le tatou atinae ona a manao nei lava o le toaina ma le mea ua tatou oo i ai, tulou e le aiaina moo i liu o vaa i le pule a le tagata e ona faatoaga, ona ua tatou masani ai lava, o tatou papovi e fai ai o tatou faalavelave. O mea masani na o lea sa tatou ola mai ai. A o le tatalogo a Masefau a le Matagaluega, e le iloa pe uma afea le tatou atinae. O lona uiga e tatou te o lava i le mea lea o le leai o ni povi e maua pe a tatou le faia se fuafuaga, tatou mataitu e liuliu malie le tofa, e le manao foi le Malo e o atu e pulea le aufaifaatoaga i le tulaga malosia, a ua tapena ai i se pepa e ave i le Kapeneta, pe a pe a faapea, faatupe tatou faalavelave e fai, a \$200 ua tau o le povi, i le tulaga o le pusaapa, pusa pisupo. \$500 povi, a e fia tagata tele, \$1,000. A o le agaga lena ina ia tau taofiofi laitiiti lava le tulaga o le fasi faaletatauina o tatou povi ae ave le fesoasoani e faatupe mea ina ia mafai ona tupu le atinae.

O le faamoemoe ma le manulauti a le Matagaluega o le taugologolo. A tuu i faamaumauga o lo o i ai i le Matagaluega ma latou mea o lo o i ai, e le taitai talafeauga le faamoemoe na fai ai atinae povi ma le tulaga lea e i ai. O Vanuatu is in the Pacific, ua ou oo i ai i fonotaga sa fai, ona e ese foi le latou faasoa ma le latou vaavaai i le tausiga o manu ma le taimi e fai ai, o le faatuputeleina ona e eseese a tatou tu ma aganuu, ae ua ou faapena atu, o lo o loloma le talosaga ma le tuu atu i luma o le Kapeneta ina ia alofagia lenei faamoemoe.

Ua sauni le tatou Matagaluega mo le polokalame a le SACEP. Ua taunuu mai ia....

FOFOGA FETALAI: Malie o lo o tulai mai le sui usufono mamalu mo Salega Sasae.

Tofa Olo Fiti Afoa Vaai (Salega): Lau Afioga i le Fofoga Fetalai, ou te le fia faalavelave i le Afioga i le Minisita, manaia le folasaga malamalama. E moni lava e le i soona tuua lava le Afioga i le Minisita i le Matagaluega lea, o le matua saienitisi lava o saienitisi. O laau, o manu, ua matua manaia le faalogologo i le vaega lea.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea foi la sa e saunoa ai i a tatou manupapalagi, ia, ta fia iloa lava po o fea le mea o i ai tatou manupapalagi? E i ai tatou manupapalagi ia sa aumai le vaalele pe 40, o sau fautuaga lava lau Afioga i le Minisita, ona ou te tilotilo atu, e tutusa lelei lava le tau na aumai ai tatou manupapalagi i vaalele e 40 ma le tau na aumai ai tatou manupapalagi i vaaalalo e le iloa po o ai sa faia lena fuafuaga na aumai ai tatou manupapalagi na e 40 i le vaalele.

Ua e saunoa foi lau Afioga i le Minisita, e ese le manaia o lau saunoaga lea na fai mai mulimuli lava, o le fasi le tatau o manupapalagi. Ia na o se fautuaga, amatamea mai la ia le tatou Malo i mea o faaaloaloga ia e fai ai tatalaga auala ma mea na, se fautuaga i tatou nuu ma alaalfaga, aua le toe fasia manu o lea ua finagalo le tatou Malo e aua le toe fasia le tatauina....

FOFOGA FETALAI: Tulai mai lau Afioga i le Minisita.

Susuga Hon LAAULI LEUATEA POLATAIVAO FOSSIE SCHMIDT:

O lea ua ou maua le finagalo o le sui usufono. Ua e iloa foi lau Afioga i le Fofoga Fetalai ta te o lava i Tulafono Tumau, ou te le tali i ai, leaga e le i lauga ai le sui usufono o le tulaga tau SACEP, e ese le mataupu na ma talanoa ai ona o fuainumera. E ui o lea....

Tofa Olo Fiti Afoa Vaai: Lau Afioga i le Fofoga Fetalai se faamolemole lava, e mafua ona ou talanoa i le SACEP; leaga o le poloketi e aofia uma ai so o se mea tau faatoaga, o povi, o fualaau aina, o mea uma lava. O le mea lena na ou lauga ai, a i ai se taimi e te faauilavea ai, a o la e kava uma i lalo o le poloketi a le SACEP, e fai uma ai lava so o se ituaiga atinae. Faafetai.

Susuga Hon LAAULI LEUATEA POLATAIVAO FOSSIE SCHMIDT:

O lena ua faamalamalama atu lau Afioga i le Fofoga Fetalai, ua manino le faamalamalamaga e pei ona i ai le faatofalaiga a le World Bank, o le a tatou faataitai i i ma o le 40 povi lea na aumai, o la e tausi lelei. O la e ua i ai povi i Savaii, o la e ua i ai povi i Upolu nei, o la e ua i lima o tagata nei e taua o multipliers. O tagata nei e resitala e le i lalo ifo o le 30 i le 40 povi, ona ave lea o le poa lea e tasi e faatataa uma ai a latou povi, ina ia fanau 50 povi i le tausaga ina ia mafai ona tufatufa atu i tua i le aufaifaatoaga. Ia e pei o le agaga lena lena na avatu, fai le tatou fautuaga leaga e leai se isi e sii le ta i le atunuu. E pule le atunuu, ae na ona tatou tuitui ma oloolopitovaa ina ia o latou lagona le taumafai atu a le tatou Matagaluega. E le natia ua lalaa le Matagaluega e fai tatou fale fasimanu, o lea ua i Samoa nei tatou fale fasimanu e lua, e feoai i Upolu ma Savaii po o fea e te finagalo i ai e fasi ia mama fasi ia soifua maloloina, ma tuuina atu i lima o tatou maketi, ina ia lelei le tupe maua a le tagata faifaatoaga. O lea foi ua loloma, masalo o le faaiuga o le tausaga nei e saina ai le tatou fale fasimanu permanent le fale fasimanu lea e le i lalo ifo o le \$3miliona lona tau, o le a faatu foi i uta i Nuu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O le fale fasimanu lea, e matua atoa uma i ai ituaiga eseese e pei ona tatou i ai e le tau fai atu, e tele tatou fale fasimanu sa tatou i ai i le taimi o le STEC, a o le fale fasimanu lea ua faatinoina ai le polokalame ina ia mafai ona fasi ai povi, puua, mamoe ma isi tulaga uma, ma ua tatou tulalata nei i le sainiga o ia Feagaiga ma le tatou World Bank.

Masalo pe toe lua i le tolu vaiaso tatala le tatou fale puua. O le fale puua foi lenei o lea e i lalo o le polokalame lea a le SACEP, aumai ai aumatua e le i lalo ifo o le 10 ma ona tupu ma puua e toe amata ai le tulaga lea o le toe faafeusuai ma tele puua e tufatufa atu i le aufai puua a le atunuu. Sa ou asia i le vaiaso talu ai ua lelei ma matagofie le galuega ma ua lalata ina uma, taunuu mai foi tatou puua i se taimi e le o toe mamao ona faapena foi lea ona faatino le tulaga o faafeusuaiga ma le tele o nisi o mafaufauga lelei ua mafaufau i ai le Matagaluega, ina ia aua ne i o tatou toe toalia, leaga tasi lenei atinae sa outou soifua ma ou ola ai, o le tulaga o le faafaileleina o tatou puua. O le tatou falemoa pei ona fesiligia e nisi, o la e ua maea foi ona fausia ma masalo e tatala faatasi le falemoa ma le falepuua lea.

O le masini fou ua tuuina mai i le Matagaluega, o le masini lenei latou te faafofoaina moa mai fuamo. E aumai tatou moa fou mai fafo ona aumai lea faatuufua ona ave loa lea i totonu o le masini lenei, e le i lalo ifo o le 200 tamai moa e mafai ona fai i totonu o le masina, e mafai ona faafofoa ma maua tamai moa fou. Ia, ou te manatu o se itu aupito i sili ona taua o le a molimauina e le tatou Palemene tou te afifio atu ma outou silasila, ma o le tulaga foi lea ua faatulagaina e mafai ai ona toe atiae a tatou lafumo. Ua outou vaai foi i le tulaga o le a tatou amatamata malie, e 40 container i le masina o lo o tatou taumamafa i pusamoa ia e aumai fafo, e 40. O faaumauga na o lea e i le statistic, ae o le a tatou amatamata malie e alu le tagata e fai lana pa moa ma fai mea uma mo le atiaeina i le tulaga o le vafaafegai ai ma le domestic level, i totonu o le tatou atunuu.

I tatou mamoe, o lena ua ou fai atu, na faalauiloa i le tausaga na tea nei le aumai o le mamoe mai Fiti ma le mamoe mai Niu Sila ma Ausetalia faafeusuai lea ua maua le tatou mamoe Samoa. Ma o le tulaga lena o le mamoe na te gafataulimaina le tulaga o le tau ma le talafeagai mo le tatou siosiomaga, aua na aumai muamua tatou mamoe mai Ausetalia ma Fiti, e le i umi lava ae tele le faaletonu ona o le feeseeseaiga o le tulaga e pei ona i ai le siosiomaga sa ola ai muamua ma le taimi lenei. Peitai o le faafeusuaiga a le Matagaluega ua maua ai le mamoe, e faanonofu le mamoe Ausetalia ma le mamoe Fiti, ia fanau loa le mamoe Samoa. Ma o le tulaga fiala lena o lea ua i ai le tatou mamoe, e mafai ona ia defend ina consequences o le tatou tau.

O le tulaga tau faigafaiva, na saunoa nisi o sui usufono mamalu, faafetai lava i nisi na tapa le tulaga lea. O tatou pole fagota, ia toe o se aga. Pei ona ou taua i le tatou Tala o le Tupe talu ai, e 15 pole fou, pole fou mama, o le taimi lenei ua matua leai se pole e tasi o toe tu i le atunuu, not even one, e tasi lava le pole la e faamauina o le pole la e i gatai o Taga, o le pole lena e moulu, vaeatu le faafofoga, e moulu i lalo o le ogasami.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O pole uma ia na i luga o le sami, e tele faafitauli, faaleaga, tamotu, taula ai vaa, leiloloa, tafefea, ua manatu le Matagaluega e le tatau ona tatou nofonofoai, leaga o pole o le toomaga lea a tagata faifaiva fai alia i Samoa. O le taimi lenei na ona tofu lava o le alia i fafo o le ava, sue loa le auia e alu i ai, uma penisini, ware off afi, sosoo atu ai ma le leiloloa ma le tele o isi faafitauli. Peitai o le polokalame pole lenei, ua faatulagaina ia toe implement uma pole i Savaii ma Upolu, ina ia mafai ona faapolokalame ma valaau le aufaifaiva, o i lea o le a faatulaga ai pole mo outou, e faafesagai lava le pole ia ma le itumalo, pe tasi, lua, tolu, fa itumalo e share le pole lea e tasi, o lo o taumafai foi faatalatalanoaga i masina uma e omai le aufaifaiva, ia ma le komiti faufautua a le Matagaluega e vaavaai po o fea e faataatia tonu ai tulaga ia mo Savaii ma Upolu. O le talosaga foi na tatalo i le Kapeneta, ia talia ai laia e ala atu i le tatou FFA, o le tupe mai le Malo Amerika lea e fausia ai pole. Ua maea foi ona fausia aloaia ma toe faaleleia le tatou vaa o le Ulimasao, aua o le vaa lea e agai e taula pole ia i totonu o le tatou nuu.

Ae faaogaina lenei avanoa ou te tatalo atu ai i le paia ma le mamalu o Samoa ma itumalo, a oo i le aso e tatala aloaia ai lo tatou faamoemoe lea, e tatalo i le atunuu. O pole nei, o pole e manaomia ai lo tatou galulue faatasi. Ou te tatalo foi i le Minisita mo Tina ma Tamaitai, Atinae o Nuu, Afioaga ma Agafesootai, o le tatou tiute o le vaavaai o mea ia, e le tau fai atu ma aoaia e Laupua Tamafaiga le paia o Samoa i ona tulaga faalupe, e tatou te vaavaai ma puipui mea nei, aua a tofu le vaa alia, vaeane le taeao, e le i umi lava ona meai atu i tai fagota i i, o i ina e ofaga i ai ia e saili ai a latou meai ae maua ai e le aufai fagota ia i so o se vaega eseese.

O tulaga i tatou pulu, masimasi ma tulaga o ia eseese, e maua lava i totonu pe a faapea e lelei le faatinoga o tatou pole nei. Ae paga lea, o lo o tele le faafitauli, a o atu lava auvaa o lesi itumalo o atu momotu ma faaleaga, a o atu isi auvaa ia ua o atu toso le pole i le latou pito. A o faafogafoga mai itumalo eseese sa i ai tatou pole, e tatalo atu au nei o le Minisita ma le Matagaluega, ia outou alofagia le tatou polokalame lenei, e malu mea uma a le Malo ona o la outou puipuiga, atoa ai foi ma le faamalumaluga a le aufaifaiva, aua tou te popole, o le a tofu lava le itumalo ma le pole ina ia aua ne i toe agai fua le isi e lote ma faaleagaina ai tulaga o le taumafaiga o lo o taumafai atu nei, ma e le i uma le tausaga lenei masalo po o se mea o Aokuso, ia ua ave uma a tatou pole nei e 15 e tatao i Savaii ma tatao i Upolu nei.

O lo o i ai foi isi a tatou pole lata mai, o pole nei e o ai le au aloalo foi nei a tatou, masalo foi e 20 ma ona tupu pole na, o pole aloalo. O lea foi ua talia e le Malo o Siamani le tatou GEF, o latou na o lo o faatupeina uma le talosaga na avatu foi i ai, ia alofagia o pole nei o pole o mea faloga-afa a toeaia i totonu o le aloalo e le mamao tele atu i tua, ia ae faatuputeleina ai ia mo le fofoga taumafa.

O le tatou tilapia, ia na saunoa nisi o sui usufono. E tasi foi lenei faamoemoea o lo o agai i ai le manulauti a le Matagaluega, ona o le tele o le avanoa e mafai ai ona tatou faatupulaia le mea lenei o le tilapia, e tele le avanoa.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Ma o lo o avatu nei le talosaga aloaia i le Malo i fafo e ala i a tatou faigapaaga Thailand, na oo mai le malaga faapitoa i le tausaga lea na tea nei, ina ia faasino mai o Thailand o le atunuu aupito i sili o le latou mataiai lea ma le latou matafaioi lea le commercialize ina o le mea lenei o le tilapia. Aua o le tulaga tau le faafaileleina ma le tulaga tau le vaaia, e matua leai, leai se faigata mo Samoa. O lo o tele a tatou vai tumaoti pei ona saunoa le Afioga i le Sui Fofoga Fetalai, o se tasi lenei vai o lo o tilotilo i ai le Matagaluega ona o le tele, lelei, lumafale i le nuu atoa, pola puipui le nuu. O ituaiga atinae nei e mafai ai ona tulai le tulaga pei ona ou taua muamua, tatou agai i le commercialization, e tatou te le tau faia fua, na ona tatao lava faatulaga ia tulaga o aiaiga ma le faatulagaga ina ia faatulaga mea e talafeagai ma le commercialization, fai loa, ua lava tapena le tatou ofisa o la e faafailele tamai ia, so o se taimi, o le a se mea e finagalo i ai, o la e i ai le tatou ofisa uma le maketi o ia, e tou te silasila i ai i tua o lena e i ai le faafailelega, e tele ma anoanoai, ae tuu atu i luga i le tagata e i ai lona manao, a o le faalauiloa ia, ua lava tapena le Matagaluega e o atu e fai, ma e le i ai se faatoaga tilapia i Samoa ou te le i oo i ai maua ma lau Minisita Lagolago le Tofa Faasootauloa, ua ma o ma tilotilo i le tele o tatou vai ia e taape i le atunuu taufusi ia e taape i le atunuu e le o faaaogaina. O lea e loloma nei le tulaga o le faatupega e pei o le tupe lava lea e mafua ai ona tau taofiofi laitiiti leaga e le tasi se mea o fai, ia ua tagisa foi le Minisita o Tupe ona o le tagi soo, ae le fiu, ona o le talitonuga o le tilapia, o se tasi o tatou export e mafai ona tatou faia, o Niu Sila atoa e sau mai le Atua Asia a latou export sau mai i ina le latou tilapia, ae se i vaai ia tatou na o le tolu itula, ae mafai ona fai. O lea ua amata ona ave ifo tilapia ola e faatau i le tatou maketi o ia, e ese foi le filosofia e te alu atu faatau, faatau ola, o la ua amata ona faataitai le mea lena, ma e tatou te vaai foi i le taimi o faaaliga o oloa a le Ofisa o Faatoaga, e tou te tagatagai i ai i metotia na. A o le agaga ina ia faatuputeleina lenei tamaoaiga, o lo o i ai ia faifaatoaga ma faigafaiva, o lo o i ai ia oa faalenatura nei e faaleleia atili ai lea poloketi.

O le tatou vaega toso vaa, ia Sa Asomua ma Aiga, lafo mai lou faatuatuaga. O se mea e manaomia ai le fesoasoani a le aufaifaiva, ou te tutu ma au i ina. O mea e toso ai tatou vaa, o mea e faaleleia ai mea uma i taimi o afa, uma foi ona ou asiasi. Na amata na o oe le talosaga, ae ou alu atu i Savaii, ola, ola, ola, ola, ia e fa, lima itumalo i inei e talosaga foi i le mea lenei, ua uma ona fai taligalu, ae manaomia sina mea mafolafola e tatoso ai vaa, taimi o afa leaga o la e tatoso i luga o maa, se i vaeane le faafofoga a le atunuu, e faapena foi nai manaoga o lo o i ai le aufaifaiva i Savaii. Ua uma foi ona ou talosaga i le afioga i le Pule tuufaatasi le talosaga, ia ona avatu lea i se Samaria agalelei fafo ia ona aumai lea faatino lou finagalo.

Ua tatou oo mai i le tatou Fale Suesue le SROS. Ou te faafetai atu i sui usufono mamalu sa....

FOFOGA FETALAI: Tulai mai le sui usufono mamalu mo Falealili Sisifo.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Tofa Aumua Isaia Lameko: Lau Afioga i le Fofoga Fetalai, e le faauilavea i le saunoaga matagofie a le Afioga i le Minisita. Atonu ai ua pau i le Afioga i le Minisita sa ou laga le tulaga lea e i ai mea tosovaa ia sa fau e le Malo i lo matou itumalo i le nuu o Poutasi. Peitai o lea sa ou talosagaina ia uafu le tumau e taula ai ia alia. E silasila i ai lana Matagaluega o Faigafaiva i temporary wharf ina ia mafai ona taula ai ia vaa ia mo nai tagata faamolemole.

Susuga Hon LAAULI LEUATEA POLATAIVAO FOSSIE SCHMIDT: O lea ua maua le finagalo o le sui usufono. Sa fai le matou asiasiga i le masina na tea nei lau Afioga lea na ou taua ai ia le talosaga a le itumalo o Siumu. O lea ua faamauina le sui usufono mo Falealili Sisifo, o lea ua faamauina, ae lafo mai, e sili atu le pagatia i Savaii. A e silasila i le uafu i Taga, le uafu i le itumalo o Vaisigano Nu.1 o Satua ma nuu na, e te le fia silasila i ai, ae ou te faafetai i le aufaifagota le onosai. O le uafu i Safotu, e sefulu tausaga tausaga o lauga Tuiloa, a pe le tai e le mafai ona sau i uta le vaa, ava ia ou te fai atu ai. Ia o la ua uma ona pasia e le Kapeneta e aumai tatou fana ia, tuai lea e i i le tatou lotoa e tilotilo i ai po o le a le auala e toe tui ai ava ia, aua a sau le vaa i le leva o le po ae ua pe le tai, ia e nofonofo i tai i le aso atoa seiloga e sua le tai faatoa mafai ona aumai i uta, tele le vaa e faaletonu ma le vaa mama. O le mea lea taatia mai le fanoga le sui usufono mo Falealili Sisifo, o le a faasolosolo o lea e amata muamua i mea tosovaa. A maua lava le tupe e talosaga ai i tatou Malo, ia e faapena foi ona faalauiloa.

Faafetai i le Afioga Faumuina ona o lona finagalo i le mataupu taua lea o le commercialization o le SROS. Ia e le tau faaulaina lau saunoaga leaga o oe sa e i ai i i, atoa ai ma le Afioga Hon Faamoetaulao o le uluai Polofesa sa amata le tatou SROS lenai. E tele le sao taua ma o se faatofalaiga lelei le faia e le tatou Malo o le Suesuega Faasaienisi lenai. E sefulu ma ona tupu tausaga ua tatou vaavaai i le anoanoai ma le tele o le tamaoaga o lea o le a tatou tilotilo nei i ai, i le taeao i lou saunoa mai i le commercialization, o le agaga lena. O la e tapena le pepa e ave i le Kapeneta e fautuaina ai, ua tataua ona see ese le SROS i lesi ona faiga, e le taua na o le beneficence ma tulaga tau inspections ma experiment, ae ua tataua loa ona tatou laa i le tulaga o le commercialization o le maketi ma export. Ma o le agaga lena, e sau tonu lou finagalo i le tulaga foi sa e i ai i lena taimi i le tatou SROS, ia e talafeauga ma le mea lea ua matou manatu i ai. Ma ua i lima nei o Loia tulaga e le natia, this is the way, o le auala lea tatou te o i ai, ua lava taimi o suesuega, ua lava ma totee faamaumauga o tatou formulations la e i ai i le taimi lenai, ma o le taimi lenai ua tatou loa ona tatou tilotilo i le isi sitepu, o le faaolua loa o mea nei ma ave loa i fafo.

O le tatou falaoamata ulu e pei ona saunoa nisi, ia o le mea muamua lena o lea o le a tatou agai i ai. O la ua i gauta nei i Nafanua ia nisi o ogaumu tetele e aumai e amata ai le mea lenai o le faamagoina o le ulu drying ia ma ave loa i tatou maketi i fafo. Ae le mafai ona soona laalua se i vagana ua taunuu mai le tulafono.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

A o lo o i ai foi nisi o tatou Private Sectors, o lo o i ai le afioga Papalii Grant Percival, Eddie Wilson ma nisi o tamalii o le atunuu o la ua latou amataina le mea leni o falaoamata ulu i le tulaga laitiiti, a ua manatu le Malo i le tulaga lautele, ua tatau ona tatou uunaia malosi le faa commercializing loa o le tatou ulu ia ma auina atu i fafo. Sa valaaulia au i le tausaga na tea nei i le World Ulu Festival sa faia i Hawaii, ma o le agaga faafetai e taunuu atu o lo o i ai le faigapaaga mausali a Samoa ma le Iunivesite leni. O le tausaga e 1973 na avatu ai ia planting material iinei i Samoa e fai ai suesuega a le Iunivesite leni o Hawaii, ua mautinoa ai o le ulu maafala, puou ma isi a tatou ulu, o ulu aupito i sili nei ona tamaoiga i porotini e maua mai i le mea lea o le falaoamata ulu. O i ina na ou tapa ai le ioega a le Kapeneta, ua tatau ona tatou o loa e faatino le tulaga leni o a tatou commercialization o le tatou ulu. O le mafuaaga lena ua talia ai o Oketopa o le tausaga nei o le a host ai Samoa i le tatou summit o le ulu, World Summit Festival e fai mai iinei, ma ua valaaulia uma ai le au experts eseese uma o le Pasefika ma le lalolagi e omai e faamatala le taua o le mea lea o le a tatou i ai, a o lo o fuafua e oo atu i le taimi lena, ua amata ona faatulaga le tatou ulu e palu loa ma tatou e sauni e lau atu i le maketi. O le tulaga tau le maketi, ua gafataulimaina o latou e omai e faatau atu. O le ala foi lea o le fai o le faigapaaga e latou te lau fuaina mai ia ogaumu nei ua amata ona aumai o la ua i uta i le SROS, o lo o ua tapena nei talosaga i le Kapeneta le Minisita o Tupe se tupe e fesoasoani e amata ai le Packing House. O le tatalo lena, ina ia mafai ona amata loa ona faataavili e ao mai ulu ma fai, aua o le taimi leni, ua na o se small scale, o lo o fai ma tatou tilotilo ma vaai i le taua o le falaoamata ulu, and into the commercial scale, ua tatau loa ona tatou vaai e faalautele ma faatupulaia lea tamaoiga ua leva ona tatou taumafai i ai i suesuega ma ua manuia.

O le tatou avacado oil, ia o le tasi lena avoka le suauu e maua mai le avoka, o la foi ua mautu faamaumauga sa pei ona taua e sui usufono, ia o le agaga lava lea e tasi. Ua le tatau ona tatou toe nofonofo a o lea ua i ai le ioega ma le saunoaga a le Afioga i le Palemia, ua tatau ona amata ona tatou faataavili, vaavaai po o le a loa le isi sitepu, ina ia gaosi oloa ia i le tulaga muamua, value added goods, produce market export, ina ia mafai ona fesoasoani i tupe maua a lo tatou atunuu. Ua uma ona ou taua le talo fresh ma le talo frozen, o le talo frozen o le initiative o le SROS. O suesuega a le SROS na mafua ai ona fanau mai le mea leni o le tatou iloa o le mea leni o le talo faa-aisa, o le initiative na fausia e le SROS lea e sau ai le talo, fai, taamu, ufi, sa le mafai ona avea i maketi i fafo pei ona fai atu, ia o le vaiaso lea ave mea i Melepone, vaiaso i ona tua atu, tatala Niu Sila, faatoa toe ulufale lea o le tatou ulu frozen, taamu frozen, ufi frozen ia ma le fai Samoa frozen. O le agaga lena e atagia ai ma avatu le faamalamalama, o le uunaiga lena pei ona saunoa le sui usufono mamalu Faumuina, we have to commercialized. O fagu manogi, ia ua faulalai le tulaga o tatou mosooi, o le lagaali, o isi a tatou fua uma o faaeleleaga, ia ua maea foi ona tapena.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O le agaga faafetai i lenei Paeaiga, ua tuufaatasi ai le SROS ma le Matagaluega o Faatoaga. Aua o mea uma nei o le a agai le SROS o le a agai e fai, ia e tua mai lava i le Matagaluega o Faatoaga e o latou e faatino mea ia, e o latou e faatino poloka ulu, poloka avoka, e faapena ma nisi mea uma sa ou taua muamua. A o le agaga, ina ia mafai ona faatupulaia ma ia sustainable le sapalai mo mea nei ua tatou agai e fai.

E faaiu ai se faamatalaga e momoli atu ai le faafetai tele i lau Afioga i le Minisita o Tupe....

FOFOGA FETALAI: Malie lau Afioga i le Minisita, se i tulai mai le sui usufono mo Vaisigano Nu.1.

Tofa Lopaoo Natanielu Mua (Vaisigano Nu.1): Lau Afioga i le Fofoga Fetalai, e matau atu o le a faaiuiu mai le saunoaga a le Afioga i le Minisita, ae sa ou taua le moli i lou itumalo. Po o le a se finagalo i le Afioga ma le Matagaluega, pe le agai i ai se suesuega aua lea vaega e fesoasoani i a tatou tupe maua. Ma le faaaloalo.

FOFOGA FETALAI: E moni le sui usufono sa taua i le saunoaga, se i tulai mai le Minisita.

Susuga Hon LAAULI LEUATEA POLATAIVAO FOSSIE SCHMIDT: E faamalulu atu lava i lau Afioga i le sui usufono, leai e sao lava oe, ua lape le mea lea ona ua galo ia te au. E faamalulu atu i le tusi lea na e taua le Afioga i le sui usufono mo Vaisigano Nu.1, o au nei o le tagata tali tusi tele, ae malie lou finagalo a i ai se kopi ia te oe ona avatu lea pe ta te fefaasoai ma fetufaai i le manatu lea ua e saunoa mai i ai.

le tulaga i le tatou moli, ua uma ona ou faatonuina le Matagaluega, silasila i le mea lea e fai i planting materials, ina ia faatupulaia le mea lea o le tatou mandarin lea e te saunoa mai i ai, e le o faigofie le tatou faaofiiofi atu i maketi i fafo leaga o le faamai lea o le fruit fly, e le o se mea laitiiti, o la e tu nei i uta le tatou demonstration o le high treat and plant na pau lena o le auala e mafai ai ona tatou ofi i maketi i fafo. O lena ua outou silasila le moli lea e sau mai nei i Ausetalia, le apu lea e sau mai nei i Ausetalia, top of the line, a o le tatou taumafaiga la e tatou te amata muamua i le tatou local market, tatou te galuaeiina le taumafai ina ia faatuputeleina ia na tufatufaina lea i tatou faletalimalo o aoga, there is still enough market for the mandarin, e lava le maketi mo le tulaga lea. Ae sao a au, o se tasi lenei o native plant ua leva ona tatou soifua mai a o la ua amata e le Matagaluega, po o le a le auala e mafai ai nisi planting material ma uunai loa i tulaga o fualaau aina, pei ona ou fai atu i le taua i le tulaga o le soifua maloloina o alo ma fanau, aemaise o le tautuaina o le tatou tagata tafafao maimoa mai fafo ma isi vaega eseese.

Ia lau Afioga i le Minisita o Tupe, ou te faafetaia lou finagalo i le tulaga o le tatou vaai mataitu ma ia lelei le faasoasoina o le tatou tupe.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

A o le tuualalo lava ia a au nei o le Minisita mo Faatoaga ma Faigafaiva ma lenei Matagaluega ma lau Afioga, e leai se isi mea e tatou te tua i ai, e tua lau faasoa i le atunuu atoa, pei ona taua i lau lauga i le amataga, e 80% o tagata Samoa o faifaatoaga uma, e le natia le mea lena, 80% o fanua faaleaganuu, o tagata nei e oo o latou lima i totonu o le laueleele, e tele le malosiaga e mafai ai ona tatou uunaia le tamaoaiga o le atunuu, pe a ave le lagolago i le aufaifaatoaga ma le aufaifaiva. Our vision for this term, is commercialization and mechanization, ae fuafua lava le tatalo atu ia ona o le faasoa faale-auau. Ua tatalo foi i Malo i fafo, ina ia mafai ona fesoasoani mai, o lea ua fesoasoani mai Saina i lea vaega. A o le faaatinaeina lava ma le uunaiga, e tatau lava ona tatou tua i le aufaifaatoaga. O lau foi lena faanaunautaiga ma moomooga faivavale. E le toe tuuaunoina le aufaifaatoaga e o na o latou, no, Government has to stand by, e fai le lagolago, e faatoa koma lava le Matagaluega pe a uu le tupe i le lima o le farmer, and then mission accomplished. E le tatau ona tatou toe tuua e tele faafitauli. A alu atu le tagata e alu atu na o ia e faafetaiai o la foi e i ai isi atunuu la e faasasaga mai, e aumai a latou aiaiga e faafaigata tatoso red tapes, tele le faafiauli. Ae a tatou o atu is a Government, e tilotilo mai tagata mai fafo, Government is around, e faafaigofie mea uma. Ou te faafetai ai i le amanaia ma le lagolagosua pei o le faatalauala atu e i ai a tatou polokalame e i ai a tatou Agro Business Program, o le taua ia. Ia e ui lava ina tau faatulaga ona e le o lilifa uma le faamanuiaga i totonu o le aufaifaatoaga, ia ae tuu atu o lea ua tatou amata.

Ou te faafetaia faapitoa ia Faalapotopotoga o lo o uunai mai le fesoasoani i so o se vaega eseese, Project Technical, Monetary, Policies Training o a uma mea, e taua tele le latou lagolago. Ae pei ona fai atu i lau Afioga i le Minisita o Tupe, e leai lava se isi auala, we have to spend money to make money. E leai lava se isi auala. Ma ou te faafetaia mai ia e alofagia le tulaga o le second phase o le SACEP lea, we must do it, we must have it, leaga o lea ua tatou vaai o lea ua tulai mai, e ui ina tele faafitauli i le amataga, a o lea ua tulai mai ua fua mea nei na taumafai e fai, e tele ma anoanoai, o le tatou onosai ma tatou faatonutonufolau, e aoga mea na tutupu, e faapena ona tatou aaoaina ai.

E faamauiina lau faafetai i se tasi foi o bank i totonu o lo tatou atunuu, sa tatalo i ai ia alofagia le aufaifaatoaga, Samoa Commercial Bank Ray Ah Liki, faafetai, ua na faia lana scheme mo le aufaifaatoaga \$3,000 i le \$10,000 no guarantee. Ae e te alu atu e avatu e le Matagaluega le endorsement o le tagata lea o le tagata lelei e fai ana faatoaga, e maua lana tupe lea i le vaiaso o le mea lea e fai. Faafetai i lena tamalii o le atunuu ua na talia le tatalo atu. E \$3,000 i le \$10,000 ae avatu la e le Matagaluega ia faamaumauga o le tagata faifaatoaga sao lea. Aua o le toatele foi o le tatou atunuu aua e le aafia matagi i se faamatalaga, e aumai loa le tupe alu i le isi mea. A o le tupe lea e fesoasoani i uilipaelo faagaau, rakes, suo kipi o a uma mea e faatuputeleina ai. A o lea ua tutu atu le Malo i le isi pito o i e lau i ai au oloa pe a fua. Faafetai foi i le Kamupani Vaa lenei o le Matson. E le natia o lea sa feagai le Palemia ma le tele o feutagaiga ina faigofie ona ave a tatou oloa i fafo.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Faafetai i le afioga ia Laauli Michel Jones, o lea ua liliu le faatulagaga o latou vaa mo Samoa, e i ai le faanaunautaiga e ono aso ua taunuu le vaa lea e alu sao lava iinei alu i Honolulu. E sefulutolu aso ua oo le vaa i LA, Shadow ma isi atunuu o le Malo tele. Ma o le faanaunautaiga lena sa taumafai i ai, leaga sa taamilomilo le vaa e taitolu vaiaso faatoa oo i Amerika, a o le tele o feutagaiga na oo mai ai le Kamupani lena o le Matson ma talanoa i le Malo, o lea foi sa saunoa i ai le Afioga i le Sui Palemia i le tatalaga o le vaa fou lea e tau o le MV Samoana. Ou te tautino atu ua lava tapena le tatou transportation e ave le tatou oloa i fafo i le tulaga lea. Ma ua faamauina e 10 aso 13 aso ua taunuu fua o faaeleeleaga i le tulaga o le faigofie effieience ma vave taunuu oloa nei ina ia taunuu vave i lima o e faatauina ma toe maua le tamaoaga o le tatou atunuu.

Ia se taimi taunuu atu le talosaga lau Afioga i le Minisita o Tupe ona ua le ofi le tatou packing house lea e i Atele, ua matua le ofi e oo mai i le taeao lena o la e feteenai ua le lava palaka, o tulaga foi i le taumafaiga o le tatou frozen, na logo mai au anapo e fa Kamupani la e pack faatasi i le taimi lena. Ona o le faanaunautaiga i le uunai lea ua avatu ai le Malo i le tulaga o le tatou faalauiloa ma le maketi. E tatalo atu pea o se taimi taunuu mai le talosaga i le Kapeneta ia alofagia foi le tulaga o le tatou packing house lea e i Atele. O le tatou packing house i Salelologa e le natia, na oo mai se tasi foi o tamalii ua mana'o lava ia e pack mai ana mea mai Savaii, peitai e leai se tatou packing house i Savaii. Ana fai lava ua silia ma le 12 container la ua sau mai Savaii sau sao lava mai Savaii. Faafetai ai foi i le fautuaga a le Afioga i le sui usufono ona o le naunau e fai le tatou uafu, e faalelei le tatou uafu i Savaii e le toe i ai ai se mea lea o le ta lau o container i luga o vaa ma lau i Savaii ma aumai. Ae ua faamoemoe i le Polokalame lea a Saina ma nisi o talosaga ua ave e faatino ai le tatou packing house mo Salelologa lava ia. A o le agaga ua maea foi ona faatalatalanoa, o le a faatu le Ofisa o le SROS i Savaii e le i uma le tausaga lena, ina ia amata foi ona faagasolo a latou polokalame o le talo faaaisa ma mea uma na. E faagaioi mai lava containers mo Savaii ia, ae aua ne i toe feomia i le tatou fale lea e i Atele leaga ua tele foi le paia ma le mamalu o tatou nuu iinei i Upolu. O lea ua ou taua le tulaga o le fale e packing mo le SROS na ona lafo atu faapena lau Afioga i le Minisita o Tupe.

E le faaitiitia le agaga faafetai ou uso a Minisita lau Afioga i le Palemia, o si ou leo o le tagi a le pumate. E leai se mea ou te mafaia na o au ma le Matagaluega. O maua ma le Minisita Lagolago ia Faasootauloa, e tua atu lava i ina i lo outou tauau tele tatou te amo faatasi le avega. E pei ona ou fai atu i le Afioga i le Minisita o Tupe Maua, o lau Matagaluega le isi Matagaluega is the biggest commercial farm. E toatele e o lo o taofia i uta e faaoga uma e fai ai lau faatoaga, e te le toe popole i se paketi. E tele tupe e maua mai i lau Matagaluega e grant ai lava nai au meatotino. Ua maea foi ona ou talosaga atu i lau Afioga i le Minisita mo Tina ma Tamaitai, le tatou fesootaiga faapule mamalu a alii ma faipule pulenuu ina ia vaai a tatou pole ma vaai le tatou manu ainiu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O le manu ainiu is a national issue, a manumanu le itumalo i ona toganiu o le tatou galuega e fai faatasi. E leai se mea tele na o le ao lava o le afato aua tou te toe faaoga oganiu i pou o pa ma pou o fale. E na o le faaputupu faatasi lava ma faatamaia. E le mafai e le aufaigaluega toaitiiti o lo o i ai nei, ae ou te tatalo atu e pei ona tatou fesootai foi lau Afioga i le Minisita mo Tina ma Tamaitai, o le tatou galuega e fau faatasi. E tasi lava le palalasi o le aumaga o le nuu e teu lo latou tuamaota i mea tau manu ainiu, e manatu e le toe i ai se mea e toe tulai mai.

Faafetai atu i le mamalu maualuga o le Kapeneta ona o la outou lagolago. O sui usufono mamalu uma foi o e e le o lagolago mai i lenei Matagaluega e ala i lau Afioga i le Minisita mo le Soifua Maloloina. O le lagolago lena o lenei Matagaluega e ala i le faatupulaia o meaai soifua maloloina lelei aua lo tatou atunuu.

Lau Afioga i le Minisita mo le Punaoa Faalenatura ma le Siosiomaga, o lena ua oo atu le tusi faapitoa i lau Afioga. O le talosaga o le tele o le mamalu o le atunuu ua fia agai e fia auai i le commercial farm, ae leai ni fanua e galulue ai. O lena ua tatalo atu ai, ni a fa au i lou finagalo o lo o i ai nai avanoa i fanua o le Malo, ae aumai i lalo o le Matagaluega matou te vaavaaia, e faatonutonu folau a faaletonu sui, ae ia i ai le agaga ia lava ia commercial farmers mo le faamoemoe.

E faapena foi ona momoli atu le faafetai i sui usufono o e o lo o lalamua i le taumafaiga o le export. Toleafoa, e le tau fai atu, ua ou vaai atu ma le 20 containers a lou itumalo faapea foi le atu Falealili ma Safata. O le tatalo lena, e afua atu i inei i lo tatou Maota lo tatou lalamua, e ofa atu e le Matagaluega so o se fesoasoani, planting materials o tulaga tau le faufautua technical advise o lo o ua matua gafataulimaina le tatou Matagaluega. Ae pei a lalamua lava sui usufono ua faigofie foi le feau e ave i totonu o nuu ma afioaga. A o le agaga ma le faafetai, ona o lo tatou tutu faatasi ina ia tau lau o le tatou faamoemoe.

Ona oo mai lea o lau faafetai mulimuli i lau Afioga i le Minisita mo Tina ma Tamaitai, o lea sa taua lou igoa e ala foi i lou taumafai atu i le support mo nai tina puapuagatia. Ia faatea le aina le tatou feutagaiga na fai, ae aoga mea tutupu e aoaoina ai le tatou faatonutonu folau mo le lumanai. E le tuumamaina e le itumalo lenei lau Afioga i le Minisita mo Tina ma Tamaitai, ona soo se mea e taua ai tina e tatau ona ave le tatou faamuamua ona tatou te alolofa i tatou tina o tuafafine ma taitoalua. Ma le isi, e le mafai ona see ese le sa o le itumalo lenei leaga o le itumalo lenei na uluai Minisita muamua i le 1993 i le Matagaluega o Tina ma Tamaitai. O le ala lea o le avatu o le lagolago i lau Afioga ma le mamalu o le Matagaluega aemaise ai o lou tuafafine a sui usufono le Afioga ia Faaulusau o le tamaitai. O le ala lea soo se mea e taua ai tamaitai ou te vaai e oia ai le va lea, ou te lagolago. Atoa ai ma le lagolago e tusa ai foi ma le faalapotopotoga lena o le Government Organization lenei, ou te lagolago i le tulaga i le galuega a lenei foi faalapotopotoga a le Malo. O latou o lo o agai e fofu alamea mataupu uma aua le vafaafegagai ai i le sauaina o Tina o le atunuu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Na tusi mai le Peresetene ia te au, o Laauli aumai sau fesoasoani i le matou aoga leaga o lea e camp tamaiti, ou fai atu ua lelei, ou fai atu i le afioga i le alii pule, oafio e alu e vaai o a o le taimi lenei ua uma ona faatino e le Matagaluega le latou garden ave ifo tamaiti e aoao, faatonu toto ma maua fua a latou kapisu ma mea uma, o le agaga lena o le lagolago ina ia mafai ona fesoasoani aemaise ai, o le fesoasoani e foia faafitauli e lagolago atu ai i le Minisita o Tina ma Tamaitai, ou te i tua pea o le lagolago atu, ona e taua lo ta vafealoaloai ma lo ta sootuli, ia ona o le lagolago i mataupu uma e lagolago ai le Matagaluega i tina ma tamaitai.

Ia lou itumalo ua ou afe atu, ua iu le tatou galuega, faafetai tatalo, faafetai tapuai. Fagaee, Sasina, Letui ma Aopo, ia o lo o outou ula pea le mulila ma tui mai le mulipapaga a o feagai au nei o le tofi aemaise foi o lou tuafafine ia Faaulusau, amuia le tatou itumalo i lenei Paeaiga, sau le filifiliga a le Atua, e toalua maua o lo o tauavea le galuega. Ia fai lena mo se viiga o le Alii. O le tatalo ina ia maua lo ma agaga o le tuufaatasi e tautua lo tatou itumalo.

Faafetai i lo tatou nuu i Aopo, le paia ia Eetau ma le Ati Eetau, tainane foi Tauaanae ma Matofai lau fetalaiiga le Tuua Pao ma lo tatou nuu. O au lava lenei, e leai se mea e suia, o futia ua sola ma aso ua alu, sa fai lava le tautua i lo tatou nuu, o mea uma aua le lumanai manuia ua outou lafo mai foi le faatuatuaaga ma mea uma, ia ave lou ola ia aoga. Faafetai o lea ua tasi le faatofalaga o le a fua le tatou tuaoi, o mea ua leva ua autausaga o tatou pologa ai ma tatou femateai ai, ae faafetai o lea ua tini lau o le faamoemoe.

E faafetai atu i le mau o le toovae i lo tatou aiga, Sa Tupua, Sa Malietoa ma Aiga, ia malo. O taimi sili ona latalata ona ao, ia o taimi pogisa na. Onosai lo tatou vafeagai ai ma le tatou pitonuu o Letui, e le o nisi o tino, toto ma aano, lau o le Fiso, lau o le Tolo, e tasi le mauga i Olo, ae sau ao o malama, tatou tatalo i le Atua ina ia foai e leai se mea e taunuu ma lelei, pe a tatou toso le aulapa ia ma toso le felefele o le l fealofani. Ae na ona tuitui malofie ma ou tatalo atu, o faiva e tapuaia, ia o faiva na e manuia. Ona faatai lea ma se leo, ia faamanuia atu i le tatou Lotu Faapitoa na fai i Fagaee, e faamalulu atu, ua le mafai ona oo atu ona o Fonotaga a le Palemene. A ia folau i lagima lo tatou itumalo, tui mai pea le mulipapaga ma outou tatalo ina ia fai so tatou sao ia Manuvao, aua le tautuaina o le atunuu.

Lau Afioaga i le Fofoga Fetalai, ou te le toe sulaina le toga lelei i lau Afioaga, ou te le toe mafai foi e upu ma ni tala e le lilo e le lanu lou toe tulai mai i le Nofoa, leaga o lou taimi, o taimi o asaasa o le faigata o upufai o Malo. Ia faafetai i le Atua, e le faigofie e sefulu tausaga o tautua i ina, o se galuega faigata, ia ae le fou malae e le fou ia te oe le tulaga o le Nofoa ma le faamalumalu, ia maua lou soifua aua le feagai ai i upufai o Malo ma le tautuaina o si o tatou nuu. Ia mamao ni lagilagia i le paia ma le mamalu o Samoa o lo o faafofoga mai i ona tupu ma ona ee, tamalii ma failauga, aemaise o le loaloa ma le maave eseese o Feagaiga taulagi i so o se fatafaitaulaga, o lo o nonomanu ma tatalo mo Samoa.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Faamanuia i le aufaigaluega a le Malo, tupu ma ee, o Faauluuluga o Matagaluega ma Faalapotopotoga a le Malo, ia maua lo outou malosi, maua lo outou manuia aua le feagai ai e tua atu i ina le pule i le puletua aua le taumafaiga a lo tatou Malo. Ia folau i lagima lau Afioga i le Palemia ma le Kapeneta, ia maua le soifua manuia i le Fonousu a Samoa, ae maua sou ola.

FOFOGA FETALAI: Malo faafetai, ia ua logoi logoa le faafofoga tapuai mai a Samoa aemaise foi lenei Palemene i le saunoaga a le Minisita mo Faatoaga, Vaomatua ma Faigafaiva.

Ia ma ua oo mai le faasologa i le Afioga i le Minisita mo Galuega, Felauaiga ma Atinae Eeseese a le Malo.

Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eeseese): Faafetai atu mo le avanoa i lau Afioga i le Fofoga Fetalai. Ma le agaga faaloalo tele ua ou tulai atu ai e tali atu i mataupu sa laga mai i saunoaga a sui usufono mamalu, sa afea ai le Matagaluega o Galuega, Atinae Eeseese ma Felauaiga i luga o le ea, sami faapea ma le laueleele.

Ae muamua lava ona ou faatalofa ma ou faatulou atu i le pau o le Maota ua sasao nei, le afio o lau Afioga i le Fofoga Fetalai, afio o lau Afioga i le Palemia, lau Afioga i le Tamaitai Sui Palemia, Afioga i Minisita o le Kapeneta ma a outou Minisita Lagolago, ae a le paia lasilasi o lena itu o le Maota i le afio o a outou Afioga i sui usufono mamalu o le Palemene. Afio foi afio i Faauluuluga o Matagaluega ma Faalapotopotoga a le Malo Tumaoti a lo tatou Malo. Afio lau Afioga i le Tamaitai Failautusi o le Maota faapea le maave eeseese o le aufaigaluega.

E fia faaogaina foi lenei avanoa ou te faatalofa atu ai isi ou Itumalo Tu Taulaga Sasae, faamalo le soifua malo le tapuai. Faamalo atu foi i lau tapuaiga Samoa, mai mauga tetele seia paia maugaiti, faapea le mamalu o le Aufaigaluega paia a le Atua i ona fatafaitaulaga e fia i nuu ma afioaga o lo o tausaina le Ipuvai o le Ola ma faanonomanu aua se manuia o lenei Palemene ma si o tatou atunuu ma le paia o tatou tagata.

O outou sa ma faigata faalupeina o le a le afea i se faamatalaga a le auauna, ae o le a nuunuu atu ia faatini o tausala.

Lau Afioga i le Fofoga Fetalai ua uma foi ona e toto le niu i le tuaoi aua lava lo tatou va tapuia ma le Atua. E saga viia ai pea lona suafa mamalu, faafetaia lona alofa ma lona agalelei faifaipea mo i tatou uma lava.

Lau Afioga i le Fofoga Fetalai, o le tele o saunoaga a sui mamalu sa lilifa lava i auala galue, moli auala, taligalu ma le suavai taumafa. O lea ua ou faamauina uma a outou talosaga aemaise a outou fautuaga sa tuuina mai, e fai mea faasolo i ai le galuega faatino a le Matagaluega ma Pulega Eeseese pe a maea ona pasia le tatou Tala Faatatau Autu o le Tupe 2017/2018.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga o le tele o nisi o ia talosaga aemaise mo auala galue, ua uma ona faaoo mai talosaga tusitusia i lou Ofisa. Ua taoto foi ni finagalo faaalua e fautua mai ai sui mamalu mo le faatinoina o auala galue e le manaomia ai ni auala ta. E manaia ma lelei tele le fautuaga, ona o le tulaga leni, a faata se auala galue pe 3 kilomita ma fai i le tupe faaagaga mo lea auala ta, ona faatino ai ni auala maamaa scoria se 2 pe se 3 auala, ona o le tele o talosaga mai sui mamalu mo ni auala galue, o lea o le a silasila totoa i ai le Pulega, faatino lea fautuaga ina ia maea le tatou Paeaiga, ua maea uma outou talosaga mo ni auala galue. E mafai ona faatino mai i le Tala Faatatau o le Tupe mai i tausaga ia o totoe o le tatou Paeaiga.

Mo le silafia o sui usufono mamalu uma sa talosagaina mai ni moli auala, e i ai le process e faatino, e pei o le tuuina mai o le talosaga tusitusia i le Faalapotopotoga o le Malosi Faaeletise (EPC). E faatino ai le survey ona tuuina atu lea o le talosaga i le Komiti Faapitua, e iloilo ina ia outou talosaga, mo le faatinoina o talosaga mo moli auala.

Lau Afioga i le Fofoga Fetalai, o talosaga mo taligalu e talosaga mai i le LTA pe afai o se taligalu o lo o aafia ai le auala a le Malo.

Afioga Faumuina Asi Pauli Wayne Fong (Itumalo Tu Taulaga Sisifo):
Lau Afioga i le Fofoga Fetalai....

FOFOGA FETLAI: Ia malie lau Afioga i le Minisita, se i tulai mai le sui usufono mo le Itumalo Tu Taulaga i Sisifo.

Afioga Faumuina Asi Pauli Wayne Fong: Faafetai lava i le faamalamalama a le Afioga i le Minisita, leai e le i afea e au ni auala galue lau Afioga. O lea sa taua i lau lauga, ia auala o lo o nonofo ai tagata o lo o nonofo i totonu o le Itu Taulaga, i le vaega lea o Moamoa ma le vaega lea o Falelauniu. Ia o i ina o lo o nonofo ai le toatele o le atunuu o lo o alaala ai, e le manaomia ai ni auala galue.

Ia o le mea lea e toe faamanatu atu ai i le Afioga i le Minisita ne i te i ua pau o lea sa afea i le taumafai atu a leni sui ma le faaaloalo lava faafetai.

FOFOGA FETALAI: Malo, tulai mai le Minisita mo Galuega masalo o lea o le a oo i ai le saunoaga a le Minisita.

Susuga Hon PAPALIITELE NIKO LEE HANG: Lau Afioga i le Fofoga Fetalai, faafetai mo le faauilavea a le sui usufono mamalu, lea ua oo tonu mai lava lau folasaga i le tulaga lea. E pei ona ou fai atu, o talosaga uma lava i auala galue, auala a le Malo, auala fou, e pei ona ou te le i taua auala fou. Ae pei o le talosaga a le sui usufono mamalu, o se auala fou i Moamoa. Ia o lea ua faamauiina foi le talosaga a le sui usufono mamalu, ma e o le a faapena o le a faagasolo atu i ai galuega a le Pulega pe a pasia le tatou Tala Faatatau o le Tupe.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

E sau le faauilavea ua oo mai i taligalu lau Afioga i le Fofoga Fetalai, o taligalu uma o lo o aafia ai auala a le Malo, e aumai le talosaga i le Matagaluega a le LTA. Ae afai o se taligalu e puipuia ai aafiaga o fanua a le mamalu o le atunuu, o na talosaga e tuuina atu i le Matagaluega a le MNRE.

Ua mautinoa o le tele foi o afioaga lau Afioga i le Fetalai, e le gata i Tumua nei, ae faapena foi nisi o afioaga i Salafai, o lo o faaletonu pea le faaooina atu o le auunaga tau le suavai taumafa. O lo o faaauau pea tapenaga ma galuega a le Pulega o le Suavai, e saili ni auala e faataunuu ai le Polokalame mo le faaleleia o le auunaga i le mamalu o le atunuu i afioaga uma o lo o aafia.

Sa fesiligia foi e nisi o sui usufono mamalu le manogi lea ua i totonu o le vaitaumafa, faaoga mai i le chorine treatment. O lo o fesoasoani mai le Ministry of Health e regulate levels o chorine lea e tuuina atu i totonu o tatou faatanoa o lo o tapue ai le suavai taumafa. Ma e leai se mea e faapopoleina ai tatou mai le faamamaina o le suavai ona o le malosi o le manogi. Mo le silafai e lenei Maota, o le chorine treatment e puipuia mai ai le suavai taumafa mai ni siama po o ni germs pei sa faapopoleina ai ni finagalo o nisi sui usufono mamalu e aafia ai le soifua maloloina, ae o le tulaga o le chorine, o le malosi o le vilalau lea i totonu o le tatou vai faamama o le lelei foi lena ma le saogalemu lena o le puipuiiga mai ni faamai. O atunuu uma i fafo o lo o faaogaina lea tulaga ona o le tulaga foi lea e leai se mea e faapopoleina e sefe lava le vilalau lea mo le faaogaina mo suavai taumafa.

Sa fesiligia foi e le sui usufono mamalu mai Vaisigano Nu.1 ni Terms Deposit o lo o lipotia mai Annual Account a le Matagaluega po o le Pulega o Suavai 2015/2016 e \$11miliona ma le \$8miliona. Lau Afioga i le Fofoga Fetalai ua uma foi ona tali faamalamalama i ai le Afioga i le Palemia e faasao ai le sui usufono mamalu, e le o ni Term Deposit tupe ia ae o tupe po o cash flows o lo o faagaioia ai galuega a le Pulega.

O le mea moni lau Afioga i le Fofoga Fetalai, o lo o i ai Term Deposit tai \$87,000.00 ma le \$86,000.00 teu faavaitaimi e faatali ai galuega faatino ma ni poloketi e totogiina atu pe a maea ia galuega faatino. O Retentions mai galuega faatino e totogiina atu pe a mavae se vaitaimi e pei o le 12 masina talu ona maea na faatino ia galuega ma ua lelei atoatoa na faatinoina.

O le mea moni lau Afioga i le Fofoga Fetalai, e le tatau i le Pulega ona teuina faavaitaimi ni Term Deposit ni vaegatupe tetele faapenei ona o le tele o galuega faatino a le Pulega....

Tofa Lopaoo Natanielu Mua: Lau Afioga i le Fofoga Fetalai....

FOFOGA FETALAI: Ia se i tulai mai le sui usufono mo Vaisigano Nu.1.

Tofa Lopaoo Natanielu Mua: Faafetai lava i le Afioga i le Minisita faapea foi le Afioga i le Palemia mo le faamalamalamaina o le mataupu lea, ae e pei o le agaga sa ou fesiligia, o le faaupuga sao lava lea leaga o lea ua uma ona siaki lau transcript, po o le mea ea o fai se faaputugatupe a le Matagaluega o le Vai?

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Ae ou te le i fai atu a mea o la e i ai ni na o lou tali atu o la foi e i ai le interest la e charge i luga o fix deposit. Ae malamalama lelei lau Afioga faafetai foi i le faamalamalamaina, ae o lau lava tilotilo, so o se cash flow lava, e tilotilo lava i le fluctuation e le pei o Matagaluega o Tupe Maua, o isi taimi a le alu le tagata e faigaluega e le maua sana se lafoga, pe le oka mai foi ni oloa mai kamupani i fafo e leai foi ni tiute e maua lau Afioga. Ae o le Matagaluega lea, pe e te mafaufau i ai i le vai pe leai? Masina uma lava e pili, pili lava le vai, so o la e foi e i ai le expectation i masina uma taitasi, e i ai ia pili e le faapea foi e totogia uma foi pili a tagata e i ai tagata e faifaiaga, ae e pei o le agaga lena e avatu ai i se manatu, e tatau lava ona iloa e le Matagaluega a le Vai pe fia a latou e maua mai lea masina, o le a le project e mafai ona momono i totonu i lea taimi ma lea taimi e pei foi o lou itumalo.

O le agaga lena sa faavae atu se manatu, ae faafetai tele o lena na ona toe faamalamalama auiliili atu ma le faaaloalo lava i lau Afioga.

FOFOGA FETALAI: Malo, faafetai, ia se i saunoa mai le Afioga i le Minisita.

Susuga Hon PAPALHITELE NIKO LEE HANG: Faafetai atu i le sui usufono mamalu mo le faauilavea. Leai e ala la ona ou toe taua le mataupu lea lau Afioga ona o lea e faamaumau i au faamaumauga sa fesiligia le tupe lea e \$11miliona ma le \$8miliona. Ia ma lafo mai foi se faaupuga pe o se tupe faavaitaimi e pei ona taua o lea e faamaumau i i, pei la sa tulai mai le Afioga i le Palemia e tali ai e faasao le tulaga lea. Faafetai o la ua malamalama le sui usufono mamalu ona o le tulaga foi lea pei ona ou tautala atu ai, e le taliaina pe le fautuaina le Matagaluega o Pulega o Suavai e teu faavaitaimi ni tupe tetele faapenei ona o le tulaga lea, o lo o tele galuega o lo o tapena aua le faatinoina o galuega faatino aua le auaunaga i le mamalu o le atunuu aemaise le itumalo o le sui usufono, lea foi na tatalo mai i se faamama avega ona o le mai o le suavai, ia o lena foi ua uma ona fai le fesoasoani a le Pulega. Na o le pau lea o le itumalo lau Afioga e afa le latou pili e totogi o le suavai, ona e talafeauga ona e le i atoatoa le suavai taumafa ma le faaaloalo lava.

Ia ona ou oo mai lea lau Afioga i le sui usufono mamalu mai Safata, sa fesiligia le tulaga i le MV Lady Samoa II, o lo o tu tu i Aleipata faapea ua latalata ona goto. Mo le silafia e le sui usufono mamalu o lo o lelei lava le vaavaaiga e le afaigaluega o le tausaiaina o le vaa ina ia aua ne i aafia i se faaletonu e pei ona taua. O lo o faia pea feutagaiga a le tatou kamupani vaa ma nisi o ana paaga i se fuafuaga talafeagai e faagotoina ai le vaa i le moana ma ave ai o se mataaga po o se Dive Site mo tagata tafafao maimoa mai fafo e fiafia i le moulu, se i tulou, o le Scuba Diving.

O le sui usufono mamalu mai Salega Sisifo ma le sui usufono mamalu mai Gagaemauga Nu.3, sa fesiligia galuega e toe faaleleia mo a tatou uafu i Mulifanua ma Salelologa.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Mo le silafia e sui usufono mamalu, o lea ua amata faagasolo fuafuaga uma ua maea faataatitia i totonu o galuega faatino a le tatou Kamupani Vaa mo le Tausaga Faaletupe 2017/2018, ma o lo o aofia ai ni galuega fia faaleleia mo tatou uafu ia i Mulifanua ma Salelologa.

O le sui usufono mamalu mai Faasaleleaga Nu.3, sa talosagaina se isi vaa faaopopo mo Savaii, e pei o le MV Lady Samoa III. Mo le silafia e le sui usufono mamalu o lea ua taoto atu i le Malo o Iapani le tatou talosaga mo se vaa e sui ai le Lady Naomi ona ua faasolosolo ina tuai ma matua lea vaa ua toetiiti atoa le 20 tausaga. O le faamoemoe maualuga o le tatou Kamupani Vaa i le mafai foi e lenei vaa ona fealui i le va o Mulifanua ma Salelologa e fesoasoani i le MV Lady Samoa III pe a talia mai e Iapani le tatou talosaga mo se vaa e sui ai le Lady Naomi e pei ona faatalosagaina e le sui usufono mamalu.

O le sui usufono mamalu mai Faleata Sisifo o lau uo pele i le agaga, sa fesiligia le EPC levy po o le Ecolisation Chart e \$2miliona lea e i totonu o le tatou Tala o le Tupe mo ni revenues faaopopo, pe le ono aafia ai le tau o le eletise i le mamalu o le atunuu. Mo le silafia e le sui usufono mamalu sa ou fesiligia le Matagaluega a o tapena le tatou Budget Estimate 2017/2018 i se aafiaga o le tau o le eletise ona o lenei tau faaopopo mai i le EPC ae tali mai latou e leai.

Sa fesiligia foi e le sui usufono mamalu le tulaga sa faatino ai le galuega o le tatou alalaupapa i Leone e tusa ai ma le faatinoina e le Tender Process ona sa manatu le sui usufono sa faatatau ona faatinoina e se konekarate Samoa po o se Local Contractor. Mo le silafia e le sui usufono mamalu sa faataufo le galuega ma valaaulia ai konekarate Samoa ma konekatate mai fafo ma sa faafoeina i se faiga faapaaga a lo tatou Malo, Malo o Ausetalia ma le World Bank.

E 2 ni konekarate na tusi talosaga mai fafo faapena foi e 2 ni konekarate Samoa sa taufofo i lenei galuega. O le ofo maualalo sa manumalo ai le Kamupani mai Saina o le Chinese Railways. Mo le silafia e le mamalu o le Palemene o le tatou auala lea le auala laupapa i Leone e tatala aloaia nei i le Aso Toonai pe a aulia. O le a afio mai ai le Kovana o Ausetalia, ia o le a faia le tatalaina o le tatou galuega fou ma le Afioga i le Palemia ia pe a aulia le Aso Toonai le aso 1 o Iulai ma e valaauina uma le tatou Palemene, e afio atu e tali ni a outou sua mai le afioaga o le Afioga i le Minisita mo Faamasinoga ma Pulega Tau Faamasinoga.

Ona ou oo mai lea i le mataupu sa laga e le lipoti....

FOFOGA FETALAI: Ua ou manatu e faamalulu atu i le faagasologa maeaea o le saunoaga a lau Afioga i le Minisita mo Galuega, ia ona o lea ua tatou toai taunuu i le tatou malologa masani, ma ou te faasilasila atu o le a faataatiaese Galuega a le tatou Palemene ia mo se tatou malologa puupuu, faafetai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Na faataatiaese Taualumaga a le Fono Aoa mo lana malologa masani i le itula e 10:49 i le taeao ma toe faaauau i le itula e 11:44 i le taeao.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia Taualumaga ma Fonotaga a le Fono Aoa o Faifulafono.

E faia le malologa o lo o saunoa le Afioga i le Minisita mo Galuega, Felauaiga ma Atinae Eeseese. E i ai le manatu se i afio mai le Afioga i le Palemiaí .

Ou te tapa ma le faaaloalo lau Afioga i le Palemia mo sou finagalo i se lafo mo le tatou galuega ona tapa ai lea o le Minisita.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e i ai le taofi, e faamaea i le aso a taeao le tatou Fonotaga. O lona uiga o le a taumafai e faamaea nei le Tala Faatatau Autu o le Tupe, a totoe ai se mea, o lona uiga o taeao, ona tatou malolo ai lea i le aso a taeao ona toe amata ai foi lea o le Fonotaga i le Aso Gafua. Ma o le faamoemoe se i maua se avanoa o sui usufono e silasila ai i a latou Tulafono ma o e kolenileni foi lele ia maua le malosi aua le tapuaiga a le tatou Manu Samoa lea o le a fetai i le Aso Faraile nei ma Tonga. E faapena le mea, e pei lava o mea foi nei o maitaga o la e feagai ma le fafine ae faaletonu atu ai foi ma le toeaina ia. A lava a le tatou koloni, ua lelei foi le tatou au.

FOFOGA FETALAI: Malo faafetai. Masalo o lea ua saunoa le Afioga i le Palemia i le tulaga o le faagasologa o tatou galuega. Ona i ai lea o le manatu, o le a faagasolo faapena ma le faamoemoe i le aso a taeao o le a faapena ona faataunuu ai le finagalo o le Palemia. Masalo foi faatoa faatu ai tatou se tatou lafo, a o lea ua faaila le finagalo o le Afioga i le Palemia i le faagasologa o le tatou galuega.

Ou te tapa ma le faaaloalo lau Afioga i le Minisita mo Galuega, Felauaiga ma Atinae Eeseese.

Susuga Hon PAPALIITELE NIKO LEE HANG: Faafetai mo le avanoa e faaauau ai foi se faamatalaga i le folasaga toetiiti maea. E manatu foi ua sao i alo le taligasua i lau Afioga aua se faasiliga malosi aemaise le paia o le Palemene e faaauau ai le tatou Fonotaga i lenei aso.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga i le Fofoga Fetalai e i ai si mataupu lea sa pau i lau folasaga, o le mataupu lea e aafia ai fanua umia saoloto e tai sefulu ma tai 20eka e vaevaeaina pe subdivide e le ona nei fanua ona faatau atu lea pe tai ¼eka pe ½eka i le mamalu o le atunuu. A o le popolega lau Afioga, ua maea ona faatino nisi, aemaise lava o talosaga mo auala. E i ai la nai subdivision lea ua talosaga mai foi i ni auala, a o lalo o le Tulafono o gaoioiga ia a le ona le fanua ina ia maotino e i ai access roads i totonu o le subdivision, aemaise ia i ai le laina o le suavai taumafa faapena foi le laina o le malosiaga faaeletise. Ae ona e taua le tulaga lea ina ia faamanatu atu i le mamalu o le atunuu o lo o taumafai e faatau ni o latou fanua mai ni subdivisions, e tatau ona fesiligia le ona le fanua po o i ai uma utilities ia po o auaunaga ia ona e i ai le talitonuga e tatau i le ona le fanua ona tuu uma le tau o mea nei i totonu o le fanua a o le i faatauina lona fanua.

O le tulaga lea e aliali mai i tatou auala ia e i Falelauniu ma tulaga faapena, ona o le tulaga foi lea sa faatau ai e le SLC ma fai e latou auala. Ae peitai ane, ua leaga ma malepelepe uma nei auala. E i ai lava lou talitonuga o auala uma nei a le Malo pe a faapea ua faaaogaina e le mamalu o le atunuu i ni taavale. O le tulaga la lea ua tatau ai i le Pulega o le LTA ona tapena le faaleleia o nei auala, ona pei o le feeseeseaiga sa i ai ona faapea le LTA, sa tatau pea ona o le SLC e faaleleia tatou auala, peitai ane, o le tulaga lena i lou talitonuga e tatau ona i ai. O a uma lava ni auala ua mafai ona faatino i le tulaga lea sa fai mai subdivisions ona ua maitauina ua uia auala e taavale a le mamalu o le atunuu, ou te talitonu o le galuega lea a le Malo o le faagaoioi loa ma faatino ni public roads ma agai i ai le faatinoina o le faaleleia o nei auala. Ae ona o le tulaga lea ua aliali mai lata mai nei i subdivisions nei ua fai, a o lea foi ua oo mai i le Matagaluega o ni talosaga mo ni auala.

E pei o le faasilasilaga lena mo le silafia e le Palemene, aemaise foi o le mamalu o le atunuu o lo o aafia i lenei tulaga. Masalo pe se i uma se 10 tausaga o faagaoioi pea le tou auala lena, ona mafaufau foi lea o le Malo po o ai e tulai mai e fesoasoani e faalelei le tou auala, a o le taimi lenei, ou te iloa e le mafai ona faagasolo atu i ai ni galuega mo le faia o ni auala fou mai subdivisions fou ona o lea e ave le faamuamua i le tele o tatou auala, public roads, aemaise foi le talosaga a sui usufono mamalu ma le Palemene i ni auala galue. E pei o le mea lena e ave ai le faamuamua ma le faataua, a o ni talosaga faapea, o lena e i ai le Tulafono e puipui ai foi le mamalu o le atunuu o lo o faataua fanua faapea, ina ia tapa se faamaoniga mai le owner o le fanua e faatino e latou auala, o laina eletise faapena foi ma le suavai taumafa.

Lau Afioga i le Fofoga Fetalai, ona ou oo mai ai lea i ni mataupu sa laga mai i le Lipoti a le Komiti o Tupe Maua ma Tupe Totogi ou te fia tautala i ai lau Afiogaí .

FOFOGA FETALAI: Malie lau Afioga i le Minisita o lo o tulai mai le sui usufono mamalu mo Anoamaa Sisifo.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Tofa Hon Lauofo Fonotoe Nuafesili Pierre Lauofo (Anoamaa Sisifo): Lau Afioga i le Fofoga Fetalai, faafetai mo le avanoa. Ona o lea ua maua atu o le a see ese le Afioga i le Minisita ma mea o auala ia a le Malo po o public roads, ona o lea sa ou taua faapitoa le auala lea agai i Sauniatu. O lou talitonuga o le public road le auala lea. E pei ona ou taua i lau lauga, sa faapena ona ou talatalanoa pea ia i latou sa tapenaina le faatinoga o le galuega lea, o le latou tala ia te au toe lava o le faasalalau pei ona ou taua i lau lauga. O lea la e fesili atu ai i lau Afioga, po o le a se tulaga tonu lava ua i ai le auala lea pe oo ona fai pe ua i ai se isi fuafuaga. Faafetai.

FOFOGA FETALAI: Malo. Mo le faasaoina o le taimi o lau Afioga i le Minisita se i tuu atu le avanoa i le sui usufono mamalu mo Anoamaa i Sasae.

Afioga Alaiasa Muagututia Moefaauro Malagaitutogiai Sepulona Moananu (Anoamaa Sasae): Faafetai i lau Afioga i le Fofoga Fetalai. O lea ua maua atu ua maea ona faataatia le alafua fou lea o auala galue pei ona saunoa i ai le Afioga i le Minisita o le a toe faaoga le mea o le scoria e ono sefe ai tupe a le tatou Malo ma faatele ai auala e fai. Ae pei ona tatalo atu auala galue o lenei itumalo, ua faaitualalua maota ma laoa o le afioaga i le alu i uta. Ia pe a pe a faapea na ona tuutuu atu, ae a pe a faata pea le mea e i ai laoa ma maota mo le sefeina foi o le tulaga o le pefu se i tulou le faafofogaaga a le atunuu. E pei na o le pau lea o se talosaga vaivai. Ma lou faaaloalo.

FOFOGA FETALAI: Malo faafetai. Se i tuu atu lava le avanoa i le sui usufono mo Itumalo Tu Taulaga i Sisifo, tulai maia lau Afioga Faumuina.

Afioga Faumuina Asi Pauli Wayne Fong: Faafetai i lau Afioga i le Fofoga Fetalai, faafetai foi i lau Afioga i le Minisita o lea ua maua tonu mai lava le autu o le tulaga lea i auala i Falelauniu, ae tatalo atu la i lau Afioga i le Minisita i le tulaga lea o auala i Moamoa, e pei ona silafia, o subdivisions o subdivisions a le Ekalesia Katoliko. O le tele o auala na e i ina e le i ai ni auala ua fausia. O lea la e fia malamalama le sui usufono faamolemole lau Afioga, po o le a la le tulaga e oo i ai fanua ma subdivisions ia ua uma ona nofoia e le mamalu o le atunuu, pe o la le Katoliko e toe fai auala, pe o lea o le a tuu atu loa i le Malo ina ia latou faia auala ia ma faaleleia loa. E le gata foi i lea, o lo o i ai le auala a le Malo e alu atu sao i i tau i luga i Malololelei, po o le a se finagalo o lau Afioga, ae aveifo loa ma lena polokalame ina ia faataatia ai aua foi se isi auala ui mo le agai i luga i Malololelei aemaise foi tulaga i Siumu ma le atu Safata ma le atu Falealili. Ma lou faaaloalo lava. Faafetai.

FOFOGA FETALAI: Pe i ai se isi faauilavea? Tulai mai le sui usufono mo Faasaleleaga Nu.2.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Afioga Pau Sefo Taumata Pau (Faasaleleaga Nu.2): Faafetai mo le avanoa ua tuuina mai. O lea e maua atu o le a laaloa le saunoaga a le Afioga i le Minisita a o lo o faalogologo mai lou itumalo. O lea sa taua i lau lauga e le o ni talosaga fou i le Paeaiga lenei, leai, o talosaga o le fa lenei o Paeaiga ma ol o o faatalitali mai si o matou itumalo. O lea foi sa fetuunai ma le Afioga i le Minisita, sa ou oo foi i le weekend ma ou savalivali i lea pitonuu ma lea pitonuu, sauni a uma le Tala o le Tupe ona alu atu loa lea o se ma asiasiga ma le Minisita. Na pau la lea o le mea ou te fia fesili ai i le Afioga i le Minisita po ua sauni ona o lo o faafofoga mai lou itumalo ina ia faaoo talosaga nei ae le o ni talosaga fou ae tatau foi ona faamuamua talosaga a lenei itumalo ua fa Paeaiga. O lona uiga o lea o le a 20 tausaga. A o talosaga uma nei o talosaga fou mea ia. O le mea lea faamolemole le Afioga i le Minisita, ua le toe i ai lava ma se isi o la e ua tafale uma tagata ae se i faalogologo mai, se i tali mai, sauni a uma le Tala o le Tupe o le a malolo, o le a matou malaga atu ma le Afioga i le Minisita ma le Minisita Lagolago lau Afioga.

FOFOGA FETALAI: Malie le Afioga i le Minisita, se i saunoa ia ona ua faofale le itumalo e faalogologo mai le Fono.

Susuga Hon PAPALHITELE NIKO LEE HANG: Lau Afioga i le Fofoga Fetalai e fai lava sina faanoanoa i mataupu ia ua toe lagalaga mai ai finagalo o sui usfuono mamalu. O lea ua oo lau lauga i le tulaga o le Lipoti a le Komiti o Tupe Maua ma Tupe Totogi a o lea ua toe lagalaga mai ona o se manatu sa tuuina atu i mea nei o access roads i fanua vaevaeina po o subdivisions, ae o le a le afaina lea tulaga.

Mo le auala o le Tofa ia Fonotoe, o la e foi ua i ai le tusi talosaga i lou ofisa, ua uma foi ona ma talanoa ma le sui usufono i le fund lea a le AF lea o lo o faaagaaga se vaega o lenei fund mo le auala lea i Sauniatu ma le auala lea i Fagaloa lea ou te tauina soo lava i lau lauga. Ma o lea la ou te faamauina i le polokalame a le Matagaluega po o le Pulega, a maea loa ona pasia le tatou Tala o le Tupe ona toe agai lea o le Pulega e asiasi ma faamautu tulaga o tapenaga. E taua le auala lea i Sauniatu ona o le Ekalesia Mamona la e na alu le matou asiasiga ua fai lava si leaga o le auala, ma ua tele foi tausaga e leai se maintenance na faia i lea auala. Ma ou te talitonu e tatau ona ave i ai se faamuamua i lea auala ona o le Ekalesia Mamona ma le aoga ma tulaga foi faapena, aemaise foi o le mamalu o le atunuu o lo o alaala ma papaaao i lea pito o le afioaga.

Ona oo mai lea i le sui usufono mo Anoamaa Sasae, o lea foi ua taatia i le polokalame le tulaga o le auala lea ua talosagaina e le sui usfuono ma ua uma foi ona ma talanoa. Ae tau ina ou faamanatu atu i a outou Afioga, o lea ua uma ona ou talanoa atu muamua, o lea ua faamaumau uma lava a outou talosaga. Ae a faapena le tutulai mai ma faalavelave, ia o le a toe aveese ma le lisi o talosaga, ae faafetai i lau Afiogaí E talosaga o le auala i le afioaga lea, e leai ma se auala na faia muamua, ma o le ala foi lea na fai ai foi le tapenagaí

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O auala faapenei, o lea ou te faamoemoe e ave i ai le faamuamua, auala nei e le i faia muamua, o auala ia ua matua malepelepe lava, se i tulou, o le tulaga lena, ae lafo maia. O le fa lenei o tausaga o lau Paeaiga i totonu o le Palemene, o le tolu o Paeaiga sa ou talosaga lava i le 15 tausaga mo ni auala galue. E oo mai lava i le aso e leai ni auala galue, a o lea lava ou te malo i le palota. Aua ne i ave mea nei o auala galue tatou te faamoemoe tatou te toe omai ai i le Palemene, ae onosai ma tapuai mai, o lea o le a faaso le tupe le auau lea na maua mai le tatou Tala o le Tupe se i faaso. A le oo atu le faasologa i lenei tausaga, o le tausaga lea a sau, o le isi foi lena tausaga seia maea lava le tatou Paeaiga ma fuafuaga fou lea e fautua mai ai a outou Afioga e faatno ai le tatou galuega, ou te talitonu o le a maea uma tatou galuega ia pe a maea le tatou Paeaiga. Ae o le mataupu lea i lou usoí .

Afioga Alaiasa Muagututia Moefaaou Malagaitutogiai Sepulona Moananu: Lau Afioga i le Fofoga Fetalai, ou te maitau atu ua tau afaina le finagalo o le Minisita i sa matou tala, ia na o le matou oloolomaa lava i le tulaga ona o lea sa maua le faiga faavae fou, ae ui i lea, o lea ua tali mai. Faafetai i le uso a Minisita i le agalelei foi i lenei itumalo. Ia faamanuia i ou faiva.

FOFOGA FETALAI: Tulai mai lau Afioga i le Minisita.

Susuga Hon PAPALIITELE NIKO LEE HANG: Faafetai i lau Afioga i le Minisita. E faamalulu atu i lou uso a sui usufono mo Anoamaa Sasae, o le tapenaga lena. A faapea o lou auala lea faatoa fai i se taimi muamua, a silasila foi le mamalu o le Pulega e toatele le mamalu o le atunuu o lo o affio ma papaaao ai, ia e tatau ona faata se mita e tasi po o se lua ona faaauau lea o le scoria agai i tua e amata ai le tatou galuega. A oo mai foi le Tala o le Tupe i le isi tausaga, a faapea o la e faateleina lava le tuputupu o le mamalu o le atunuu i le afioaga, e faapena foi ona toe faaauau atu le ta. O le faasolosologa lena o le tatou galuega ina ia uma le tatou Paeaiga ua faamanuiaina uma afioaga lea e tatalo mai ai sui usufono mo ni auala galue.

Ona oo mai ai lea o se faamatalaga i lou uso a sui usufono mo le Itumalo Tu Taulaga i Sisifo, e leai, ona ou te talitonu o subdivision nei a le ekalesia ua leva ona fai, ma na alu foi lau asiasiga i lau talosaga na tuuina mai muamua, na maitauina ai foi le faaletonu o auala, a o le tele o le mamalu o le atunuu o lo o affio ma papaaao i ia vaega o le tatou atunuu. Ae tuu maia le faatuatuaga e le i faia Roma i se aso e tasi, ae faafetai le onosai.

Ia lau Afioga i le Fofoga Fetalai ona ou oo mai lea i le mataupu lea sa laga mai i le Lipoti o ni mataupu o le Komiti a Tupe Maua ma Tupe Totogi ou te fia tautala i ai ona o le taua lau Afioga. Sa taua i le lipoti le Parking Fee e \$40 o lo o i totonu o tupe totogi mo laisene o taavale. E manatu le Komiti e le talafeagai ona o ni mafuaaga o taua i totonu o le latou lipoti, ma o se manatu foi lea i lou nei sui usufono e lagolago ai le manatu o le Komiti ma o le a silasila totoa i ai le Pulega i lea tulaga.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga i le Fofoga Fetalai o lo o tapena nei e le Pulega o le LTA se fuafuaga mo ni tatou parking meters mo tatou Public Parking i totonu o le taulaga e fesoasoani e tau faafoia lenei faaletonu po o se faaifitauli e tusa ai ma le lipoti a le Komiti.

O le isi mataupu lau Afioga o lo o taua i le lipoti o le feteenaiga lea i le va o Leoleo Malu ma Leoleo Traffic Officers a le LTA i le faatinoina lea o le galuega e vaavaaia ai pe monitor, e monitor ai minor traffic offences lea e manaomia ai le totogiina ni Instant Fines. O lo o manino lava i lalo o le Tulafono a le LTA, e aoina e le LTA ia Instant Fines, ae le o le Matagaluega o Leoleo. E faatino e le Matagaluega o le Malu o le Malo ia le galuega, e molia ai ia soligatulafono mama ia, a o le iuga o nei faasalaga, e tatau ona totogiina mai i le Matagaluega po o le Pulega a le LTA.

Lau Afioga i le Fofoga Fetalai ou te iloa...

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai....

FOFOGA FETALAI: Ia malie le Afioga i le Minisita, se i tulai mai le sui o Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai faafetai i le saunoaga manino a le Afioga i le Minisita, E lua vaega ua taua, a silasila i a matou fautuaga na e avatu, o lea e le o tuuina atu ai vaega ia ae faafetai o lea ua silasila lau Afioga i le tulaga o mea ia ma Matagaluega ma le LTA . O le mea muamua sa laga ai le \$40 o le parking fee i taavale uma lava ona e i ai ia faleoloa, ma isi Matagaluega a le Malo o la latou te polokaina car parker ia i luga o le aualatele, ae ua uma ona totogi e tagata feoai le \$40.

O le vaega e uiga i le Tulafono a Leoleo, ia o le LTA e fou nei, ua uma ona fai ona Tulafono fou ma o lea e sao lelei lau saunoaga. Ae o le faalavelave lea e silasila i ai le Komiti o Tupe Maua ma Tupe Totogi, o le tele o leoleo, o lea e totogi i lalo o le Paketi a le Malo ae leai se mea o maua ai. O le faalavelave o le Tulafono lea mai le amataga a Leoleo e le i faia i ai se teuteuga. O le mea foi lena o lea e fautua ai ia Tupe Maua ma Tupe Totogi, o le a se auala e toe maua ai se tupe a le Malo i le afaigaluega lea e faaogaina e le Matagaluega a le Malo, aua o se tupe o lo o alu ai. Ma e o le taimi faigata lea, ona e 24 hours e tiute ai leoleo, pei o le vaega lea la e vaavaai i ai le Matagaluega o Leoleo, ia ma fesoasoani ai foi le Komiti i ni auala e faafealofani ai ia Tulafono nei, ina ia pau tonu lava fuiniu i le lapalapa, aua e le faaogaina ia tatou tupe, ina ia benefit ai nisi ma o le LTA is a Trading Body, o lea o lo o galue faapisinisi, ia ao lea o lo o avatu tupe o lo o maua e le Matagaluega o Leoleo e faatumu ai ini vaega o lo o manaomia e latou. O le mea lelei, ae tatau ona faafealofani ia Tulafono e lua, ma lou faaaloalo lava.

FOFOGA FETALAI: Malo, faafetai, tulai mai lau Afioga i le Minisita.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Susuga Hon PAPALIITELE NIKO LEE HANG: Ia faafetai i le faauilavea a le sui usufono mamalu, ma ou te talitonu e taua foi le fautuaga lenei ina ia faafealofani ia Matagaluega ia e lua, ona o le tulaga lea ua aliaie mai i le faatinoina o tiute ma galuega e pei ua le fealofani.

Ae lau Afioga i le Fofoga Fetalai, ou te iloa e patino leoleo po o malu o le Malo latou te suesueina ma molia ni soligatulafono e mafua mai i ni faalavelave tau taavale, o car accidents. Ae o faasalaga uma tau tupe mai ia soligatulafono matuia, serious offences e aoina lea e le Ofisa o Faamasinoga, pei ona saunoa le Afioga i le sui usufono, pei o le tulaga lea e tatau ona toe faamanatu le Tulafono ma toe faatalatalanoa i le Ofisa o Leoleo ma le LTA i le tulaga e faatino ai le galuega lea ina ia felagolagomai, ona o le popolega lau Afioga, ua maitauina, le le lagolagosua o le Malu o le Malo, e faatino o latou tiute e molia ai minor traffic offences e totogi mai ai Instant Fines i le LTA, ona o se mau sese, faapea mai, ona o tupe maua e maua e le LTA ae le o latou. Ou te manatu e tatau ona faasao lea ituaiga attitude, ona o Tupe Maua uma lava e le Malo, pe aoina e le LTA, pe aoina e le Matagaluega o Leoleo, the Revenue Collection will end up in the Government's purse.

O le tulaga la lea e toe faamamafa ai foi le toe feutagai ai le Matagaluega a Leoleo ma le Pulega a le LTA, o le tulaga lea ina ia soalaupule ia ma faatino ia le tulaga e ala i le solitulafono. E taua le aoina pea e le LTA ona o le tele o tupe moomia, mo le faaleleiina o le tele o tatou auala ae tatau pea la ona faagai o le LTA ia faasalaga ia ma ao mai e le Pulega ia faasalaga aua ia ni tupe aua foi le faaleleiina o le auala, e tele auala, ae le o lava se seleni o maua mai i le Tala Faatatau o le Tupe.

Lau Afioga i le Fofoga Fetalai ou te manatu ua faamalieina le finagalo o ia le sui mamalu, i tali ua tuuina atu ma ua maea ai ma lau folasaga. Ia agalelei ma i le Atua ia maua pea lou soifua laulelei.

Tofa Nafaitoa Talaimanu Ketii (Gagaemauga Nu.3): Lau Afioga i le Fofoga Fetalai....

FOFOGA FETALAI: Malie e faigata le, ia se i tulai mai le sui usufono mo Safata.

Afioga Leana Ronnie Posini: Faafetai tele i lau Afioga i le Fofoga Fetalai, o lea ua maitau atu ua tau faamaea mai le saunoaga a le Afioga a le Minisita. Faafetai tele i lau Afioga i le Minisita, pau lava lea o sina mataupu sa laga i lau lauga lau Afioga o le mataupu lea mo tatou taavale lau pasese foi ia i tulaga tau laei la e faaaogaina e tatou ave taavale e pei ona ou taua i le taeao lea na taunuu mai ai le meli, ae ou vaaia ma le faanoanoa ia laei e faaoga e tatou avetaavale. O nai mea iti lava ia aua e atagia ai lo tatou atunuu. Po o i ai se faiga faavae a le LTA i tulaga ia o laei o tatou avetaavale ia lau pasese ma le agaga faaloalo.

FOFOGA FETALAI: Tulai mai le Minisita.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Susuga Hon PAPALIITELE NIKO LEE HANG: Ia e faamalulu atu i le sui usufono mamalu ia e sao sa laga i lana lauga le tulaga lea o toniga o tatou avetaavale taxi. E taua le fautuaga a peitai ane e leai se Tulafono a le LTA e faamalosi ai lea tulaga, na o fautuaga nei faatino le tulaga lea aua le silasila mai o tagata tafafao maimoa mai fafo aemaise foi o le mamalu o le atunuu e tatau ona laei mama, fai se laei mama a faatoniga manaia foi, ae taatia mai le finagalo sei toe talanoa ma le LTA, pe i ai se Tulafono e toe faamamafa ai lea tulaga ina ia faapena ona tutusa uma tagata o le mamalu o le atunuu o lo o faia lea galuega o le ave taxi.

Ia lau Afioga ona ua faamaea atu lau folasaga ia o le tatalo ia agalelei mai le Atua

FOFOGA FETALAI: Malie lau Afioga masalo e toe pau lea, se i tulai mai le Afioga i le Sui Fofoga Fetalai.

Tofa Nafaitoa Talaimanu Ketii: Faafetai i lau Afioga i le Fofoga Fetalai mo le avanoa, manatu o lea lava ua toe o se aga ona faamaea lea o le saunoaga matagofie a le Afioga i le Minisita. Malo le onosai, faalogologo lava ma le totoai i le vaega tonu lea ua oo i ai lau saunoaga, ia ua taliga lava tuliau ae logologo pualilo nai olo, i le folasaga manino ma le malamalama, o le mea lea malo faafetai, pau lava lea faaopoopo atu i le fesili a le sui usufono mamalu, sina vaega lava lea i ave taxi, masalo o lea sa pasia foi le Tulafono i mea tau taxi stand.

O le mea lea e maitauina, e jam ai le traffic i totonu o le taulaga. Pei o le agaga maualuga lea sa faatino ai le mea lea e le LTA, ina ia tutu tatou taavale laupasese laiti ia ia taxi stand ia ma agai ai e feaveai ia le mamalu o le atunuu o moomia le auaunaga. Peitai, a silasila i totonu o le taulaga, ua oo lava i Private Parking Area, o lea e pei ua dominate e taxi, ua le o i stands, a silasila i autafa o fea le stand e sau ai oe, o la lava e manino lava le mata o le vai. Leai e na o ni fautuaga e faapena leaga e ina ia fai ni ai o lea faamoemoe sa mafai ai ona tusia ia igoa e tu ai i o. Ua tele tele taavale i totonu o le atunuu, e pei o le agaga lena sa fau ai le faamoemoe lea.

Lua lau Afioga i le Fofoga Fetalai, e tau matamuli lava se faamatalaga e talanoa i le vala lea sa saunoa i ai lau Afioga i le Minisita, e pei o upu o la e faaogaina ai i totonu, le 1 fealofani o le Matagaluega o Leoleo ma le LTA i le faatinoga o le galuega ae auga e tasi le mauga i olo. O lea e ao tupe aua ni tupe e atinae ai le Malo, e sao lelei, peitai, o faaupuga ae o le faatinoga, e le o o gatasi i lau vaai aua sa ou galue ai foi.

E leai se mea e le o fealofani ai le aufaigaluega, o la e lelei, na pau lava lea o tatou Tulafono faamolemole se i toe tagai i ai le Law Reform Commission i le tulaga o le faapaleniina aemaise foi le Afioga i le Loia Sili i le tulaga o le ofoina o le auaunaga o fea e gata ai lea vaega ma lea vaega, ina ia maiio tiute lea sa tau faamatala i le faiga o suesuega i le Serious Accidents, Car Accidents.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Ia e pei o le matafai oi lena a leoleo, directing o le traffic, ia ma minor traffic offenses pei o iina o le matafai oi lea a le tatou LTA, ae i lau fautuaga, ia e pei o le mea la e atugalua ai le Ofisa Sili le Afioga i le Komesina ma le Pulega, o le tulaga foi lea pe a faatalanoa le Tala o le Tupe, ia o lea e fesiligia ai, o le a le tou mea la e fai o lea ua pau tele outou i le mea lea. E tatau ona i ai ni tou collections ia areas ia targets ua uma ona faataoto mai i lea Matagaluega ma lea Matagaluega. Na ona tau faataoto atu faapena, o le mea lena o la e atugalua ai le tofa a le Afioga i le Komesina ma le Pulega, ia e tatau foi la ona o mai lea vaega lea se i tau tuli ai targets ia e manaomia i le Tala o le Tupe ia ma mea uma ia e moomia e le Ofisa o Tupe.

Pei o nai vala laiti ia i le auaunaga ma le faatinoga e i ai foi KPIs ma mea uma faapena ma mea o Corporate Plan a Matagaluega o la e tau tuli ia latou e fia ausia foi mea ia, ina ia mafai ona silasila atu ia le Ofisa Autu o le Tupe, lea e latou te ausia ia vaega ia na tuu i ai i le tausaga ua mavae. Ae o le faatinoga o le auaunaga ou te talitonu lava e malie lau Afioga ma le paia o le Malo, aveese ia upu o le le fealofani. O lou lava talitonuga ona sa ou galue ai i le 35 tausaga, leai o lea faatoa tu mai le LTA lea lava e galulue tama fanau uma a le atunuu ma le faaloalo.

Susuga Hon PAPALIITELE NIKO LEE HANG: Faafetai mo le faauilavea a le sui usufono mamalu, ae o le tatalo i lau Afioga i le Fofoga Fetalai, a i ai se isi fauilavea e tulai mai se faamolemole faanofo i lalo. O lea o le a tau faamaea atu le lauga ua tatau ona pasia le Tala o le Tupe ae faalavelave soo mai.

Lau Afioga, ou te maitauina le sui usufono mamalu lea, ua leva ona auauna i le Matagaluega o Leoleo ma e tele foi sana fautuaga e talia, ae lea ua avatu lou manatu, toe galulue e le o le fealofani le upu, felagolagomai, aua ou te leiloa po o le a uiga o le fealofani ae o le felagolagomai o le galulue faatasi. O lea la lau Afioga, ma e te le i lauga foi i lea mataupu. Na taatia le lipoti a le Komiti o Tupe sa tatau ona e laga ona o oe na aafia i le galuega a leoleo, ma aumai ni au fautuaga lea e taatia manaia fautuaga ae taatia mai au fautuaga sei soalaupule i le Ofisa o le Matagaluega o Leoleo leaga o lena ua e out ma le maafala. Ia ma le pulega a le LTA e faatatau

Tofa Nafotoa Talaimanu Ketii: Lau Afioga i le Fofoga Fetalai....

Susuga Hon PAPALIITELE NIKO LEE HANG: Faanofo i lalo faamolemole lava.

Afioga Hon Faumuina Tiatia Faolatane Liuga: Lau Afioga i le Fofoga Fetalai, ona o au lea na taua le upu lea faafealofani, ou te le i refer i tagata na ou refer i Tulafono o lea e faagaioi ai ia Matagaluega o Leoleo ma le LTA. Ia harmonise these legislations ona fealofani lea ma malamalama ai lea po o fea e falala ai lea mea, ae o fea le falala ai lea mea ma lou faaloalo lava.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

FOFOGA FETALAI: Faafetai, faafetai lava. E le toe faatagaina se faauilavea leaga o lea ua saunoa le Afioga ma o le faauilavea mulimuli lea leaga e faigata le aumatutua o lea itu o le Maota.

Susuga Hon PAPALIITELE NIKO LEE HANG: Faafetai i lau Afioga i le Fofoga Fetalai, e taua tele le finagalo lea ma o le saunoaga lea a le Afioga i le sui usufono e toe faamanatu i le Afioga i le sui usufono mamalu lea na laga le faasolitulafono lenei mataupu, o le fealofani lea, o le fealofaniga i le Tulafono, ae le o tagata faigaluega e pei o le agaga lea o le saunoaga ma ou te talia foi le fautuaga mulimuli lea.

Lau Afioga ua leva ona tatau ona maea lenei folasaga puupuu ia ae o le tele o faauilavea lea ua toe poloka ai le galuega. Ae ia agalelei mai le Atua i lau Afioga. Maua pea lou soifua laulelei aua lou feagai ai ma le taitaiina o le Fonousu a Samoa. Faamanuia foi le Atua i lau Afioga i le Tama o le atunuu lau Afioga i le Palemia, faapea le mamalu o le Kapeneta Minisita lagolago ma sui usufono mamalu uma o le Palemene. Soifua and God bless, faafetai.

FOFOGA FETALAI: Malo faafetai. E le faigofie le tiute, faiva alofilima o lau Afioga i le Minisita mo Galuega ma Atinae Eseese a le Malo, malo faafetai. Ua oo mai le faasologa i le Afioga i le Minisita mo Faalapotopotoga o Tagata Tafafao Maimoa mai Fafo. Ou te fautua atu e le toe talia se faauilavea i saunoaga a le Minisita lea, ae tulai mai lau Afioga i le Minisita.

Afioga Hon SALA FATA PINATI (Minisita mo Faalapotopotoga o Tagata Maimoa mai Fafo): Faafetai atu i lau Afioga, o lea ou te manatu o lea ua e faaauau ia te au i le itula o le aso, ou te manatu ua talafeauga lava ma le tulaga o le aso. Silasila foi o lea o le a atoa le tolu o aso o le Tala o le Tupe ao lea e le i pasia lava.

Lau Afioga e momoli atu le agaga faafetai. Faafetai mo le valaauliaina o lou nei tagata e fai ma sui o le Matagaluega o Tagata Tafafao mai Fafo e fai se leo e tusa ai ma lenei Tulafono aemaise le Tala o le Tupe o lo o faapea ona opea i le Maota.

Lau Afioga o le a ou le oo lava i paia o Samoa, o paia sausaugata mai le amataga seia oo lava i le gataaga. Ae talu ai ona o le taimi o le a a faapea ona tuutuuloa lou nei sa se i tali atu e tusa ai ma saunoaga sa faapea ona saunoa i ai nisi o sui usufono.

Lau Afioga e le tele ni saunoaga na afea ai lenei vaega o le Matagaluega o lo o faapea ona ou vaai. O le saunoaga muamua lava a Palauli le Falefa na taua ai le faatupulaia o tagata o le atunuu population. Mo le silafia e leai lava se mea po o se lipoti po o ni tala tusitusia sese i totonu o le Maota lenei. Ua uma foi ona fesiligia e le Kapeneta le Afioga a le Palemia ma le Kapeneta ia faamaumauga e tusa ai ma le lipoti na aumai i le 100,097 o le faitau aofai o tagata soifua i Samoa. Ma o le tali, ou te faafetai i le Atua i Lana pule faasoa o le Atua e pulepuletetele Na te silafia mea e aoga ma ua alagata i lea taimi i lea taimi.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Afai ua pau le fuainumera o tatou tagata ona manatu lea atonu e le o le finagalo o le Atua ia faatupulaia i se numera tauaofai tele. Ae ia aumai se fuainumera ina ia talafeauga ma le tamaoaiga o Samoa. Lau Afioga i le sui usufono mo Palauli le Falefa, o lea le isi vaega ou te iloa ua aafia tele ai ia le faatuputupulaia o le aofai o tagata soifua, ona o le toatele o tagata sa failalaga atu i fafo. O le tala mai ia te au, a faapea ua fai le faitauga aofai o tatou tagata, ae ua i ai se toafia afe o tatou tagata sa malaga atu i Niu Sila Ausetalia ma Amerika, e le aafia ai la i le taimi lea e fai ai le tau aofai o tatou tagata. O lona uiga, a tatou faaupu i se isi itu, e i ai le plus ae leai se minus. A o le plus la e le o mailoa se i vagana ua toe foi mai le aofai o i latou sa tuua le atunuu nei, ona taatia ai lea o le aofaiga o tagata soifua i se tulaga maopoopo ma le tonu. O lea ou te faamalulu atu ai, afai ua le tau foi i se tulaga e pei ona i ai ia lea vaega, o lea lava e taumafai atu lava e tuu atu na o mea moni.

Afioga Hon Faumuina Tiatia Faaolatane Liuga: Lau Afioga i le Fofoga Fetalai .

FOFOGA FETALAI: Se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Leaga o lea ua saunoa le Afioga i le Minisita i le avatu o mea moni. Ma e o mea moni o mea foi ia e aumai i le Matagaluega o le Soifua Maloloina po o le auunaga faasoifua maloloina, e 5,000 pepe fou e le o aofia ai pepe e fananau i tua. O le Ofisa o le Palemia e 1,100 tagata e o i le Quota, o tagata maliliu e 500 fai mai ai le Matagaluega a le Soifua Maloloina, ae na matou tuuina i ai le 1,000 ina ia aofia ai ma tagata o lo o maliliu i nuu i tua e le o i totonu o le falemai ma le 500 o tagata i le mea tonu lava lea e te saunoa i ai, ona aveese lea totoe ai le 2400 i tausaga taitasi. A faatele la le 200 i tausaga e 5 ona maua ai lea o le 12,000. I le lima ia tusigaigoa ua tea faatele i le 12,000 e 60,000 le net growth i tausaga uma e 25. Leaga o lea ua e saunoa i mea faamaonia. E mafai ona aumai faamaumauga o faatalanoaga, ana fesiligia foi le CEO o lau Matagaluega pe faamaonia nei figures e tau atu. O le tali, ioe. Ma lou faaaloalo lava.

FOFOGA FETALAI: Malo. Se i tulai mai le Afioga i le Minisita mo Tagata Maimoa mai Fafo.

Afioga Hon SALA FATA PINATI: E le finauaia ia le faatofalaiga a le tama. E matua le toaina ia te au, ou te le iloa pe ou te matua ai pe matua ai lana Afioga ia te au. Ae faafetai o lea o le a ou faamaua i i. O lona uiga a faaletonu le matou CEO, o le a la le mea e tatau ona fai? O le one two loa a? Ae faafetai tele lava. E le finauaia lea vaega, ae o le tofa faatupu ma le tulaga lea, ia lafo maia lou faatuatuaga ia te au faafetai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Ona ou oo mai ai lea i faasalalauga po o tulaga foi lea o le maketiina o tatou tagata mai fafo. E muamua lava ona ou faasilasila atu e le o toe na ma le laina i le paia o le Maota. O lo o i ai la tatou Manu Samoa. O le tausaga lea sa ave ai le au tele foi lea the First World Cup lea na i ai le tama tautaua lea lea ua Minisita mo Aoga, o le au lena ou te iloa ana faapea ana le sesela ia tama, e le gata i le faiaina o Ausetalia ae faiaina ai foi Aferika. Ae na faafetai na malo le au a Keneti Sio po o le Afioga ia Loau ia Argentina. O se taaloga mataina, o i ina na amata ai ona iloa mai e le lalolagi ia Samoa, po o fea o i ai Samoa. Talu ai nei i le tausaga atu ua mavae, sa i ai foi le fono tele sa fai mai i inei lea e taua ai le suafa faapea o le pathway o Samoa le SIDs lea na fai mai le fonotaga. E tasi lena vaega sa mataina ma sa molimauina le talisapaia ma ua silafia ai e le lalolagi o Samoa e ui ina toaitiiti o ona tagata ae o se atunuu e fai mea mafai. Le tamaoiga fafaga fiafia, ae tausaaia tagata uma. O lea la ou tea vatu ai ia le faafetai tele i le Maota aua o lea e matauina i lenei taeao le tulaga o le aso se matagofie o le Maota. O le filemu o le saogalemu ae faafetai i le Atua, maoopopo. E toe se i o maoopopo, faafetai ia Samoa e le o faatupulaia se tamaoiga i tagata a o le fofoga fiafia, e pei ona avatu e le Minisita o Faatoaga, oka oka. E fai mai le tala a le toeaia o le matou nuu “*ota ota Asita tafefe i le mea ua e faia*” faafetai i lau Afioga i le Minisita mo Faatoaga, molimauina o se tasi o toaí .

FOFOGA FETALAI: Faamalulu atu i le Afioga i le Minisita aua e te toe saunoa e talifuaitau i nisi mea sa laga ae saunoa sao pea oe ma faai mai lau saunoaga.

Afioga Hon SALA FATA PINATI: Faafetai. Ona ou faapea ai lea, le mamalu e o le Maota i lenei itula o le aso. E tele ia tupe e alu i faasalalauga pe a alu i fafo. Ae mo lo outou silafia, e leai se mea o tuua o lea e i ai ii ia faamaumauga le pepa lea e tofu lava le sui usufono po o le Minisita ma le pepa lea, o i ai uma lava ia faamaumauga o mea o lo o faapena ona agai i ai, ia se tala autu ao se taumafaiga vaivai a le Matagaluega o Turisi. Ma le faaaloalo lava ou te manatu o lea ua tau le faamoemoe ma le tulaga e pei ona i ai.

Tofa Olo Fiti Afoa Vaai: Lau Afioga i le Fofoga Fetalaií .

FOFOGA FETALAI: Lau Afioga i le Minisita. Ua e toe tu mai foi i luga le sui usufono mo Salega. Ae ui i lea tulai maia le sui usufono mo Salega Sasae.

Tofa Olo Fiti Afoa Vaai: Ou te fia malamalama lava i lau fesili na avatu lau Afioga i le Minisita. E moni lava au lau Afioga i le Minisita o lea ou te matamata i le tusi lea e pei ona e faaali mai. Ae ou te tau vaai atu e pei e le o talafeagai fuainumera ia e faaalu i totonu i i.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaaauu i luga o le faitauga faalua**

O fuainumera ia e aumai i totonu o le Tala o le Tupe e pei ona i ai ia se vaega o le \$11.4miliona lea e faaalu i faasalalauga e nao totonu lava o Niu Sila ma Ausetalia. Ona toe avatu foi lea o isi meaalofa a Niu Sila e \$4.5miliona lea foi ua toe faaopoopo atu. O le mea lena sa ou fesiligia ai lau Afioga. Ana tau aumai ma nisi atunuu ua tau talafeagai le faalauiloa a le tupe tele lea. Ae manatua foi e pei ona ou fai atu e le tau faalauiloina Ausetalia ma Niu Sila e anoano lo tatou atunuu i totonu i o.

Ma le isi mea mulimuli lea na ou fesili atu ai, se i tau mai se channel o le Televisi se i tatou matamata i faalauiloa ia. Aua e moni lava lau Afioga o lea e faalauiloa e le Manusamoa, ae pe tai lua, tai tolu, tausaga tai fa, tai lima faatoa taaalo foi ma le All Blacks po o Niu Sila.

FOFOGA FETALAI: O lea ua maua atu le faauilavea i le saunoaga a le sui usufono mamalu.

Tofa Olo Fiti Afoa Vaai: Ae ua lava lea.

FOFOGA FETALAI: Lau Afioga e le toe manaomia se saunoaga i se lauga saunoa mai.

Afioga Hon SALA FATA PINATI: Ne i eseese le faitau a le sui usufono. Ou te talitonu leaga e suetusi le sui usufono, e lava lona silafia i mea tau tupe. O lou nei tagata se o le kuoli le mea alii. Ou te le i alu i na mea faapea e sue tupe. Ae pei o le tulaga foi lele ia tatou lava pisinisi masani, lea e fai mai ai le tala a le toeaina o Sio, òLeuatea sau oe i i Malua, sa faapena ona ou alu atu ae faapea mai le tele o faifeau, ia o le a le? Tau mai le faailoga o lea faifeau, tau mai le faailoga o lea faifeau, oo mai loa ia te ia tago atu ma tuufesili mai loa, Sio o le a lou faailoga? Ae faapea le mea a Sio o le VLM, ona fesili lea o le toeaina, ò O le a le VLM Sio? O le valea le mafaufau se i tulou. E pei o i ina na fai ai lau tala, ou te le faatusa i se isi lava mea e poto ai, e leai. E avatu lava au tala o le tala moni ma tala e tuusao. O le agaga lea e aumai ai le Tala o le Tupe lea e aumai, e le pulea e Samoa le tele o tupe ia e faa grant mai. E aumai le tupe ae o lea e i ai le afa lea e nonoa mai tua, e aumai foi ia tatou ae faapea mai, e te le pule i le mea lena se i vagana ua o atu matou e vaai po o le a tonu le poloketi e talafeauga e faaoga i ai le vaega tupe lea. O le taimi nei, o lo o i ai tupe i i ae faatoa maua ia Iulai le tala autu moni, po o le a le mea o le a faaoga i ai le tele o le vaegatupe lea na fuafua e pei ona saunoa i ai le sui usufono.

Tofa Olo Fiti Afoa Vaai: Lau Afioga i le Fofoga Fetalaií .

FOFOGA FETALAI: Saunoa mai le sui usufono.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Tofa Olo Fiti Afoa Vaai: Lau Afioga i le Fofoga Fetalai, e to lou pulou. O le mea tonu lava lea sa ou faatali ai, o se faamalamalamaga mai o le potu le mafaufau. O lea la ua potu le mafaufau ae sa VLM muamua. Ae faafetai lava i lau Afioga i le Minisita mo le tali manino.

FOFOGA FETALAI: Malo. Faaiu mai le saunoaga i lau Afioga i le Minisita.

Afioga Hon SALA FATA PINATI: Faafetai. Ia o uiga lava ia o le motu tele, o i tatou lava e pisa a tama a o le uso. O tatou uma i le motu tele lea i Salafai, mo lo outou silafia, e ao ona tatou galulue faatasi, aumai lo outou tauau, avatu lo matou tauau e taumafai ai pei ona fai mai ai Faumuina po o Palauli le Falefa, e moomia le tatou atiae ia lelei mo Savaii. Afai e lelei mo Apia nei, e lelei foi mo Savaii. Ma le faaaloalo lava lau Afioga, ua maea se faamatalaga a lenei sui usufono. Ia manuia le Fonotaga.

FOFOGA FETALAI: Faafetai. Ua se taliga e fia faalogologo pei ona i ai le saunoaga a lau Afioga i le Minisita. Ia, ua oo mai le faasologa i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Ia mamalu ia le aitu i le aoa i le afio o lau Afioga i le Fofoga Fetalai, o le paia lava lea aua Aiga Sa Tuala, Leaupepe ma Aiono faapea le susu o Sua o le Maopu o Nafanua, le afio o Toleafoa o le Tapaau Faasisina. Ia, susu foi le paia maualuga i le Taauso, tainane le mamalu i le falefitu ma le fetalaiga i le Matua o Tauauvea. Ee foi i mauga o ao le mamalu o le Palemene, o lupe na faia mai le fuifui. Fata i fatalele le paia maualuga o le atoaga o le Tafatolu o Faigamalo a Samoa i le afio o le Afioga i le Palemia, le Sui Palemia ma le mamalu i le Kapeneta, faapea foi le faafofoga tapuai mai o le Faamasino Sili faapea le mamalu i le Ofisa o Faamasinoga.

Afio foi Lana Afioga Mamalu, O Le Ao o le Malo ma Lana Masiofo, aua le tapuaiga o le Fonousu a Samoa, ae tainane foi le paia maualuga i Sui Usufono o le Fono a Sui Tofia ma a latou Masiofo.

A o le taotoga iasa foi aua le tapuaiga a Samoa i tulimanu e fia o faafogafoga mai. O paia lava e taoto a o se alaoo aua o Samoa ua uma ona tofi e le toe faamatie i sou leo pe faaitiitia foi i sau upu i lenei taeao.

Tulouna foi le tapuaiga a le Aufailotu ma le Auositaulaga o lo o faanonomanu aua se manuia o le tatou Malo i le paia i Auauna a le Atua.

Ae ou te fia pai atu foi i le tapuaiga a si ou itumalo o Faleasiu, mai Tauoo seia paia Sapulu, aua le paia i Aiga, Aiga Sa Tuala, le Aiga Mavaega, o le Aiga Taulagi. Afio foi le Alo o Tamaalelagi, Tamaitu ma le Maugafa ma le mamalu ia te oe le Faletolu ma Fuaifale. Faafetai mo le tatalo, faafetai foi mo le tapuai mai a o nofoia e lo outou sui usufono le Nofoa o le ta itumalo. Ia tapuai maia ma le manuia ae se i liuliu ane alo o le lupe aua foi se sao o le tatou itumalo mo lenei Fonotaga.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga i le Fofoga Fetalai ma le paia ma le mamalu o lenei Fono, o le a ou tali atu i le aoatetele o vaega na laga e sui usufono, e vaevaeina i ni vaega se tolu, tau lava ina faamalamalama. O se Fono ese foi le Fono lenei lau Afioga i le Fofoga Fetalai, na pau lenei o le Fono na o le 13 sui usufono mamalu o le Palemene na saunoa i le Matagaluega o le Soifua Maloloina, a o le tele foi o ia saunoaga, o saunoaga faafetai. Vagana lava pe tasi pe lua sa tau i ai sina faitioga, a o le toatele o le fautua ma le tuutuu mai foi o fautuaga e lelei e fatufatuai ai le tatou galuega aua le soifua manuia o tagata o le tatou atunuu.

Ona ou amata mai lea i gasegase o lo o auina atu i Initia, e feoloolo lava i latou sa saunoa i lea tulaga, sa momoli mai foi le agaga faafetai ona o le taumafaiga. Aua o le mea moni e lagona le agaga faafetai i le Atua ona o le faasino mai o lenei aualea e avea ma toomaga o le tatou atunuu aua gasegase e auina atu i fafo, aua e le faigofie lenei galuega o le taumafai e tali manao o le tatou atunuu aua togafitiga talafeagai po o le a lava le gasegase, aemaise la gasegase tuga e le o mafai ona togafitia i Samoa nei. O lenei taumafaiga i Initia, na mafua mai ona o ni gasegase se toatolu sa teena mai Niu Sila e le mafai ona latou faatinoina le togafitiga ma le tasi o le gasegase ua matua maoae le tau, toetiiti oo i le miliona le tupe e faatino ai, ma e le mafai ona ausia e le malosi o le tatou seleni faaagaaga mo le auina atu o togafitiga i fafo. Ia o lea la na saili ai loa i le tulaga lea ma ua tali mai le Malo o Initia. Pei ona silafia, tusa nei pe fa po o le lima tausaga talu ai, pe tolu i le fa po o le lima tausaga talu ai na valaauina ai le tatou Palemia e le Malo o Initia ma malaga atu mo fesootaiga faava o Malo, ma sa maua lou avanoa matou te malaga faatasi ai ma le Afioga i le Palemia, ma o lea faigamalaga sa faamamafa lava le tatou talanoaga ma le Malo o Initia i fesoasoani tau soifua maloloina, e le gata i gasegase ae faapea fofai, o vailaau. Ia manatua foi Initia o le isi lea atunuu o lo o tele i ai fale gaosimea o lo o gaosi ai le vailaau eseese lea o lo o faaoga e le tele o le lalolagi? O le la na aumai ai loa le avanoa ua tatala mai falemai o Initia, fai le tatou fesootaiga ina ia faigofie ai ona tatou galulue faatasi ma faasoa i le tulaga o le togafitiga o gasegase.

E i ai la le group, o le vaega foi lea o falemai e tau o le Apolo Hospital, masalo pe maua le 50 pe lata atu i ai le tele o falemai o lea foi group o le Apolo Group. Peitai ane, sa sailigata lava se tofa i le tatou auaunaga foi i le faafesootaiga ona o le tele o gasegase. E manatu i le mamao o Initia ma le tauasa atu i vasa e tele pe a manaomia le ave o gasegase i Initia. E le gata i lea, a taunuu foi gasegase i Initia, e leai ni aiga o i ai e ono maua ai le moral support po o le lagolago i nisi manaoga e ese mai lo le togafitiga o gasegase. O le ala lea sa faigata ai lava ona tau amata lenei faamoemoe. Ae ina ua tulai mai loa le tulaga lea i gasegase ia, ua leai lava ma se isi mea e tapa i ai, tatou faatalosaga loa i Initia mo le tulaga lea. Ma o lea e tatala mai le faitotoa ma fai ai loa se feagaiga mo le auina atu o gasegase nei e toatolu. Ona o le tuga tele o nei gasegase e toatolu, e tasi na maluu ae le i oo i le taimi e o ese atu ai ma Samoa, ona o ai lea na o gasegase e toalua, o lea ua foi mai le isi, pei ona outou silasila o le tasi o nei mai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

O mai la nei na teena mai Niu Sila ua le mafai ona togafitia, ona o tulaga la nei pei ona ou talanoa atu i ai. O lea la ua foi mai le isi ua manuia, e ona nai faasalaluga foi ua maua e nisi le agaga fiafia ua momoli mai lana faafetai i le Malo ma le tatou Matagaluega ona o le avanoa ua na maua e oo atu ai i Initia.

O le isi ua uma lava ona outou silasila aua na faasalalau i nusipepa e saili se seleni e saili ai agai i fafo se avanoa mo se tamaitiiti sia sa faaletonu le ate, ma o lea la na malaga faatasi ma lona tama i Initia, ma ua uma ona fai le taotoga, e 14 itula na fai ai le taotoga, ua to mai le vaega o totoga o lona tama e sui ai lona totoga lea ua faaletonu. O lea la ua faasolosolo manuia, ma o lea atonu ua le o toe mamao se taimi ona toe taliu mai lea i Samoa ma le fiafia ua manuia lea alo. E oo mai la i le taimi lenei, ua toasefulufa nei gasegase lea o lo o o atu i Initia. Ua ala ona ou talanoa atu i le tulaga lea ona o lea sa faatu mai le fesili, aisea le mea e le ave uma ai loa tatou mai i Initia.

O le isi tulaga lea sa taulai i ai le silasila a le tatou Matagaluega ma le tatou Malo, ona o le taugofie, e tusa ma le tasi vaetolu o le tupe lea e faaalu e tatou i taotoga ia e ave i Niu Sila, lea e taoto ai tatou mai i Initia. O lona uiga, o le a tele atu ni gasegase. O le isi tulaga manuia, e ui lava i lona taugofie, ua mafai nei e le tatou Malo ona fesoasoani ia i latou nei e o. O le taimi lenei, e le gata ina maualuga le tau o le taotoga o tatou gasegase lea e ave atu i Niu Sila, a o le tele o le avega o lo o tauamo e aiga taitasi. Aua foi e totogi e le aiga le pasese, alu ma le sau. Masalo po o se mea i luga atu o le \$2,000 lea o le a faatino ai e le aiga, taunuu i Niu Sila, e le alu atu loa alu i le falemai, e alu atu alu foi nofo i le aiga la e i Niu Sila. I lona taimi lea o le a tapena ai mo sona taotoga po o sona togafitiga, e tausi e le aiga lea. E tele nisi aiga ua le toe faigaluega ua nonofo e vaai le gasegase lea, aua ua nonofo e ave le gasegase e tui le toto i le isi fale suetoto ona o lea ua tele ina malamalama le mamalu o lenei Maota, aua o tatou lea e agai soo i Niu Sila, e vavamamao mea e tutu ai nei auunaga. O le fale suetoto le isi pito, o le faata faapitoa le isi pito, e alu e vaai le fomai faapitoa i le isi pito. O nei mea uma, o le alu ma le feaveaiga, e amo uma e le aiga lea e i Niu Sila. Ua tele foi nisi o tatou aiga o lo o i Niu Sila e foi mai le mai ua malosi, ua matua pagatia lava i le tele o le expenses ua alu. Na o le taimi lava e alu ai i totonu o le falemai, fai togafitiga, e totogi e le Malo le vaega lea. A tea foi la, e tea foi i tua i le aiga lea, toe alu ai lava le isi lua vaiaso po o le tolu vaiaso o tausavali e fai siaki ia mautinoa lelei ua malosi faatoa foi mai i Samoa. A tuufaatasi la nei expenses e alu i le gasegase, toetiiti lava tutusa le tupe lea e totogi e le aiga ma le tupe lea e totogi e le Malo mo togafitiga ia. O Initia, e leai ma se tupe e tasi a le aiga e alu ai. E tasi lava le tupe lea e totogi, na o le malologa lea i Fiti e overnight ai ona faaauau ai lea o le malaga lea e totogi e le mai ia. O le mafuaaga o lona mea, e eseese manaoga o tagata. E i ai isi aua e fai tausiga ma mea faapena, e filifili ai gasegase ia po o le a le mea e manaomia e ia ma faatupe e ia. Masalo pe na o se \$200 e alu ai a le mai. A maea la ua tea atu lona, oo loa i Initia, e alu atu loa le mai alu sao i le falemai, amata loa togafitiga ma amata suesuega faamautu uma mea uma, fai ma togafitiga, a tea mai, tea i le hotel.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

O le hotel foi o lo o nonofo ai, e le o se fale foi lele e faaletonu, o le matua hotel lava e matagofie mea uma, seia oo i le taimi ua malosi lelei, toe oso i le vaa toe sau i Samoa. E leai ma se tupe e tasi a le aiga e alu ai, e totogi uma lava e le Malo na mea. O ia la laasaga e matamata atu i ai, o se tulaga lelei mo Samoa, e le gata ina fesoasoani i le Malo, ae fesoasoani foi i le aiga o lo o i ai gasegase nei. Na pau lava la le tulaga o lo o amata nei ona tilotilo i ai le tatou Malo, o ni faiga faavae, se faiga faavae moí aua o le taimi nei, o lea lava e tuu i le saolotoga o le tele o mai. O le tele o mai lea a fai atu, o lea o le a e alu i Initia e te taoto ai. Fai mai, se faamolemole o ita e ta te fia alu i Niu Sila o la e i ai lata fanau, o la e i ai lota aiga, fia alu i Niu Sila e togafiti ai. Tusa la o lea e filifiliga i luga o le manaoga o le gasegase le mea lea e fai nei. A o le mea tonu lava e tatau ona fai, e tatau ona i ai se faiga faavae, o a mai e tatau ona o i Initia, a o a mai e tatau ona o i Niu Sila, e laugatasia uma ai le atunuu. O lou la taofi, ua tatau lava ona ave uma tatou mai i Initia, vagana mai faafuasei, o mai e le mafai ona malaga i luga o le vaalele i se taimi umi. A o latou ia e tatau ona malaga i Niu Sila, ina ia vave ona maua le togafitiga. A o se faamamaavega pe a tatou amata ona tilotilo lenei Matagaluega ma fausia se faiga faavae ina ia mautinoa ai, o ai e tatau ona alu i Initia, a o ai foi e tatau ona alu i Niu Sila. O le tulaga lea mo le agai i luma aua lea foi faamoemoe mo le togafitia o gasegase. O le falemai lea e ave i ai tatou gasegase, e taua o le Forties, e le tasi se falemai, e tele latou falemai. O New Delhi lea e ave i ai o i ina lea e i ai le falemai aupito sili ona tele o le group lenei, ae tele foi isi falemai a i latou o lo o i isi itu o Initia e mafai foi ona ave i ai tatou mai pe a faapea ua le maua se avanoa i le Forties. A o le falemai lea ua faailogaina e numera lua, the second most technically advance hospital in the world. E maoae lona tomai faaonaponei i le togafitiga o gasegase lea e ave i ai tatou mai. O mai fatu ia e le i leva ona o atu, na ona o atu lava uma ona fai toe omai, e le taotoa fatafata, e fai atu lava i fafo togafitiga e tuu atu lava le tube i totonu taoto le fatu, uma, tasi le vaiaso malosi, toe foi mai Samoa.

O le tulaga la lea ou te talitonu ua mautinoa o lea lava e fuafua se faigamalaga, se i fai se feutanaiga lelei ma le falemai, i latou o lo o vaaia le falemai ma pulea le falemai se i fai se feiloaiga, faatalatalanoa mo le agai i le lumanai ina ia faamautu faiga ia. O lea foi la ua ofo mai i le falemai lea i le faaiuga o Iulai pe a talafeagai ma a tatou tapenaga o le a omai, aua o le maliega lea sa faavae e le gata i le ave o tatou mai i o ae o le a fesoasoani mai le falemai lea e upgrade pe tapena le tatou falemai i inei e omai ai latou foma e taoto ai lava i inei tatou mai ae aua le toe o i Initia. E faigofie le faiga lea, a oo i se taimi e faatino ai, pe tolu, fa, lima mai ua iloa ua sikuea le sau o le foma i o, aua o taotoga ia na uma atu nei e 14 taotoga o le fatu lea e i i, e tele le aoga i tatou foma ma e lagolagoina ia ituaiga togafitiga i inei, e le gata i totonu o le tatou fale tipitipi, ae faapea foi ia i latou o teine tausisoifua, o le vaimoe, o i latou uma o le team, o lea ua maua le latou experience, training.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

A faapea e faaauau le faamoemoe lea o le a maoae foi le siitia o le silafia e tatou lava tagata iinei o le faatinoga o nei togafitiga faaonaponei o le a faigofie ai foi na o le fomai lava e sau iinei, na o le fomai tipitipi lava e toatasi e sau fai le taotoga, a o lea e faatino uma e tatou tagata ma tatou fomai faigaluega iinei isi vaega e moomia mo lea tulaga.

O le vaaiga lena mo le lumanai e afua mai i lenei faamoemoe ua tatou amatalia ia tatou tatalo pea ia fesoasoani mai i lo tatou agai i le lumanai aua lea faamoemoe ma lea tulaga.

Ona ou oo mai lea lau Afioga i le Fofoga Fetalai ma le mamalu o lenei Fonotaga i tulaga tau health centres lea foi sa fesiligia e i ai le vaega lea e fesootai ma Initia sa laga ai se fesili a se tasi o uso, pe le i oo i se taimi e tataua ai ona fai se tatou Amapasa i Initia. A mea o le tulaga manaia lena, ae le o laaloa ai le silasila a le Malo, ae fai lava ma tapena i se taimi talafeagai. Atonu o se agaga matagofie lea, ae atonu o le a silasila atili i ai le tatou Malo pe talafeagai lea tulaga ma se taimi foi e talafeagai e faatino ai se faamoemoe faapea mo le lumanai.

Health Centres o le tulaga lea e le mafai lava ona le faaleoina e sui usufono, faafetai mo le taulagalaga pea i tatou falemai i tua. Ma o le faamoemoe foi lea o lea ua agai i ai le tatou fuafuaga a le tatou Matagaluega, ona o lea sa saunua foi nisi mai le toasefulutolu o e sa saunua i Matagaluega, e toasefululua i latou sa faafetai mai ona o le fuafuaga lea i le tuufaatasiga o le tatou Matagaluega, le NHS na le MOH. Ma o le tasi lea vaega o lea sa faamamafa i le fuafuaga lea, ma le faaiuga lea na fai, ona ua tilotilo i le tulaga peiseai ua le o maua e o tatou falemai i tua tulaga e tataua ona i ai. Aua o le tilotilo lea ua silasila i ai le tatou falemai, o lea faatoa lima tausaga talu ona umusa, e 300 moega i le taimi na tatala ai, faapea tatou, oi, ia lenei falemai tele, e faapefea ona faatumu lenei falemai. A o le falemai sa i ai muamua pe na o le 150 moega a o lea sa alu ai lava, a o lea ua 300 moega, tusa ua faaluaina le size. Sa i ai lagona faapena ailoga a tumu lenei falemai matua tele tele. A o le taimi lenei, ua toe manaomia foi se isi falemai faapena le tele, ua tumu, ua tau leai ni moega ua tau leai ni avanoa. O le tulaga la lea o lea e popole nei i ai le tatou Malo i le sau o le mai lea e sau ai nei. A o lea sa saunua le uso a Minisita e lagolago mai foi le latou Matagaluega i le taumafaiga o mai nei le pipisi aua la fualaau aina ma fualaau taumafa mata lea o lo o lauga atu ai pea le soifua maloloina e toaga e faaoga e faaitiitia ai le toto maualuga ma le suka ma le cancer, taofi le ulaula, taofi le inu ava oona, toaaga e faagaioi tino.

O le mafuaaga lena o lea e fasafasa atu ai pea le Matagaluega ona o lea e tilotilo i le tulaga lea. O le silasila i le mortality lea e aumai i uta po o le lisi o e maliliu i lea vaiaso, ua le i lalo o le sefulu i le vaiaso e maliliu, ae na o totonu lava o le falemai tele. A le sefulu agai i luga i le vaiaso, a o le ivasefulu pasene o na maliliu, e mafua mai lava, a le toto maualuga, suka, fatu. O le aafiaga o faamai na lea ua aafia ai le tatou atunuu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaaauu i luga o le faitauga faalua**

Silasila i le tulaga ua i ai nei le tatou population? A e savalivali i le aualatele ma e matamata ma tatou o e vaai i taaloga a aoga ia e fai, e toafia ni tamaiti lapopoa e tausae mai tino ua faapena mai tino i o? E a luga o le aualatele i lau tilotilo i ai, e fia ni tagata lapopoa e te faitauina faatoa e maua se tagata pae se tasi? O le faavae lea o mea ia. O lea la e lauga atu ai pea ma pisapisao atu ai pea le Matagaluega, e matautia. Ae tasi la lea fofo e fautua atu ai le Matagaluega, tatou toe o i tua tatou, toe faalelei tatou falemai ia e i tua, togafiti i tua gasegase nei ia aua ne i faatupulaia ia aua ne i togafitia. O aso ia, na o le lavea lava o le vae tamoe i le fale komiti, e alu atu i le fale komiti, nini le pou, nini le manua ona le inifeti lea o le manua, vave ona pe, le sau i le falemai. O le tulaga lenei o le suka, e tusa lava pe tuia i se pine saulupo po o se fugafugamutia, po o se vaofefe, e allergic ai lava le vae o le suka, e aumai aveese le vae. Aua o tulaga na o lea ua i ai nei, ua vave le faatupulaia o nei mea, ona o le a? Ua leai ni tatou fale komiti ua leai ni komiti tumama, o fea ua fai i ai tatou komiti tumama sa vaaia lea vaega, sa pei o ni teine fomai i aso ia ta te sulu i ai, aua e tofu fale komiti ma nai kapotifí Ua mana'o le tatou Matagaluega tatou te toe foi i le mea lena, tatou o e taofi i tua le atunuu ma togafiti i tua e taulata i o latou aiga, e faigofie ona o atu ma vave ona togafiti nai lo le faatalitali ogaumu i i le falemai tele, a sau ua ogaoga ua tea le taimi e ono manuia ai le tamaititi ua too far gone, ona o le a? O le leai, ua leai se primary health care, ua leai se public health. O tulaga ia, lea la ua tatou naunau tele i le manaia o le falemai ona tatou omai lea, a ua galo ia tatou le tulaga o le prevention. O nei mea ia aua ne i tutupu mai. Ma e amatamea la i i, pei ona amatamea foi le SPAGHL ma lana galuega lea e fai o le o e asiasi meaai lea i tatou tamaiti aoga i tua, aua o i ina e amata mai ai, a le amata mai le home, o le aoga e o i ai. Ae talosia ua ola laau toto lea sa galulue ai le SPAGHL, ua toto laau fruit plant i totonu o compounds o faleaoga. Afai e le o access i ai tamaiti i faleaoga, atonu e maua le avanoa e o atu i le faleaoga o la e ua fua mai le vi ma ua fua mai le mago, maua ai se fruit e fesoasoani i lana diet ma tau faaitiitia ai le tino lapoa. Leaga o le a alu tele i tua le talanoa, a o lena le galuega. O le tulaga lava lea i falemai ia, o lea o le a tilotilo totoa i ai le Matagaluega, ua tataua ona toe faaleleia.

E oo foi la i le presence o le fomai, leaga e augani mai lava le tatou atunuu, manaia le matou falemai ae maimau pe ana i ai se matou fomai. O le mea tonu lava lena mea, pei e maua le confidence o tagata pe a vaai o la e i ai le fomai. E tasi lava le falemai lea e faasoloatoa ai le fomai i le vaiaso atoa, na o i i Leulumoega o fomai ia e i tua. A o falemai lea e i tua o lea e taitasi lava aso o le vaiaso lea e agai atu iai fomai mo se taimi lata mai, o le a taumafai se tulaga e siitia lea tualga pe lua i le tolu vaiaso. A o le ideal situation, ia nofomau ai se fomai i tua, faasolo atu ai fomai, a uma le vaiaso lea sau i Apia, ae alu atu le isi fomai e vaai le falemai lea e i tua ma faaaauu ai pea le galuega lea. Na ala foi ona omai i totonu fomai, ona o le vaaiga foi, aua o au foi sa ou i le falemai i tua.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

E lua ou tausaga o ou i Lalomanu e vaai le falemai i Lalomanu. A o le mea la lena, a uma loa lau clinic i le taeao ua leai ni mai ua fiu e faatalitali, ou alu ou fagota, ou alu i uta i le vaomatua, ioe, fai tafaoga i le togavao. O mea faapena e faaoga i ai le taimi ona o le le tele o ni mai. Ae ou te iloa le taimi lenei, o le anoanoai o mai la e i tua ou te iloa e full time lava le fomai i le aso atoa e le uma tagata mamai e gasolo mai ona ua faasolo ina tele gasegase i tua i le tatou atunuu.

Ae faafetai mo le faamanatu mai ma le tau fagufagu ma le taugologologo, o le agaga lena o lea ua agai i ai le tatouí .

FOFOGA FETALAI: Se i tulai mai le sui usufono mo Palauli le Falefa se i fai se malologa a le Minisita.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, faafetai i le Afioga i le Minisita mo le folasaga malamalama. Sa ou fesiligia le tulaga o le timetable o le tuufaatasiga o le Matagaluega ma le auiaunaga faasoifua maloloina ona o lenei le itu, sa ou fautuaina se tulaga e silasila ai i se tulaga faanatinati ona o mea nei, e afaina loa lagona o tagata ona o galuega ma tulaga le mautinoa o le soifua galue, e afaina ai le tautua. O le vaega tonu lea sa ouí . Leaga o lea o le a mei ese le Afioga i le Minisita ma le tulaga o le tuufaatasiga.

Afioga Hon TUITAMA TALALELEI TUITAMA: Onosai mai le uso, o lea e faasolosolo atu ou te le i oo atu i ai i le separation ma le remerge, o lea lava tatou te i le falemai tua.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, sa taua o lea ua talanoa i le tuufaatasiga, o la e la ua salalau i tua le tulaga lea o le saunoaga a le Minisita. E pei la o lea ua ou faalogo atu o le a mei ese ae a faapea o le tulaga lea, faafetai i lau Afioga.

Afioga Hon TUITAMA TALALELEI TUITAMA: E meimei pei o isi tagata. O lea e tatao lava le mea lea e i ai, e le i uma atu. Lavapapale mai lau Afioga.

O le vaega....

FOFOGA FETALAI: Masalo o le finagalo o lau Afioga i le Minisita, o lea ua oo mai le taimi o le tatou malologa o le a faaauau e le o toe mamao pe tatou te malolo se i toe talii mai pe a ta le itula e 3?

Afioga Hon TUITAMA TALALELEI TUITAMA: Lau Afioga o lau talosaga na o sina lua lava itula tatou malolo ai se i faauma atu mea ia e i i. Ma le agaga faaloalo.

FOFOGA FETALAI: Malo faafetai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaaauau i luga o le faitauga faalua**

Afioga Hon TUITAMA TALALELEI TUITAMA: Ae le faia se loto, faafetai.

FOFOGA FETALAI: Ona o lea ua tatou toai taunuu i le tatou malologa foi e saili malosi ai mo le faaaauuina o le tatou galuega ma le tatou Fonotaga i le itula e 3:00 i le afiafi nei seia paia le itula e 7:00 i le afiafi. O le mea la lea e i ai le manatu o le Nofoa o le a faataatiaese Galuega a le Fono Aoaofa Faitulafono seia aulia le itula e 3:00 i le aoauli nei. Ma lou faaaloalo lava. Faafetai.

Na motusia Felafolafoaiga a le Fono Aoaofa Faitulafono i le itula e 12:50 i le aoauli.

Na toe amatalia Taualumaga a le Fono Aoaofa Faitulafono i le itula e 3:00 i le afiafi.

Na toe faaaauau Felafolafoaiga i le faitauga faalua o le Tulafono Tau Faaofi o le Faatatauina o Tupe 2017/2018.

**TULAFONO TAU FAAOFI O LE FAATATAUINA O TUPE 2017/2018
– felafolafoaiga faaaauau i luga o le faitauga faalua**

FOFOGA FETALAI: Ou te faasilasila atu ua toe amatalia le Fonotaga a le Palemene. E faia le malologa o malele ma saunoa le Afioga i le Minisita mo le Soifua Maloloina. Ma ou te tapa ma le faaaloalo lau Afioga i le Minisita e faaaauau lau saunoaga.

Afioga Hon TUITAMA TALALELEI TUITAMA: Faafetai ua maua se faiga malologa manuia i lau Afioga ma le mamalu o le Kapeneta faapea foi le mamalu o le tatou Palemene. Ua maua foi se faamalosiaga, tali le sua, palega auau foi se taumafataga. Ia, tau ia ina ia avefaamalosiaga ia i tatou e maua ai se malosi fou e faaaauau ai le tatou fonotaga i itula fono o totoe o lenei aso.

Lau Afioga i le Fofoga Fetalai, e faia le tatou malologa o faagasolo sau upu i le tulaga o falemai i tua. Ona o lea sa faauilavea foi se tasi o sui usufono i mataupu o lea ou te le i oo atu i ai, o lea la o le a toe faaaauau sau tala e faauma atu nai vaega ia ou te iloa e taua, ma o lea sa laga mai e sui usufono i a latou saunoaga. O lea la e aofia ai le tulaga lea o le faafetai mai o le isi sui usufono e lelei falemai tua ae o lona popolega, o lo o tilotilo i equipments o lo o faaaogaina i tua i falemai ia e i tua.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Mo le silafia, o le mea lea sa ou talanoa atu ai i le toe agai i tua ma toe faaopoopo le taimi o fomai i tua aua o equipments lea sa taua po o meafaigaluega lea e faatino ai le auaunaga i totonu o le falemai, e tele ina faaaoga na o fomai. E pei ona ou taua, o au sa ou faigaluega i Lalomanu faapea foi ma Sataua i lou taimi. O equipments la nei lea e taua, e sao lelei le sui usufono ai sa maitauina i aso ia, sa i ai uma mea uma, sa i ai le tamai lab i totonu o le falemai, sa i ai microscope, sa i ai meafaigaluega e fai ai taotoga, aua sa fai ai lava matou taotoga i tua i lenei taimi. O le ala foi lea o le toe siitia o lou taimi lea na siitia ai le falemai lea i Lalomanu i uta ona o le tulaga lenei e tele ina faaleagaina meafaigaluega ona o le pisisamia. Ae talu nei la ona oso Tsunami, ona faamallosia loa lea o le Tulafono ia tuutumamao falemai ma fale ia e faatino ai auaunaga a le Malo i nofoaga mauululuga ina ia aua ne i toe aafia pe a toe tulai mai se mala faalenatura faapea. O lea la ua i ai nei le tulaga lea e pei ona silasila foi lea ua tapunia ai le falemai i Fusi ae siitia le auaunaga i Saanapu ona o le auaunaga lea, o le le maua o se fanua i uta o Fusi, a o lea lava ua siitia atu ai loa le auaunaga i Saanapu. Ma o lea la pei ona taua e se tasi o sui usufono, o le falemai lenei ua leva ona tataua ona siitia le auaunaga ua fai sina e faamalulu atu ua fai sina tuai o le gaioi a le auaunaga i le faaleleia o le falemai lea, a ua talanoaina faafia. Ua faatele foi a matou asiasi faatasi ma le aufaigaluega, ma fautuaina lava le falemai, o la e faafofoga mai le mamalu o le Komiti lea, ona tasi lenei Komiti e pei foi o isi afioaga ia e i ai falemai i tua, e ese le tu malosi ma lagolago i mea tau le soifua maloloina, lagolago i fuafuaga a le Matagaluga i le faatinoga o a latou fuafuaga mo le soifua maloloina i tua. O lea la e tele lava le naunautaiga ona e i ai le talitonuga e malupuipua mea ia i i. O le tulaga la lea ou te talitonu a maea se fuafuaga lea i le toe faaleleia o falemai nei, o le a faapea foi ona faaleleia equipments ma meafaigaluega ia e mafai ai ona faatino le tele o nisi galuega i tua. E i ai galuega faigofie e mafai lava ona gafatia e fomai e faatino i tua e aunoa ma le toe tau omai i nofoaga i tua. Ma a oo ina faatino faatasi ma le tulaga o fesootaiga, o le a faigofie foi ona maua le fesootaiga ma fomai faapitoa o lo o galulue i le tatou falemai tele e avatu ai le fautuaga ma fesoasoani atu i le faatinoga o ia auaunaga e mafai ai ona tauave i falemai i tua lea tulaga.

Sa taua foi le tulaga i le fale maliu i Tuasivi....

FOFOGA FETALAI: E faamalie atu i le Afioaga i le Minisita o lo o tulai mai le faauilavea a le sui usufono mo Gagaifomauga Nu.3. Tulai mai le sui usufono.

Afioaga Faaulusau Rosa Duffy-Stowers (Gagaifomauga Nu.3): Faafetai atu lava i lau Afioaga mo lou avanoa. Ia na ona tuualalo atu lava i lau Afioaga i le Minisita a o e saunoa, e le i tofia foi au e seuina le lauga matagofie a lau Afioaga, ae na o lou soso atu lava e toe faapupula atili le mea sa ou taua i tulaga tau equipments.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea na e saunoa mai nei o equipments pei e nafa tonu lea ma alii fomai, a o le tuualalo ona o tamaitai tausimai lea e vaaiia falemai ia faaitumalo i le mea lea ou te agai mai ai, e le lava iaí e pei o se example faigofie, o mea manava, o lo o faaaogaina e le isi mai, a o lea ua kili atu le isi mai, ona faatalitali lea o le mai lena se i uma ma maea mai o ona aumai lea. E pei o mea laiti faapena lea e agai atu ai se faamatalaga, ona ou te talitonu o le isi mea ne i te i ua tuuaia fua le mamalu o le Matagaluega, a o le faatamala lava o tausimai i tua i nofoaga ia faaitumalo, o le l atoatoa o latou meafaigaluega ona o le l logoina mai o le Matagaluega. Ma lou faaaloalo tele.

FOFOGA FETALAI: Malo faafetai. Ia, ou te tapa ma le faaaloalo lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA: Faafetai o lea ua manino le fesoasoani mai a le sui usufono. E sao foi, e i ai lava meafaigaluega nei e mafai ona faatino e tausisoifua foi ua i ai le latou tomami mo le faaaogaina o ia meafaigaluega. Afai la o le tulaga lea o lea e taua, o lea ua oo mai le fautuaga ina ia silasila i ai. Ae masalo o le mea lea e taua o mea o inhalers, mea foi nei e togafiti ai mai lea o le asthma e faaaoga e teine fomai. Ae normally lava o tulaga masani e taitasi mea i falemai i tua aua e seasea foi, ae o le lelei la o le faamaumauga o fuainumera ia i tua, o i ina la e fua i ai le faasoaina o meafaigaluega ia. Aua a faapea o le falemai lea i lea itumalo pe maua le toluasefulu o mai sela la e i ai, ona fua foi lea aua a omami faatasi ni mai sela se lua i le taimi e tasi oso faatasi ai ae na o le tasi le mea lea e faamanava ai, ou te iloa o se tulaga faafitauli lea, e mafai la ona fai i ai le fuafuaga a le Pulega, ave la ni mea se lua i i, leaga e fai si toatele o le au mai sela lea e i i e faaaogaina ai. Ia, o tulaga faapena lea e aoga ai faamaumauga lea e pei ona ou taua mo le plan ina o falemai ia i tua ina ia gafatia le faatinoina o le auaunaga.

Faafetai mo le fautuaga i le fale maliu. E le o se taimi muamua foi lea ua oo mai ai le fautuaga i le fale maliu lea i Tuasivi. Ma sa ou tautala muamua ai foi i le tulaga lea, na aumai foi le isi fautuaga muamua, ua faaletonu le fale maliu. Ona matou o foi lea asiasi ma faalelei le fale maliu, a o lea foi la ua ou faalogo atu nei o lea ua toe faaletonu foi le fale maliu. Faafetai lava aua o le tatou galuega faitele lea. E i ai vaega e le o lipotia mai e i latou o lo o faigaluega i i ona o tulaga pe galo po o le a le tulaga e i ai, ae o le tatou vaavaai ma maitau mea ia e faaletonu ma lipoti mai, o le tatou fesoasoani foi lea i le Pulega aua le faasoaina o le tamaoiga lea e tufatufa atu mo falemai ia i tua. Mo le silafia o Tuasivi lea o lo o i ai nei le polokalame faaleleia. E pei ona maitauina ua tele vaega o le falemai lea ua uma ona faaleleia. E pei o le vaega mulimuli lea ua o atu foi faatino, o le faata. O lea la ua i ai foi le fuafuaga, e tatau ona faaauau le galuega lea, sosoo atu ai ma potu o lo o taofia ai gasegase e tatau ona faaleleia lea vaega.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O le isi timuga tetele lea sa fetau ai ma le matou asiasiga talu ai, sa tele lava le faaletonu o tulaga ia o potu ia e taofia ai gasegase, ma o lea foi sa matou talanoa ai ma le Pulega. Atonu la o se taimi lata mai ua tatau ona faaauau le faaleleia o le falemai lea i Tuasivi ona o le tele o vaega ua uma, a maea ona liliu ane loa lea i fale e afifio ai ma papaaao ai le paia maualuga i le aufaigaluega, i fomai ma tausisoifua ma medical students foi lea e agai atu i ina, aua tasi lea teaching hospital a tatou o lo o faagasolo atu ai tatou tamaiti e o atu e galulue faatasi ma fomai la e i ai ma aoao ai le faatinoga o le galuega faafomai. Ua tatau lava foi la ona oo i ai se fuafuaga faapena e faalelei fale ia.

A o le fale maliu, atonu o le fale maliu la e i ai nei o le container aua ua faasolo ina faaletonu le container i le tele o ona tulaga, atonu ua tatau loa ona faasolo atu i ai le faaleleiga lea ua i ai nei ma fai ai loa se fale maliu tumau ma lelei. A o le tulaga lava ia o fale maliu, e silafia foi, e le o se matafaioi a le falemai le vaai o maliu. Na pau lava maliu o lea e i lalo o le obligation a le falemai, o maliu nei ua maliliu ae le o iloa le mafuaaga o latou maliu, ona tuuina loa lea i totonu o le fale maliu nei e faatali ai o latou taotoga e fai i se taimi e saili ai le mafuaaga o le maliu ina ia aua ne i sao ai tulaga foi nei tau i ni mafuaaga le manuia. E pei e mafua ona o se faatamala o se isi tagata i tua po o se maemaea o se isi tagata ua maliu ai se isi tagata e faatau la e fesoasoani i le Matagaluega a Leoleo i le latou taumafaiga e saili le amiotonu o tulaga faapea. A o lau fautuaga i le tatou atunuu, faaoga fale maliu o la e ua i ai nei, o la e foi le fale maliu o le Afioga a Pau i Savaii, e taugofie atu i le falemaliu o le falemai. Ia ma le tasi, o fale maliu ia o le falemai, e silafia foi, a oo nei ina faapea ua i ai se maliu ua lipoti mai, po ua tolu ni aso talu ona i lalo o le palapala, ae toe lipoti mai i le Ofisa o Leoleo, o le maliu le la na fasi e ai, lea ua teu lava e le i faia se suesuega. E toe o lava leoleo e toe laga mai le tino maliu. A aumai nei la tuufaatasi ma maliu o aiga i nai toeaia la e i totonu o fale maliu a le falemai, ia e afaina atoa uma ai ma latou.

O le mea lea, o le fautuaga, faaoga fale maliu lea ua uma ona tapenaina mo mea tau maliu, a o le fale maliu o le falemai, o le faamoemoe lena e faatali ai le taimi e fai ai suesuega faaauau ina ia saili po o le a le mafuaaga o latou maliu. Ia, ona faapea lea lau Afioga i le Fofoga Fetalai, o le tulaga la lea e faaiu atu ai sau tala i falemai i tua.

Ona oo mai lea o sau faamatalaga i le tulaga lea o le tuufaatasia. E pei ona ou fai atu, ua uma ona alu i nusipepa ua saunoa le Palemia ma faailoa le mafuaaga o le faaiuga a le Kapeneta na oo ai i le faaiuga lea, ua tatau ona toe tuufaatasi le Matagaluega. E le toe i ai la sau faamatalaga e sili atu nai lo lea, ua uma ona saunoa i ai le Palemia, e le gata ina alu i luga o le leitio, a ua alu foi i luga o nusipepa ae i ai mafuaaga. Ia manatua foi e leai se meaí O lea foi sa tatou faafofoga nei i le aumai o le faafetai a sui usufono o le Maota i le Matagaluega o Aoga, ina ua toe faaauau asiasi aoga. O tulaga ia e fai ma le tilotilo i le mea ua talafeagai mai lea taimi i lea taimi, e tatau ona fai aua ua talafeagai. Tau lava ina ou faapuupuupu atu e faapea, ua mafua ona fai le fuafuaga lea ona ua le ausia tulaga moomia ma tulaga sa faamoemoeina e faatino i le tuueseeseina o le Matagaluega.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea la ua vaai atu ua le ausia, ua le taunuu le faamoemoe, o le a saga fai lava la pe afai e vaai atu ua tatau loa ona fai se isi faiga e ausia ai faamoemoega ma matatia tulituliloa a le Matagaluega o le Soifua Maloloina, aua le soifua manuia o ona tagata. O le faapuupuuga lena, ae mafai ona ou tolaulauina atu nei le anoanoai o vaega ia, e uma le aso lenei o ou tutu atu faapea i i, a o le a se tala, e le i soona faia fua, ua uma ona silasila totoa i ai le Kapeneta i le tulaga o lo o i ai ma tasi ai le tofa ma le faautaga o le mea ua tatau ona toe tuufaatasi le tatou Matagaluega. A lea ou te talitonu o le faailoga....

Afioga Hon Faumuina Tiatia Faaolatane Liuga: Lau Afioga i le Fofoga Fetalaií .

Afioga Hon TUITAMA TALALELEI TUITAMA: Faatali o lea ou te le i oo atu i le mea lena e te tutulai soo mai ai. Alaala mai ma onosai mai, taofi lau solofanua se íí O lea e le o galo ia te au, o lea ou te maua tonu lava lau Afioga, ou te oo atu lava i ai, se i faamalamalama muamua le mea lea.

E pei la o le tulaga lea o le faailoga o lau tala lea e fai atu, o lea ua nofofale ia Satuiamaa i le silafia o le atunuu ma le mamalu o le Maota lenei, ona e pei ona ou fai atu, e 13 sui usufono na afea le Matagaluega lenei i a latou saunoaga. E toasefululua na faafetai mai i le toe tuufaatasiga o le Matagaluega o le Soifua Maloloina. O lona uiga ua malamalama. O lea ua manino i le latou faafofoga ma le latou maitau i le tilotilo ma le faitau i nusipepa ma faalogologo i le TV, o le ala lea ua faapuupuuu atu ai faapena sau tali, ae umi umi lava se faamatalaga e mafai ona ou fai atua. Ou te le alo i le ata o le laau. Ae pau lava o lea, o le faasaoina o le taimi, o lea o le a uma atu foi lenei aso, vaai o lea e le i oo i le isi vaega lea e faatalitali mai.

Ona ou oo mai lea lau Afioga i le tulaga lea e tulimatai mai e si ou uso, le Afioga ia Faumuina o lea e i ai le task force ua uma ona tofia e le Kapeneta e silasila i itu ia e te atugalu i ai. Ioe, e seu lava le manu ae tagai i le galu, e le o faia ma se manatu i tulaga ia e ono aliali mai, e faapena lava i mea faapea e i ai suiga, e tatau lava ona i ai ma nai nisi faafitauli e tulai mai ai, ae le o laaloa ai le Komiti. E tolu Minisita ia e i le Komiti lea ma Faauluuluga o lo o galulue faatasi mo le faamoemoe lea o le tuufaatasiga, e aofia ai la ma le tulaga lea. O lea la e tau natinati lava le faatinoga o lenei galuega ma le faamoemoe ia oo i le faaiuga o le tausaga ua tasi le faaiuga ua taunuu i ai ma amata loa ona faagaioi le tulaga o le Tulafono ina ia mafai ona aumai i le Tala o le Tupe i le tausaga fou, ona maea ai lea o lea foi taumafaiga. O lea la faafetai mo le faamanatu mai e lau Afioga, a o le tala lena, e leai e le o laaloa ai le matau ma fuafuaga a le tatou Komiti o lo o nafa ma le mataupu lea.

Lau Afioga i le Fofoga Fetalai, ona faapea atu ai lea o se matou faamatalaga....

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

FOFOGA FETALAI: E le i malie lava lau Afioga i le faamalamalama? Ia se i tuu atu pea le avanoa i le sui usufono mo Palauli le Falefa.

Afioga Hon Faumuina Tiatia Faaolatane Liuga: Faafetai lava mo le avanoa, faafetai atu foi i le Afioga i le Minisita, o si au uo faapelepele, o lea ua maua mai ae pei e foliga mai o au lea e tetee i le vaega lea. O le atamai na fai ai le faaiuga lea a le Malo o le matua maoae lava. Na pau lava le mea lea sa ou taumafai atu, o le time frame e implement ai le faaiuga. A o lea ua saunoa mai nei o le faaiuga o le tausaga nei o lona uiga e oo atu ia Tesema ua uma. Faafetai.

FOFOGA FETALAI: Malo faafetai. Ia se i faaiu mai le saunoaga a lau Afioga o lea uaí .

Afioga Hon TUITAMA TALALELEI TUITAMA: E poto tele le Minisita lea. Faafetai lava i lau Afioga, ua e maua tonu mai lava. O le faamoemoe lena, e leai se manatu e tosotosoloa le tulaga faapenei ona o le tulaga lea e popoe i ai aua nisi foi o faafitauli e ono fofoa mai ona o le tuai ona faagaioi ma faatino.

Lau Afioga i le Fofoga Fetalai, o le sao lea o lenei Matagaluega. A i ai foi ni sui usufono e le o faamalieina atoatoa i se tali atu e tusa ai ma le latou faafesili sa fesiligia ai lenei Matagaluega, ia, e tatau lava ona ou faapea atu leaga o lea e i ai le lafoga lea e taoto i le Maota e tuuaiina ai lenei Matagaluega. E le mafai ona faauma sau faamatalaga ae ou te le i afea le tulaga lea.

O lea ou te faaiu atu ai sau faamatalaga e faapea, o le \$300,000 lea sa taua e le sui usufono lea, e matua sese mamao i sini le malamalama o lea sui. O lana faaupuga, e le taitai lava le \$300,000 lea mo le faaleleia o falemai i tua. Ae sao lelei, e le taitai ona lava le \$300,000 mo mea ia. Silasila i le itulau 10 o le saunoaga tusitusia a le Afioga i le Minisita o Tupe i lalo o le Soifua Maloloina ma le itulau 11 faaperetania, o lena e aumai, \$300,000 e faatele ai le faamamatoto, ua faatupulaia le faamamatoto, ae ua le lava masini ma faatino ai le auaunaga lea, lena e i ai le \$300,000 lea. O le extension o le fale faamamatoto, ae....

Tofa Olo Fiti Afoa Vaai: Lau Afioga i le Fofoga Fetalaií O le mea e fia faasao leaga o leaí .

FOFOGA FETALAI: Se i faamaea mai lava le saunoaga a le Minisita. Faamolemole le sui usufono mamalu se i faamaea mai lava.

Afioga Hon TUITAMA TALALELEI TUITAMA: Se i ou oo atu i lou nofoa. O lenei lava nofoa malepe sa taua e le sui usufono, fai mai o le nofoa ua malepe. O lona uiga o lea sa i le falemai le sui usufono, na mai ai i le falemai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Sa ou faapea e aumai se faasea, e faasea i le togafitiga o ia ua leaga. Ae silasila i ai o lea ua savali. Ia sa lua tootoo ae o la e ua tasi. O lona uiga, o le matua lelei lava o le togafitiga o ia e le falemai, faafetai o lea ua toe maua le malosi e toe savali ai, o lona uiga ua toe maua le atoatoa, a o lou masalosalo lau Afioga, silasila foi se i faauma atu ona tuu atu lea ia te oe e te faauma maia le ta lauga.

FOFOGA FETALAI: Faamaea maia le saunoaga a le Minisita.

Afioga Hon TUITAMA TALALELEI TUITAMA: O le tulaga o mea ia e faaoga e mai i le falemai, ia manatua foi o nofoa nei e le faaogaina e fomai pe faaogaina e managers pe faaoga e teine fomai na o mai lava latou te faaogaina. A o le fesili la; o le a le mea ua malepe ai le nofoa? Ona e fesili lea? O ai lea e faaogaina le nofoa. Lau Afioga, o mea ia e tutupu....

FOFOGA FETALAI: Se i faamaea mai lava le saunoaga a le Minisita ona pasi atu lea i lau Afioga.

Afioga Hon TUITAMA TALALELEI TUITAMA: E tupu pea e le mafai ona uma. Leaga na ou te i ua tatagi le telefoni i le isi aso, ua sau le faasea a le aiga fai mai, lau Afioga i le Minisita, o le matou mai leni e tigaina, ae valaau atu i luga i le ward ae fai mai ua leai se moega o avanoa. O au ua ou inaina ou fai atu, a faapefea ona leai se moega le anoano o moega o lea na lau mai nei e tofu le potu ma le moega. Ona ou alu lava lea ou te alu e fia vaai lava i ai pe sao le faamatalaga lea, ona e le o se mea talafeagai le fai mai ua ala ona le taofia ona o le leai o ni moega. Ona ou alu lea i le potu lea e i ai ou fesili atu, ua ou vaai i le lisi foi lea e i ai tagata la e taoto i totonu, ou vaai atu, o la e avanoa moega e lima, ou fai atu lea i le au tiute, o a ia moega e avanoa mai i i ae o lea na outou fai mai o la e ua teena le isi mai ua le aumaia ona fai mai ua tumu le potu ua leai ni moega? Ona fai mai lea o sií o moega na, o moega ua gau. Ua matuai ou le malamalama pe faapefea ona tupu leni mea. Ia manatua foi le mai na o le taoto lava, a oo ina liliu, liliu i le isi pito ae gau ai ma sipulini o moega. Ou te le iloa pe faapefea ona tupu o le mea lea. E faapea foi la i mea nei o wheel chairs, e gau foi wheel chairs ia. Ma le isi foi vaega lau Afioga i le Fofoga Fetalai aua le faafofogaaga, o la e foi e toesea wheel chairs, ou te ofo pe faapefea ona toesea. O le lipoti lea na oo mai ia te au ua toesea foi wheel chairs. Ae a faapea e i ai se isi gasegase tigaina o lona uiga la le wheel chair lea na aumai i le Afioga i le sui usufono, o se wheel chair na tuuese o le a ave e lipea a o le wheel chair o la e lelei o la e faaoga nei, aua a silasila i ai o nofoa fou la e i ai nei, lona uiga la e faaoga e se gasegase e sili atu ona mai, a ua ala ona inaina le Afioga i le sui usufono, masalo ua fia vave oo i le faletaele ae ua tuai, ua popole i te i ua tupu se faalavelave ae le i oo i leí O le mea lea e faamalulu atu i lau Afioga i le sui usufono mo Salega Sasae, o le mea sili, pe na malepe lava le nofoa, a o lona na e oo ai lava i le faletaele. Ma le faaalaloa ua maea lau Afioga, ia manuia le Fono.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

FOFOGA FETALAI: Ua maea foi le saunoaga a le sui usufono. Saunoa ia le sui usufono mo Salega Sasae.

Tofa Olo Fiti Afoa Vaai: Lau Afioga i le Fofoga Fetalai o le mea e fia faasao, o lea ua faasino mai le itulau 10 i le \$300,000 sa ou taua o le mea muamua lena, e le o faia ai se fale faamama fatugao. A lea e manino mai lava, e faatele ai le maota o lo o faaaogaina e le faalapotopotoga. O le faiga o le tausiga o mea nei o falemai.

Lona lua, o si au uo lelei e 10 tausaga o ma mafuta ta te malamalama lelei i ai, o le toeaina e toamalie lava lona finagalo. O au lea ua ou tau te i ua o faalogo atu e pei ua tau tetena mai le toeaina ma lona finagalo ua tuu mai. Ae mafua foi ona tetena ona ua faatetena e Faumuina Liuga i lana lauga i le vaiaso na tea nei, a o le toeaina ia, e toamalie lava lona finagalo i lana tofa. Ma le agaga faaaloalo. Faafetai.

FOFOGA FETALAI: Malo faafetai, faafetai lava. Ua maua atu. Ia ua maea foi le saunoaga a le Minisita.

Afioga Hon TUITAMA TALALELEI TUITAMA: Ia ua uma, ta te le tali i ai i te i ua ta faapea atu ai ma ita.

FOFOGA FETALAI: Malo faafetai. Leai o saunoaga faatamalii e fai foi ma toe le tatou Fono. Faafetai, o lea lava ua faafofoga le atunuu, e le gata i le atunuu, a o le Palemene i le saunoaga manino a le Afioga i le Minisita mo le Soifua Maloloina i mea sa fesiligia ma laga e sui usufono mamalu.

Ma ua oo mai le faasologa i mea sa laga e le Minisita mo Pisinisi, Alamanuia ma Leipa.

Ou te tapa ma le faaaloalo lau Afioga i le Minisita.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): E faafetai atu i lau Afioga i le Fofoga Fetalai.

E muamua foi ona faatulou atu i le paia o le Maota i lau Afioga i le Fofoga Fetalai, tainane le Afioga i le Palemia ma le mamalu o le Kapeneta, Minisita Lagolago tainane le mamalu o le au usufono. Ofisa Sili o Matagaluega ma le mamalu o le Ofisa o le Fono.

E faatalofa atu foi i le tapuaiga a Samoa mai lava i mauga tetele seia paia maugaiti. Faatalofa aloaia faapitoa atu foi i si ou itumalo o Satupaitea, mai lava i Malaeaoga seia paia Falepau, le susu o Asiata o le Vaimalae, s s lo outou aiga Samoaleoi o le aiga na Muaimalae, Alo o Lilomaiava, Faan n ma Tuimaseve, le aiga sa Vaalomua. Afifio Tapaau o le Tonumaipea, alaatai oe o le Alataua Tapaulefano Nofopule ma Matuafia. Faatalofa atu foi i le paia o faletua ma taus, saoa ma augafaape ma le malos o le tatou nuu. E avatu foi le faatalofa i Auauna a le Atua o lo o nonomanu i totonu o lo tatou itumalo aua lava le tauasuina o le Ipuvai manino o le Ola.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolalofoaiga faaauau i luga o le faitauga faalua**

E faatalofa aloaia atu foi i nai ou aiga uma i Upolu ma Savaii aemaise foi lau faatalofa faapitoa i si ou tina o Anasoa o lo o tapuai mai.

Satupaitea, e ui o le tele o aso tatou te le o mafuta ona o le tele lava o tuatuagia. A o le agaga lava ia e fia auauna i le mea e gata ai, aua se sao o Satupaitea i upufai o lo tatou Malo. Tapuai mai laia o le a taumafai so tatou sao i lenei aso.

O paia lava o Samoa o le a le toe oo lava i ai ua uma foi ona paelago i lauga a sui usufono mamalu aemaise foi lau Afioga i le Fofoga Fetalai i lenei taeao.

Lau Afioga i le Fofoga Fetalai e i ai lava nai sui usufono sa afea ia Matagaluega o lo o ou vaavaaia i lenei vaitaimi. O lo o ou taumafai e tau tuufaatasi se tali, e manumanu foi o lo o taumafai le tatou Palemene nei ina ia pasia nei le Tala o le Tupe ae se i faagasolo galuega a le Malo o lo o fuafua.

O nisi o mataupu sa faaali mai e sui usufono mamalu, o tatou pisinisi mai fafo ma le pei se tauvaga lea ua tulai mai le va o pisinisi fai mai ma a tatou pisinisi a tatou tagata Samoa. E moni ua faatupulaia le tulaga lea, e mataulia foi o le naunautaiga o le Malo e tau toso mai a tatou pisinisi mai fafo, ni tagata invest e omai i totonu o Samoa. O lea la ua omai ai tagata, ae ua i ai isi mataupu ua tau tulai mai, o mea uma nei ua i ai foi fuafuaga a le Malo i se tulaga e tau foia ai le faafitauli lea. E pei o le atugaluga lea ua tulai mai i tatou faipisinisi laiti e pei o le a ave uma e i latou mai fafo, e pei e matele lava le tulaga lea i tatou uso mai Saina. O lo o i ai lava ia aiaiga foi a le Matagaluega lea e ala ai ona oo mai ia tagata foi nei e fesoasoani i le atiaeina o lo tatou Malo. Ae o le tulaga lea ua tulai mai e pei ua alu alu tele i luma le ola o pisinisi nei a Saina. O lau lava faamatalaga e masani ona fai, se maumau foi pe ana faapena a tatou foi faipisinisi. Ioe atonu e le tele ni a tatou tupe ae ou te lagona foi e le faapea o Saina uma la e omai e tele ni a latou tupe, ae popoto e fai pisinisi. A tatou maua la sina vaega o le tulaga lea, atonu o le a tatou galulue faatasi lava ma nai ia foi tagata mai fafo, aua le atinae o lo tatou atunuu. O lo o i ai foi le toatele o tatou tagata o lea ua maua ai galuega i totonu i i i pisinisi nei ua fai mai. O le naunautaiga lena o le Malo ae o lea ua i ai tulaga ia ua tulai mai, ua i ai foi le fuafuaga a le Malo.

Ua iinei le pepa a le Matagaluega sei tilotilo i se auala e mafai ai, aemaise lava le alu atu le i tua o tatou pisinisi i nuu i tua, ina ia taumafai e fai se faiga ina ia aua ne i oti a tatou pisinisi, pepe a tatou pisinisi i nuu i tua o lo o tua i ai nai o tatou tagata pisinisi laiti ona o le alu atu i tua o pisinisi nei mai fafo. O lo o i ai la se fuafuaga e ave se pepa i le Kapeneta o lo o ua i luga nei o lau kesi le briefing paper se i tilotilo i se faiga e ono mafai ai ona faaola pea ma uunaia le fia omai pea o tagata e fai a latou pisinisi i Samoa e aunoa ma se faapea o tatou ua i ai se tulaga ua tatou mananao mananao i tagata e omai, ona omai lea iinei ona tatou toe faliu atu lea ua fai i ai nisi tulaga ua oti ai a latou pisinisi. Ae o le taumafaiga ina ia i ai se auala ia aua ai ne i aafia tele ia tatou pisinisi a nai o tatou tagata i nuu i tua, ona o le tulaga lea ua vaai atu ua gasolosolo atu lava pisinisi a i latou nei i nuu i tua.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

O le tulaga ua tulai mai, ua atili ai le vave o le tulaga lea ona ua i ai a tatou tagata ua fai aiga ma fai paolo ia i latou mai fafo. Ona lesitala loa lea o le pisinisi i lalo o le tagata Samoa, avea foi ma le tagata lea ua sau mai fafo ma se tagata Samoa, ona lesitala lea o le pisinisi o le tagata Samoa. E faigata tele la ona fai se fuafuaga i ai ona o le aia tatau lena a le tagata o le fai o le latou pisinisi, lesitala o ia o le tagata Samoa po o lana paaga o le tagata Samoa. O lea la e tilotilo foi po o le a se faiga ina ia aua ai ne i tele le aafiaga o pisinisi a o tatou tagata ona o le tulaga lea. Ae pei ona fai atu, ua i ai foi auala ua maua ua fai paaga atonu e le faipaolo ae ua fai paaga le tagata Samoa ma le faipisinisi mai fafo, lesitala loa le pisinisi ua lesitala i le tagata Samoa, ae o la lava e masalosalo o tupe nei o tupe mai fafo. Ia o le faatupuga lava o le pisinisi, ona e le o taea i totonu o Tulafono o lo o i ai nei. O lea foi ua i ai le manatu o le Matagaluega nei, se i toe tilotilo i le Tulafono po o le a ni auala e mafai ai ona fai ni fuafuaga ae le without appearing to be discriminating against foreign investors. After all o le mea lena o lea sa tatou mananao ai e omai ni foreign investors i inei. O le tulaga ua i ai nei le Matagaluega, o lea ua taofia i le taimi nei ona toe lesitala mai ma toe issue i ai ni foreign investors certificate ia i latou e omai e fia faatu a latou faleoloa, retails. Ua i ai le manatu se i tau tilotilo po o ua, flood le tatou atunuu i mea nei o retail, ma tau faapeapea atu ai ia tatou pisinisi laiti, aua e pei o le tulaga lea e i ai o mea nei o faleoloa lea e tele ai a tatou tagata i nuu i tua. Na o se faiga le tumau, se i tilotilo po o le a se tulaga e i ai ona fai foi lea o se pepa e ave i le Kapeneta ma ave i ai ni fautuaga, po o le a le tulaga e tatau ona i ai ia le mea lea e pei ua tau tulai mai, e tau lava ina tau faatutusa ia le competition aua ne i overwhelming le malosi o pisinisi mai fafo.

Sa taua e isi sui usufono mamalu le unfair competition, ia o le tulaga tonu lava lena. O lea ua i ai le tatou Tulafono lea o le Competition and Consumer Act lea e amata nei i le vaiaso fou. O le Tulafono lena e tau faapaleni ai le Playing Field leveling the Playing Field i tagata malolosi ma tagata e le malolosi tele. E tele ia o aiaiga la e sau ai i totonu o le Tulafono lena, ma o le aso 3 o Iulai o le a faamalosi ai le Tulafono lena. E tele lava fesoasoani ia aua nei i ai le mea lea, a malosi lava le pisinisi ia, ua pule lava ia i le tuu i lalo tuu i luga le tau o ana oloa, ae disadvantage ai le pisinisi laitiiti o la e tau faaolaola. O le tasi o aiaiga o le Tulafono lena o le a faatuina se Komisi, o se Komisi e aafia ai le Regulator ma nisi e toalua, o latou na o le a feagai ma ni faafitauli e tulai mai pe a faagaoioi le tatou Tulafono lea. O le tele ia o mea na e i le aiaiga e faasa ona faia, e ala ona faasa ina aua ne i advantage ai le isi faipisinisi po o le aufaipisinisi lapopoa ae oti le isi faipisinisi laitiiti. O le augatonu lena o le Tulafono fou, o le a faamamaluina i le vaiaso o lumanai. O lenei foi Tulafono ua leva ona faasalalau. Ua atoa lelei lava le 12 masina o fai ia consultation ma workshops a le Matagaluega, e faalauiloa i le atunuu. Sa fai foi faasalalaua i luga o le Televisi o le leitio ina ia malamalama aemaise lava le mamalu o le atunuu faapea foi le aufaipisinisi i aiaiga o le Tulafono lea pe a faamalosi.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

E i ai se mataupu lea sa tulai mai faapea o le 1 lelei o le vetting process, o tagata ia mai fafo. O process lava o lo o i ai o le process lava o lea sa lelei, se i vagana la ua i ai ni tulaga ua tulai mai ona faapea lea e tatau ona sui, ae e i ai lava taimi e review ai uma process nei. O le taua faapea o nisi e omai ona leai lea o ni pisinisi e faia. O lo o i ai lava vaega o le faagasologa o galuega a le Matagaluega e o ai i tua e asiasi po o fea tonu lea e fai ai le pisinisi. E i ai foi la le mea ua tupu, e pei ona ou taua muamua le taimi na fai ai le application o le foreign investor certificate ma le taimi e alu atu ai le asiasiga, ua lua tausaga o la e i totonu o le Tulafono. E alu atu ua le tu le pisinisi i le mea na fai mai ai, ae o la ua tu i le fanua o lona toalua i se nuu i tua. O faafaigata na o lo o tulai mai, ae o lo o fai lava galuega a le Matagaluega e o i tua, e asiasi po o fea tonu lea e tu ai le pisinisi, aua e avatu e matou le foreign investor certificate ona faatoa o lea i le Matagaluega o Tupe Maua e issue mai lo latou laisene e faagaioi le latou pisinisi, o aiaiga lena. O lea e faamoemoe e tuu mai i le tai tasi le tausaga ma o le Matagaluega e sue po o fea tonu lea e faatu ai le pisinisi. A o le application ia e omai e atoatoa lava ia faamaumauga o lo o manaomia before e issue i ai le foreign investors certificate e le Matagaluega o Leipa. O le tulaga lea faapea o i latou e pei o le aualii lea na omai o e taumafai e gaioi le masini teutupe, e leai se faamaonia o na tagata na ui mai i le Matagaluega. Ma e leai foi se mandate a le Matagaluega e latou te suesuea ai ia criminal backgrounds o tagata nei. Pau lava le mea lea e tilotilo i ai le Matagaluega o le latou agavaa e fai ni a latou pisinisi i Samoa, good character ma mea faapena. O mea ia o criminal past ma mea na, e i ai le form lea e tufa mai i luga o le vaalele, o i ina tonu lava e declare ai e le tagata ni ona tulaga faapena fesootai lea ma le Matagaluega ma le Ofisa o le Immigration ma iloa ai po o se tagata lea e tatau ona ave i ai se certificate e fai ai lana pisinisi. O le tulaga lena o la lava e galulue le Matagaluega i le process o lo o alu ai, so far, o la lava e work. A o isi mea ia e tutupu mai, e pei ona ou fai atu e le o maua po o ni tagata nei na omai e fai le la pisinisi pe leai le au Saina lea ua maua na tau o gaioi le masini ATM. O nisi sa tulai mai e faaali lo latou manatu i child vendors, ona o lea lava mataupu eí .

Afioga Leana Ronnie Posini: Lau Afioga i le Fofoga Fetalaií .

FOFOGA FETALAI: Lau Afioga i le Minisita, se i tulai mai le sui usufono mo le itumalo mo Safata Sisifo.

Afioga Leana Ronnie Posini: Faafetai i le Afioga i le Minisita i lana faamalalamaga o le mataupu lea. O le mataupu lea sa ou laga foi i lau lauga mo faipisinisi ia mai fafo. E pei o lea e matau atu o lea foi e malamalama e tai lua tausaga ma siaki ia le au foreign investors lea i a latou pisinisi.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

A o le mea sa ou laga lau Afioga, o pisinisi ia a foreign investors ia ae ua ova ma le tai sefulu ma ona tupu tausaga e le i faia lava le pisinisi. Po o le mea o la e faataga lava ona ave pea i ai le laisene lea e fai ai a latou pisinisi ae ua ova ma le sefulu tausaga e le o faia le pisinisi lea na apply atu ai i la outou Ofisa? Ma le agaga faaaloalo.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon LAUTAFI FIO SELAFI PURCELL: Faafetai i le sui mamalu, ou te le o malamalama o i ai ni tagata faapena i totonu o le tatou atunuu. Aua o tausaga uma e tatau ona faafou ai le business license. O le matafaioi lena a le Matagaluega a Tupe Maua po o faaauau pea lena pisinisi pe leai. O matou o le Matagaluega o Leipa e tai lua tausaga ma o e vaai le pisinisi, i lalo o le Tulafono lea e i ai ae o lea o le a sui i le tausaga, ina ia o faatasi ai ma gaoioiga a le Matagaluega a le Tupe Maua, ia faafou le certificate faafou ma le laisene. E o le Matagaluega a matou e tilotilo po o fea tonu lava le mea lea e tu ai le pisinisi. E leai la se mea ua oo mai ia te au e faapea, e sefulu tausaga talu ona i ai tagata nei. Ou te le iloa la po o issue la ni a latou business licenses pe leai. Atonu se i taatia mai se i talanoa i le Matagaluega po o i ai ni tulaga faapena o tupu, po o le a le mea ua tulai mai ai lena tulaga? Aua afai o lea na o mai fai pisinisi e tatau foi ona aafia ai o latou immigration status i lalo o le tulaga lena. Ae faafetai o lena ua e faali mai e i ai nisi, atonu se taimi pe a uma ona e oo atu lea i le Matagaluega se i o tatou talatalanoa, po o ai tonu lava tagata ia e te silafia. Ona faafaigofie ai foi lea o le galuega a le Matagaluega ia, se i ese le investors certificate ma se i laisene o latou pisinisi pe afai e le o faatinoa.

FOFOGA FETALAI: Malo faafetai. Atonu o lea ua uma.

Afioga Leana Ronnie Posini: Lau Afioga i le Fofoga Fetalai. O lea ua malamalama ia le saunoaga a le Minisita, atonu e i ai se taimi ona ou faailoa atua lea o Kamupani ia matou te galulue ae o lea ou te iloa foi e le o faatinoa lava le tulaga lea o latou pisinisi na agai mai ai i totonu o le atunuu. Ma le agaga faaaloalo.

FOFOGA FETALAI: Malo faafetai.

Afioga Hon LAUTAFI FIO SELAFI PURCELL: Faafetai. E pau lava le agaga ne i te i ua avea nei tagata ma tagata Samoa o le tatou atunuu. Aua o lea e faapea lava tatou o lea lava e foreign investors, ae pei o le tulaga lea sa ou faali atu, ua taunuu mai nei ua fai paolo solo ma ua maua ai o latou status o tagata Samoa.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafogaiga faaauau i luga o le faitauga faalua**

O le vaega lea o child vendors e le o se mataupu faigofie lenei mataupu. Sa i ai foi ni manatu lelei sa tuuina mai. E leai lava se isi o tatou e le i ui mai i lea tulaga. Sa ou faatau talo foi au ia, i aso o ou laitiiti. E leai lava sou manatu faapea o la e avea au ma se tagata faigaluega child labour, e leai o lou lava aoga i le tausiga o lo matou aiga. Ou te alu e faatau talo i nuu na e tuaoi e maua ai le tupe e totogi ai lou pili, ma ou alu ai i le aoga. O le taimi la lena i le environment sa tatou faia lena mataupu ma na galuega, atonu ua sui le olaga mai le taimi lenei. O le taimi lena pe faa tasi ona ui atu se taavale, sau lau solofanua ma lau avega talo alu lava i o toe foi i le afiafi, e leai lava se taavale e sau. E leai la se popolega i lavea se tamaitiiti i se taavale. O le mea lea ua tulai mai, ua alu i luma le, this is fifty years ago po ua ova atu foi le suiga o le olaga o Samoa, lea la ua tulai mai ai faafitauli nei, toe sau ma aiaiga Faavaomalo le UN Convention for the Right for the Child, ILO Conventions for Child Labour. O nei mau mea uma ua oo mai ua puipuia atili ai le faaogaina o tamaiti e faia ni galuega ae le o e aoga fai a latou aoaoga ma atinae lo latou lumanai. O i ina lea ua feteenai ai ia mea, ona ua ese le environment ua tatou o i ai, feoi solo tamaiti i Apia ua tai solia ane lava e taavale vaeane lava le faafofogaaga a Samoa, toetoe lava a soli e taavale. Ua aggressive foi tamaiti ua toatele tagata ua o atu lava i taimi uma ma ua avea ai ua tele lava le faaletonu i le silasila foi a le atunuu, ua oo i po ua le o i aiga ae ua momoe solo i tai, ona o tulaga faapena.

O lea sa i ai le saunoaga a le Afioga i le Minisita - ua i ai nai tulaga ia tau silasila i ai le Malo e faafoia ai le fafitauli lea. O lea foi na i ai le study lea na fai e le ILO, le Rapid Assessment for the child vendor i Samoa, lea sa launch foi i le tausaga lenei. O lo o i ai ma fautuaga, lea la ua faatu ai ma le task force e o e tilotilo i recommendations nei ma taumafai e faatino. O le assessment lena e aafia ai ma matua, na o lava i matua talanoa i ai po o le a lava le mea ua ala ai ona ave tamaiti e o e faatau mea ae le o tamaiti i le aoga ma vaai lelei ia omai i le fale. O le tele ia o faafitauli o lo o faailoa mai i na faatalatalanoaga, o lea la ua base ai i luga ia recommendations. O lea o le a taumafai le task force lea e aafia ai Matagaluega o Tina ma Tamaitai, o le Matagaluega o Leoleo ma le MCIL, tulaga faapena e taumafai e tilotilo i se auala e taufafoia ai le mataupu lenei. E pei ona fai atu, o le faatauina lava latou o mea, e le o se mea leaga, but a le control ina le environment ona tulai mai loa lea o mea nei. E oo lava i tiute fai o matua, aua le natia o faamatalaga, tiute fai o matua e le vaaia faaleleia o tamaiti, ua sili le o atu e sue mai tupe. O le isi mea lea tatou te tilotilo i ai e alu ifo lava i o le tamaitiiti a o lea e nofonofo i i le matua ma tilotilo atu i ai. E lua lava mea e tulai mai, o le a le mea ua le alu ai le matua ia e faatau mea na, leai leaga foi e le alolofa i ai tagata, e alolofa i tamaiti, ia faatau lea o le afitusi ma mea na. A o le selling strategy e o tamaiti e fai ae nofonofo le matua. O la lava e nofonofo mai le isi itu le matua ma tilotilo mai i le tamaitiiti lea e fealuai solo i le va o taavale. O le tulaga lea ou te fai atu ai, e i ai foi lava le matafai oi o matua e le o faia. Ma e galulue faatasi uma lava Matagaluega ma tatou community at large e tau foia le faafitauli ua tulai mai. Sa saunoa nisi oí .

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Afioga Hon Faumuina Tiatia Faaolatane Liuga: Lau Afioga i le Fofoga Fetalai .

FOFOGA FETALAI: O lea sa taua e le sui usufono mo Palauli le Falefa sa faatau popo. Se i tulai mai.

Afioga Hon Faumuina Tiatia Faaolatane Liuga: Faafetai mo le avanoa lau Afioga i le Fofoga Fetalai. E le fia faalavelaveina foi le saunoaga a le Afioga i le Minisita. E pau o le mea, o lea foi sa faatau talo ma faatau popo a o lea e lelei sa faaoga le solofanua. E sao lelei, aua o le matou pitonuu i Palauli e masani ona fealuai ai le Afioga i le Minisita e faapea foi i lo matou pitonuu. E pei o le mea lea na ou tuualalo atu ai, e le gata o lau Afioga i le Minisita o Leipa faapea foi le Minisita mo Aoga, se polokalame e aoao ai tamaiti. Aua ou te iloa foi o a outou Afioga lea e usupo i le maketi ia i le Aso Sa, e laga mai tamaiti siosio oe i tipolo ma mea faapena. Ona ou fai atu lea i ai, õua lelei ou te faatau au tipolo pe a tau mai le tali o le mea, o ai le tagata na folo le manoo e leiloa e se isi, ia a o Iona. E pei la o nai mea na o le educating ina o nai tamaiti ina ia maua, ae le faapea ou te fai atu e aua le o i le aoga, e leai. O tatou uma lava lea na tatou faia le mea lea, leai ma se isi o valea, ma lou faaaloalo lava.

FOFOGA FETALAI: Malo. E fou foi i la ta faalogo lea fesili. Ai o se manoo o Palauli le Falefa. Tulai mai le Afioga i le Minisita e saunoa.

Afioga Hon Faumuina Tiatia Faaolatane Liuga: Lau Afioga ona o lea tatou te mafaufau o le sami na i ai le ia na foloa Iona, e le o le sami o le vaituloto i le itu i matu o Iraq, ma lou faaaloalo lava.

FOFOGA FETALAI: Malo faafetai.

Afioga Hon LAUTAFI FIO SELAFI PURCELL: Lau Afioga o le mea lea e umi ai la tatou fononoo o le sau ai o ituaiga faamatalaga faapea. Ou te le iloa lava po o ai se tagata na folo e se manoo. O le mea o le manoo, o le mea lea e iloa ai le tagata e le iloa fagota, o le manoo e faapea le laitiiti, e faapea. E faapefea la ona folo? Se ou te ofo, e tauvalea ai leí o taua e ta te soosootauau tulutulu i o i Savaii a o lea o le a fai nei faaupuga, ia tuuaia ia.

Ia tasi lena fautuaga i se auala pei o auala nei lea na ou fai atu ai, in a holistic approach. E aafia ai matua, community, ofisa o aoga i se faiga e mafai ona fai lo latou finagalo lea in a very controlled way, tausaga o tamaiti e mafai ai ona o e fai mea ia, o le a itula e tatau ai ona mafai ona faataga ona o pe a tuua le aoga? Ia ma tulaga uma faapena, ia sefe le tamaitiiti e oo i le taeao o la e malosi e alu i le aoga, ia atiae lona olaga mai lona laitiiti ae avatu ai ma isi responsibility lea e atiae ai lona mafaufau, e i ai lona responsibility i totonu o le aiga.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

E tasi la lea mea e mafai ona alu fai faatau le tau ia, o mea lava na latou ua leva e faatau ai luma o fale, pei o lena, ae ua tulai mai le environment lea e especiafully lava e around i Apia, ia pei ua tilotilo atu, ua tele lava le faaletonu ona ua le o isi tamaiti i o latou aiga ae ua momoe solo i polotitoí .

FOFOGA FETALAI: Ia e fautuaina e see ese mai lea mea ua lavaí .

Afioga Hon LAUTAFI FIO SELAFI PURCELL: Ia o lea o le a ou alu ese.

Sa i ai foi se isi sui usufono mamalu, le sui usufono lea fai mai na folo Iona e le manoo ia mea o Boards. I le taimi nei ua faagasolo le review a le Matagaluega o Public Enterprise aafia ai ma le Komiti Faapitoa foi lele Independence Select Committee, e le gata i le aofai o Board Members i totonu o Matagaluega Tumaoti nei a le Malo, ia a o tomai foi po o tumau pea tomam sa i ai i le 6, 7 tausaga talu ai i le taimi lenei, ma ua maea ona fai le review i se tasi o Matagaluega, e le faapea o fai atu o le a faaitiitia, aua o lo o i ai foi tatou Tulafono o lea na ala ai ona tofia le aofai lea ma tomam nei ae o lo o i ai le review o lo o fai e tilotilo ai po o agavaa pea ia pe ua tatau ona faaitiitia. E manumanu i le mea foi lea o le tatou manumanu i a tatou tupe, aua ne i alu le tupe faapea i le totogiina o a tatou Komiti Faatonu ia ae opu ai la se vaega o le auaunaga e mafai ona latou faia ona ua tatou aveesea maia nisi tomam faapitoa i totonu o Boards, o lo o i ai lava le tulaga o le Tulafono o la lava e savalia e le Komiti lea ma le Matagaluega, ae ua amata ia reviews a le Matagaluega ona oo foi lea i le Kapeneta mo se faatagaga o ni fautuaga.

O le vaega o le UTOS, SIFA ma le Development Bank, ia ua uma ona ma talanoa ma le Afioga i le Minisita i se auala e mafai ai ona aua le aafia le vaega lea aemaise lava le SIFA UTOS i Tulafono foi ia mo Public Trading Bodies ona e le natia aemaise lava le SIFA e tele atu le latou tupe o lo o aumai i totonu o le atinae o tatou taaloga ma tulaga uma faapena, o le mea lea e tausisi i ai le tatou dividend policy lea e fai nei. Ma e ua uma la ona ma talanoa ma le Afioga i le Minisita, ia o le a suesue se auala e mafai ai ona galulue lava le Matagaluega lea i latou lava business as usual, ae aua le ponatia foi lea ona o Tulafono ia tau Tupe Maua ma Tupe e tatau ona aumai i totonu i le faaiuga o le tausaga. Ae taatia mai le mataupu lena o le a faaauauí .

Afioga Hon Faumuina Tiatia Faaolatane Liuga: Lau Afioga i le Fofoga Fetalai, ia leai o leí .faafetai o lea ua saunoo le Afioga i le Minisita i le UTOS ma le SIFA, ae o le DBS lea sa e taua, ia o le DBS e faalagolago i ai pisinisi ma le aufaifaatoaga, a saili la tupe mama, e tasi lava le mea e fai e le DBS, o le ave i luga o a latou tului ia ona afaina ai lea o pisinisi ma le aufaifaatoaga. Pei o le ala lea na avatu ai se tuualalo, po o le a se finagalo o lau Afioga ma le Kapeneta i le tulaga e aveese ai ma le DBS. A silasila i le DBS, e leai se taimi mai le amataga e tau mai i le taimi lenei o i ai se tupe mama. Ma lou faaaloalo lava.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

FOFOGA FETALAI: Malo faafetai.

Afioga Hon LAUTAFI FIO SELAFI PURCELL: I lou lava talitonuga, a lelei lava ona faafoe le DBS e maua a latou tupe, ae taatia mai se i ma talatalanoa ma le vaega uma lea i lalo le Afioga i le Minisita. Ou te talitonu e le o ao uma mai tupe e tatau ona aoina mai, e le o lelei foi le collection performance a le vaega lea, ae atonu o ni performance measures na e silasila i ai le Afioga i le Minisita, ae o mea lava e mafai ona fai. Afai lava e fautua mai le Afioga i le Minisita o Tupe e aafia ai ma le DBS, ia o le a fai foi se faiga ia ona tuu atu lea i le Malo po o le a le finagalo.

O le sui usufono sa taua faapea o fanua i Vaimauga. Ia na ou talanoa atu foi i le sui usufono mamalu lea i le taimi ua fano i le isi tausaga, o lea lava ua i ai fanua na ua avatu ma le itumalo, e 76eka na ua avatu e lease to own, e 80eka lena ua toe faamatuu atu e lisi e le o lease to own, ia a o le isi 90eka, ia o lea foi na auina atu, o lo o tau faaavanoa mo le toatele o lo tatou atunuu o lo o tusi mai pea ma talosaga mai aso uma, aso uma i sina ¼eka e nofo ai. Pau na o nuu o lo o maua ai tulaga faapena lea lava e faagasolo ua uma atu iinei i Nu'u, Falelauniu i lau tilotilo atu i tua atu, ia tasi la ia vaega. Ae pei ona fai atu, onosai pea atonu e i ai se taimi ia ona i ai lea o se tofa ma se manatu o le Malo pei o le tulaga o le mea lena e te fai mai e faatau atu ia le isi 80eka e lisi i le taimi nei, ae o le taimi nei e le o i ai se fuafuaga faapena. O lea ua uma ona avatu le 76eka, se ua lava ia lena, ae faaalu pea e lisi ia ma le isi 90eka lea e faamoemoe se i tau tuutuu ai i lalo le manao o le toatele o le mamalu o le atunuu o lo o tagi mai pea i ni nai fanua e tua mai i ai i le taulaga. O fuafuaga na a le Matagaluega o lo o taumafai ai pea e feutagai ma lou itumalo. E pei foi ona ou fai atu i le tausaga na tea nei, ia e manaomia lava le fesoasoani a sui usufono, e faigofie galuega a le tatou Matagaluega pe a o atu e feagai ma alii ma faipule o nuu, ia solo lelei ia fuafuaga o lo o fai, aua lava le lelei lautele o tagata o lo tatou atunuu.

Sa faapea mai foi le sui usufono mamalu, pe maua se tau i o nai aiga ia i Fagalii ona o le malae vaalele. Ia o le tali lava lena. E leai se fuafuaga faapena a le Malo o i ai. Aua a tatou faia nei lenei mea, o lona uiga, ou te le iloa la po o a ia le ituaiga fuafuaga o le malae vaalele tetele o le a toe aafia atu foi ma o i Faleolo ma isi lava malae vaalele pe a faapea o tagata uma lava e oso atu ai le vaalele i luga e manao e tatau ona maua atu se tau. E i ai fuafuaga a le Polenisia a le tatou Malo e faatele le malae vaalele, o le faatelega lena e tuutiitia ai le tutupu mai o faalavelave. O lo o i ai foi nai aiga na o lo o i luga o le siusiu lava o le malae vaalele, o lo o taumafai ina ia aveese mai i ina, ona la o le mea tonu lea e te fai mai, e fia faatele le malae vaalele ma e le sefe ai i latou i ina i le tulaga lena, ia a o la ua faatalatalanoa e siitia i se isi mea ae faatele mai le malae vaalele ina ia aua ai ne i ai se avanoa o ni tulaga faapea e ono aafia ai ma tagata o le pitonuu ona e le o sefe le malae vaalele ona o le puupuu.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

O le tulaga lena o lo o i ai ia faatalatalanoaga ma aiga na, e tuu atu foi i lau Afioga i le sui usufono e fesoasoani ane i le itu lena. O le tulaga lena o i ai le Malo, ia sefe i latou, aua ne i aafia pe a i ai se tulaga faapena ma se i fai galuega a le Malo i le malae vaalele ia faatele, ona faaitiitia ai lea o le risk i le tulaga e ono tulai mai.

Lau Afioga oí .

Afioga Sulamanaia Fetaiai Tauiliili Tuivasa (Vaimauga Sasae): Lau Afioga i le Fofoga Fetalai ma le paia o le Maota, pe maua se avanoa?

FOFOGA FETALAI: Ia tulai maia, saunoa le sui usufono.

Afioga Sulamanaia Fetaiai Tauiliili Tuivasa: Faafetai i lau Afioga i le Minisita, matagofie lau saunoaga ua usi foi le faafofoga a le Maota ma le matagofie o le faamalamalamaina o mataupu uma i lalo o lau Matagaluega.

E pau lava le agaga o le sui usufono lenei o fanua ia sa ou talosaga atu ai o le tau, e mananao lou itumalo e aumai se tau lea na ou talosagaina le \$8000 lea i le eka, ae o la ua matou le lavava lisi, ua matou fia fesoasoani mai i le tatou Malo i le tuina mai o le tai \$8000 i le ¼eka e fesoasoani ai i le utiuti o tupe. Ae o le tulaga o le lisi lea, faafetai i le lisi o mea ua faamatuu atu, ona o fanua ia e i lalo o Vailele, Letogo ma Fagalii, o la e avatu i lalo o le pulega a alii ma faipule. O le agaga la lea sa taumafai atu ai i lau Afioga i le Minisita i lou tulai mai, ia o fanua la sa faatau o lo o i ai fanua freehold land o lo o faatau i i sa tai \$8000 i le ¼eka i lena vaitau lea. E pei la o le agaga lena o le sui usufono lea e avatu, a e malele mai lavaí .sa ou tautala i le amataga o le Fono i le tausaga ua tuanai, ia faapea au ae sa maua i lau lauga ua talia mai e leí .sa saunoa ai le Palemia leaga sa pe le paoa. A o lea ua toe faamanatu atu, leai ua matou le lavava lisi, ua matou mananao e aumai sao loa i se tau, ia ona lesitala lava lea i lalo e uma ifo, ia o fanua lava faaleaganuu. Ma lou faaaloalo lava i lau Afioga i le Minisita.

FOFOGA FETALAI: Atonu ua manino le faafofoga a le Minisita, e le i fausia Roma i se aso e tasi.

Ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, i le fofou maiga o eleele nei, e tele eleele sa avatu i o i lou itumalo. E toe sue atu isi ua leai, ua faatautui e le toatele o aiga. E i ai le isi toaina na matua sau lelei lava ma toe ofo mai ia te au ia lona fanua, ae ou saili atu, o eleele ia faalisi. Pei la o tulaga ia ua e toe tigaina i le taimi lenei ona o le faaletonu o tagata na i ai i lena taimi ua leva, ua ova i le 30 i le 40 tausaga, o le ala lena ua ala ai ona tumutumu ai o i Vailele ma Letogo i tagata eseese, ona ua faatau tiai ai e outou lisi, ae sa lisi.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Ia o le mea la lenei na omai loa ia Tofilau ma felogonai ma Tofilau, fai ai loa le tonu lenei, o le Vailele lava po o le Letogo ua faatau lona fanua faapea o la e lisi e le i o la e pulea e le Malo, faamuta ai loa i ina ae ave loa i tagata ia na ave i ai. E tatau foi ona fair i nei tagata ia faiga faapea ua tigaina e totogi ma o atu faatoa. Ia o le tulaga lenei o lea sa i ai, ua e toe tigaina, a, i le taimi lenei ona o le faaletonu tele o tagata na i ai i na aso, o tou matua i le vaaiga o fanua nei na avatu.

Ae o tulaga foi e faaeteete i ai le Faalapotopotoga, o le tele o tagata na ave i ai fanua i le agaga lea o tagata tau atiae, e toe sue atu, ua nonofo ma faatau i tau o aso nei i le au maumea, ia ona uma ane lea ua tai 4, 5, 6 ia eka a isi tagata maumea ona ua faatau i ai, aua foi e le valea foi o tatou tagata, a? A avatu loa le tau taugofie ona nofo loa lea ma ave i le tau lea e i ai i le taimi lenei. Ia e na o se Malo faavalevalea e mafai ona fai ai se mea faapena. O le tagi mai o le tagata e tuu atu se ¼eka i le \$8000, ae na ona mamulu atu lava faalogo atu, lea ua faatau i le faipisinisi lale i le \$200,000 ia le fanua. O le mea lenei o lea e faaeteete tele ai le Malo, ona o tatou tagata foi ua matua atamamai tele foi i mea faapea, e faaoga le alofa e auala mai ai le talosaga, na ona alu atu lava fai loa ma le mea e le amiotonu.

FOFOGA FETALAI: Malo. E le fou le faamalamalama a le Malo i le tulaga lea. Ae ui i lea, o le mea sili ua maua le avanoa e toe faapupula ai e le Afioga i le Palemia ia le tulaga lava lea e le fou foi lenei mataupu, ae ui i lea, ia o lea ua faamalamalama e le Afioga i le Taitai o le Malo, ma ua manatu ua malamalama ai foi le mataupu, vagana ai le elele i Fagalii, se i silasila ifo i se isi feutagaina a le ofisa ma lau Afioga ia ma i latou o lo o aafia.

Ia tulai mai le Minisita.

Afioga Hon LAUTAFI FIO SELAFI PURCELL: Faafetai atu i lau Afioga faafetai atu foi i le Afioga i le Palemia. Atonu o le mataupu foi lenei sa faamalamalama i le tausaga na tea nei, ma e mo le silafia e le sui usufono mamalu, ua le toe faia e le Malo le mea foi lea o le lease to own e tagata o latou mea i nei i nuu ma...mea ia sa fai, ona o le tulaga tonu lava lea, e toe o atu i ai, ia ua ese tagata la ua nonofo mai ai ua nonofo mai ua 3, 4 ia ¼eka a i latou e gafatia, ia ae ua le iloa po o fea le vaega lea na omai ai e talosaga mai e avatu se meaalofoa a le Malo se i nonofo ai ma faataugofie atu i ai. O le tau o le ¼eka i o i Vailele e \$35,000 le maketi la ua i ai. Ia ae pei lava ona fai atu, e fai lava ma tatou talatalanoa ma e fesoasoani i galuega a le tatou Matagaluega pe a o atu e ono maua ai foi se malamalama i le va o outou itumalo ma le Matagaluega.

Lau Afioga sa i ai se sui usufono mamalu sa talanoa mai i le feagaiga lea sa sainia e le Malo, lea na ou alu atu i Tonga i le lua vaiaso talu ai, PACER Plus, faapea sa i ai se vaegatupe e \$600,000 lea na taua, faapea sa talanoa i ai le tamalii lea o le Trade Advisor lea sa galue mai ai lava i le faiga o le feagaiga lenei tau feaatauaiga mai le amataga. Ou te le iloa po o le a tonu le context sa talanoa ai i le \$600,000 lea, e le...

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

FOFOGA FETALAI: O se mataupu sa laga e sui usufono?

Afioga Hon LAUTAFI FIO SELAFI PURCELL: Ioe o le mataupu sa laga e le sui usufono....

FOFOGA FETALAI: Se i tulai mai le sui usufono mo Vaisigano Nu.1.

Tofa Lopaoo Natanielu Mua: Faafetai i lau Afioga. I le tatou semina sa fai mo le faalauiloaina o le mataupu lea, sa agia i le saunoaga ina ua fesiligia, po o le a le tele o le aafiaga o tupe maua a lo tatou atunuu i lafoga e aofia ai? O le aofaiga ou te manatua na taua e \$600,000. Ae pei o le agaga lena na ala ai ona ai lea, na fai le tatou semina i le aso lena e le i i ai ni sauniuniga fai e le i iloa le mataupu lea o le a talanoaina. Ae mulimuli ane te i ua fai atu se suesuega, a fuafua i le vaitaimi o le 2015 e \$111miliona le tatou import mai a Niu Sila, so, a faapea e faaliliu tala Samoa o le tiute e ono maua e tusa ai ma faamaumauga a Niu Sila ia i le aofaiga o oloa ia e aumai i Samoa, e \$111miliona la po o se mea o le \$15miliona. O le aofaiga la lena e fai sina tele atu nai lo le aofaiga lea na taua i le taumafaiga foi lele e faamalamalama ai le mataupu lea. Ma le faaaloalo lau Afioga.

FOFOGA FETALAI: Faafetai lau Afioga, o lea ua uma ona taua ma asa e le Afioga i le Minisita mo Tupe Maua le tulaga lea ma le Minisita o Tupe, a o lea ua toe laga le mataupu lea, ae ui o lea....Tulai mai lau Afioga i le Minisita mo Leipa ma Fefaatauaiga.

Lau Afioga o lea sa tau faamatala atu, o lea na saunoa mai le Minisita mo Tupe Maua o lea o le a tali mai i ai le Afioga i le Minisita mo Leipa ma Fefaatauaiga, ma le faaaloalo.

FOFOGA FETALAI: Ia lelei, tulai mai le Minisita.

Afioga Hon LAUTAFI FIO SELAFI PURCELL: Faafetai. Ia e pei ona ou fai atu, ia ou te le i iloa tonu po o le a le \$600,000 lea, ae e leai e le pau lea o le tatou aafiaga i a tatou tiute. O le enforce ina foi o tariff nei, e alu lava mo le isi 25 i le 30 tausaga, e le faapea la e tasi lava le tausaga maua loa se aofaiga o le aafiaga o tatou tiute o le a le toe maua i le tatou Boarder. E tele mamao atu i lo le \$600,000 lea ia le tatou tupe o le a le maua, ma o lea e i ai fuafuaga a le Malo o mea nei o trade agreements e tele lava le gaogaosa, ma o lo o i ai foi ia ni fuafuaga a le Malo ia, e faapefea ona tatou tilotilo e toe maua mai ai le tatou tupe lea o le a aafia ona o le faatinoga o tatou maliega lea.

Lau Afioga ma le mamalu o le Maota, ua lata i le sefulu tausaga o faatalanoa ia le feagaiga lenei i le vaega lea e tau o le PACER Plus, a o tua atu sa i ai le PACER ia pe ono tausaga, a fuafua la i ai ua sefulu ma le ono tausaga o talanoa ia mataupu uma nei i totonu o le feagaiga lenei, ma e ou te talitonu foi ua matua lava ma sausi uma lava ia itu uma lava e aafia ai ia atunuu taitasi o lo o aafia i totonu o feagaiga i lalo o le feagaiga lenei.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Ma e leai foi se manatu faapena ona o le tatou Malo ina ia fai se feagaiga e ono aafia ai tatou, o lo o naunau ina ia vave le alu o le tatou Trade, ia ona maua mai foi lea o penefiti i ina i le itu lena, e tau faatumu ai ia itu ia o le aafia i le mea lava lea o le tatou Tariffs Reduction, ma o lea o le a tulai mai pe a oo i le taimi e faatino ai ia tulaga ia o le feagaiga lea, pei ona fai atu e 30 tausaga e faagaioi uma ai mea nei. E le faapea e sainsi loa rectify aumai uma loa mea nei, leai e tele lava le taimi e faagasolosolo ai tatou...O le taimi foi lena, e faagasolo ai a tatou galuega in reforms ina ia tulai mai ai ia ni tulaga lelei e cover ai ia a tatou shortfalls ia o le a tulai mai. E faapena uma lava ia atunuu ia na aafia i totonu o le feagaiga lena.

FOFOGA FETALAI: E le aia moo i liu o vaa i saunoaga a Minisita ma latou tapenaga, ae i ai le manatu, a tatou o e auau le tulaga o le fesili a le sui usufono, ona toso loa lea o le tatou Fono. Ae ou te fautua atu e ala faa-Taitaifono o le Komiti a le Palemene, malilie foi a outou Afioga se i tali ma saunoa i aotelega ina ia faafaigofie ai le tatou galuega, leaga e tataua ona vave pasia le tatou Tala o le Tupe, ae se i faatino mea ia e finagalo i ai sui usufono. Ia ae le aia moo i liu o vaa, e na ona fautua atu, ae tulai mai le sui usufono...

Ia e auau loa le saunoaga a le Minisita, tutulai mai loa sui usufono, leaga o le isi sui usufono e tau loa lona suafa e manao e tulai mai leaga e faafofoga le itumalo, o le ala lena. O le mea ia lea malie le sui usufono mamalu, se i saunoa atu le Minisita atonu e maua ai lou tulai mai.

Tulai mai le Minisita.

Tofa Lopaoo Natanielu Mua: Na ona ou tulai atu lava e fesoasoani atu i le tali a le Afioga i le Minisita, e faigata tele le mataupu lea, leai ae o lea o le a faapea, ua lava ia lana faamalamalamaga lea na fai mai. O le fesoasoani lena o lea na avatu lau Afioga ma le Afioga i le Minisita, faafetai.

FOFOGA FETALAI: Tulai mai le Minisita.

Afioga Hon LAUTAFI FIO SELAFI PURCELL: Ia faafetai i le sui usufono mamalu, ou te tau tu atu o le a fai atu, e toe tele isi faamalamalamaga o le mataupu lena o le PACER Plus i nai masina o lo o loma nei, atonu o le a maua ai nisi malamalamaga atili i tulaga uma i aiaiga ia o le maliega lena.

Lau Afioga i le Fofoga Fetalai, sa i ai se isi sa tulai mai faapea ua tataua ona fai ni employment agencies i lalo o le Tulafono, ia o lena foi e moni le sui usufono. E i ai le malosiaga e mafai ai ona fai, a o le mea lena, seiloga e i ai nisi e apalai mai, e le nofo nofo lava le CEO alu fai i se isi e sau e faatu sana employment agencies, e faapea e tasi lava se employment agencies sa faatu, ae le i umi ae toe tapuni. Ia e lagona ona e le o lava le maketi a tatou e faatu ai ni tulaga faapea e o ai ni tagata e sue mai ni a latou galuega.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea foi ua i ai lava ia aiaiga a le Matagaluega ia e free ia a latou lesitala o tagata e fia maua ni galuega, o la ua i ai i luga e fai mai lava on line e le tau omai e faafesagai e tuu lava i totonu, ia ona o lea i ai o tagata foi e ona galuega, e sue mai i totonu i ina ni a latou tagata faigaluega. O le tasi lena faigofie lea ua tuu mai i le taimi lenei i le auunaga a le Matagaluega o Leipa.

Tofa Aumua Isaia Lameko: Lau Afioga i le Taitaifono o lea ua manino le saunoaga a le Minisita. E pau lava le tulaga o lalo o le Tulafono Faatonutonu e faasalalau e le Matagaluega ia laisene ia ina ia mafai ona agavaa le tagata e talosaga i pisinisi lea, ioe.

FOFOGA FETALAI: Na taua i le saunoaga le itu lea?

Tofa Aumua Isaia Lameko: Ia o lea lava lau Afioga.

FOFOGA FETALAI: Ia malo faafetai o lea ua maua atu. Tulai mai le Minisita.

Afioga Hon LAUTAFI FIO SELAFI PURCELL: Ia e ala foi ona faasalalau pe a iloa ua i ai nisi ua faapea, o au e fia fai sau employment agencies, ia ona i ai loa lea o le manatu faapea, ia o le a issue se laisene i le vaega lea. Afai e leai ni tagata faapena, ia e fiu lava le Matagaluega ia e faasalalau ma alu ai fua a latou tupe, ae leai nisi e omai e fia faia lena mea aua e leai ni tagata e agavaa i ai ma e iloa pei ona fai atu, e le i umi ona tu ae le employment agency e tasi lea sa i ai, ia ae toe taai fala ona faapea e leai ni tagata e o i ai. Ia o le tulaga foi lena. Ae a i ai lava le demand, ia o le a taumafai lava le Matagaluega e faamalieina.

Lau Afioga i le Fofoga Fetalai, o lena ua uma ona saunoa le Tamaitai Taitaifono e uiga i le mea lea o le Housing. E pau lava le mea e toe fia faaopoopo atu, o le Housing o lo o sosolo lava i a latou faiga faavae na ala ai ona faatu. O lea lava o lo o i ai i latou sa aafia lo latou fale i le taimi o le afa o Evani, o lena lava e ave i ai nonogatupe i le taimi nei e 3% lea e totogi e tagata na i a latou fale sa faaleagaina. O lena ua faamalamalama atu ia 17 lea, o au ua ou matuai lava ou te i lava i le 17, faapea au, ai o loan ia...leai e 8% lea e alu ai, se i vagana ia unsecure loans.

Lau Afioga i le Fofoga Fetalai pe maua lava sina avanoa? Na ala ona ou taua, o le Award lea, o le Award na aumai i le vaiaso lea na tea nei, o le Award mai le vaega lea e tau o le ADFIAP, o le Asosi lea mo Development Finance Institutions i Asia ma le Pasefika, lea la ou te amanaia ai le auunaga a le Matagaluega lenei o le Housing, o Fale o le Malo o Samoa. O lea e sau ai i i, *This Merit Awards is given to the Samoa Housing Corporation and regonition of this consistent exercise of corporate social responsibility, that has improve the lives of many people in Samoa.*

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Ma e ou te matuai ou fiafia lava e faailoa atu, o le Matagaluega lenei ua tele lo latou e fesoasoani i o tatou tagata, o lea e oo i Faalapotopotoga Tetele mai fafo, lea e latou te recognise ina lea e aumai ai le Award lea. Ia ina ne i faapea mai i le faaupuga lea, e le gata i le Maota nei, ia a o nisi foi fai mai, na faatu ona e fesoasoani i tagata ae la ua ese le mea ua agai nei i ai. A lea e tau sao mai foi i i i le Faalapotopotoga lenei, o le latou matafaioi lea o lo o tele le sao i le olaga manuia o tagata Samoa.

Lau Afioga i le Fofoga Fetalai, na pau ia o nai manatu sa faaali mai e sui usufono mamalu, e faamalulu atu foi, a i ai foi nisi e le o...o lena e avanoa lou ofisa, avanoa le Matagaluega, afifio atu i ai e faamalamalama atili ai nisi o tulaga o lo o outou fia malamalama ai. E taua tele ia te au lenei ia outou finagalo, o le tatou vaa e fautele, ma e leai se poto ma se tomai ia te au ma le Matagaluega, ae aumai o outou finagalo e tatou te galulue faatasi.

E faamalo atu i nai au Matagaluega i Faatonusili uma, ia a i ai foi se taimi e siisii ai le leo o le Minisita, ia o taumafaiga lava ina lelei le tatou auunaga i le taimi lenei a o tuu atu foi le faatuatuaga a le Malo ia te outou. Ae ia manuia tele le tatou Fonotaga i lenei afiafi, soifua ma ia manuia.

FOFOGA FETALAI: Malo faafetai. Ua manino auofala i mea uma sa laga e sui usufono mamalu i le saunoaga a le Afioga i le Minisita.

Ia ma ou te tapa ma le faaaloalo lau Afioga i le Sui Palemia le Minisita mo Punaoa Faalenatura ma le Siosiomaga.

Afioga Hon FIAME NAOMI MATAAFA (Minisita mo Punaoa Faalenatura ma le Siosiomaga) : Ia e faapai atu ma le faaaloalo i lenei itula o le aso, i le afio o lau Afioga i le Fofoga Fetalai, ia o sui usufono mamalu uma o le Palemene, tainane foi le tapuaiga a Faauluuluga o Matagaluega ma sui o Matagaluega o e o lo o lagolago i le tatou galuega lenei o lo o faagasolo. Ia e faatalofa atu, faamalo le usufono, ia faamalo le onosai. Ou te iloa foi ua vela le fala, ia ae tatou faamalolosi pea, ua toetoe lava maea ia le tatou galuega o le Tala o le Tupe.

Lau Afioga i le Fofoga Fetalai, ia o se faamatalaga o le aotelega, ia faalogologo lava ma le totoa, i felafolafoaiga i luga o le Tala o le Tupe o lo o i le Lualua a Fono 2017/2018. E muamua ona faapena ona faaopopo atu le agaga faafetai i le Afioga i le Minisita o Tupe ma le Matagaluega i le faapena ona faataatia mai le ata o fiafiaga mo le tatou tamaoaiga i le tausaga o le a tatou faagasolo atu i ai. ua faalogologo foi ma le totoa ma faitau i le Lipoti a le tatou Komiti o le Palemene sa gafa ma le iloiloina o le Tala o le Tupe, ma momoli atu ai le faamalo i le tamaitai Taitaifono le Afioga Aliimalemanu ia faapea sui usufono mamalu o le latou Komiti i le galuega maeaea. E manaia le folasaga o le taatia ai o le tatou Tala o le Tupe ma o lea foi ua tatou faalogologo i le amata o le tali atu a le Malo, i le saunoaga a le Palemia, ma ua na o toina mai ai se mataupu o lo o lualuga e le gata i le tatou Malo i Samoa nei ma le Pasefika, ia aemaise foi o le lalolagi atoa, ia o le mataupu lava lea o le Suiga o le Tau.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Ma e ou te manatu lau Afioga i le Fofoga Fetalai, ona o le Matagaluega lenei o Punaoa Faalenatura ma le Siosiomaga, o se tasi lea o Matagaluega po o itutino o le Malo, o lo o faasino i ai ia gaoioiga i le mataupu lenei o le tali atu i le suiga o le tau. Ma e o lea la e oo mai ai sau faamatalaga i le tulaga aoao, faalogologo atu i le saunoa mai o sui usufono o le Maota, ia o le mea lava lea e faafofoga i ai i tausaga uma o le talosaga mai i galuega e faaleleia ai ia itumalo taitasi, ia o tatou aualatetele, o vai, o le eletise, ia ma faapea foi i a tatou taligalu ma talivai. O galuega nei o galuega tetele, o lena foi sa saunoa ia le Afioga i le Minisita o Tupe i galuega tetele o lo o tauave e tatou e ese mai ai i galuega ia o lo o saunoa mai ai sui usufono mamalu, ia e i ai le tatou malae vaalele ia ma le tatou uafu, o galuega ia e tua i ai le atinae aemaise le faatupulaia o le tamaoiaiga, ma e ao lava ona faagaoioia e le tatou Malo.

Ae soosoo atu ia se matou faamatalaga i lau Afioga i le Fofoga Fetalai i mataupu lava nei o lo o saunoa mai i ai sui usufono i taligalu, o auala sola, ma le faaleleia o tafatafa vai o nuu ma afioaga. E malie lava lau Afioga i le Fofoga Fetalai ma le Palemene, a ou faalogo atu i le saunoa mai a sui usufono, ua pei ua foliga mai, o le Matagaluega nei o Punaoa ma le Siosiomaga, e pei o se isi Matagaluega lea mo galuega tetele a le Malo. Ia atonu o lea lava ua faasolosolo ia le tali atu a le Malo i manaoga o lo o aumai pea e itumalo eseese, ia ma lea lava ua amata ona tau manino le tali atu a le Malo aemaise lava i galuega nei i aafiaga ona o le suiga o le tau.

O lena ua saunoa atu le Afioga i le Minisita mo Galuega ma tau faamalamalama le faataatiaga o faiga faavae ma faagaoioiga o a tatou galuega tau taligalu, ma o lea ua faapea ai o se vaeveaga o taligalu o lo o puipuia mai ai alatetele, ia o lo o faapea ona nafa ma le LTA. Ae o taligalu o lo o puipuia mai ai ia le tafia o gataifale o nuu ma afioaga, ia o lo o faapea ona taatia atu i le Matagaluega o lo o aveai au e fai ma Minisita. Ia e moni lava, ae i lau foi vaavaai faa-Minisita i le oo atu i lea Matagaluega, o tupe lava ia e faatino ai ia aemaise lava mo le tali atu mo le suiga o le tau o lea lava e auala mai i le Matagaluega lenei, aepeitai o le faatinoga o galuega aua o galuega o galuega tetele, e ao lava ona fesootai ai i totonu o itutino eseese ma itutino talafeagai o le Malo, po o ai tonu e faatinoa galuega ia. Ma e ou te manatu o se mea lena o lea ua agai ona gaoioi i ai le Malo i le faalotoifale lava o le Pulega, ina ia siitia le tulaga lea o le fesootai lelei o Matagaluega e ao ona galulue i atinae nei, ina ia faalelei ia tatou galuega ma ia faaaogaina i se itu aupito i sili ona taatia lelei ai ia tatou faamoemoega.

Talu mai ia le...o tatou polokalame tetele ua mavae atu ia le vaega tele o le Tsunami, tatou see mai ai lea i le matagi o Eveni, ia ma o lea foi na toe faatulaga mai ai e le tatou Malo aemaise lava i le vaega lea o tatou taligalu ma auala sola ia tupe e fesoasoani e tali atu ai i talosaga a tatou itumalo. Ma e o lo o faagasolo nei talu mai le 2013 seia oo atu i le tausaga nei ni polokalame se 3 o lo o faapena ona faasoasoa i ai talosaga a itumalo taitasi.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

E i ai le polokalame o lo o faatino i le fesoasoani mai a le UNDP galulue faatasi ma le matou Matagaluega ia faapea foi ia le fesoasoani mai e auala mai i le EU po o le GEF i tupe ia e maua i atinae tau atiae. O le isi vaega lea talu mai le matagi o Eveni, o lena o lo o faavae ai se tasi o tatou polokalame.

Ia ma le isi polokalame e lona 3 i ai, o le polokalame lea o lo o fesoasoani mai ai ia le Faletupe o le Lalolagi o lo o faapena ona faagasolo e faaiuina i le faaiuga o le tausaga lena 2017. O se tasi o gaoioiga taua ua amata ma ua tauau ina maea ona faatinoina talu ona faatulaga mai polokalame uma nei talu mai Eveni, o le tau faamaea lea o mea ia e taua o CIM Plans, po o Coastal Intergrated Management Plans. Ma e o fuafuaga o ia plans, e tofu lava le itumalo ma fuafuaga ua faataatitia, e faapena ona tali atu ai ia le tatou Malo. Ma e ou te manatu lau Afioga i le Fofoga Fetalai, o le faataatia o se fuafuaga faapea e manino ai mo tatou uma, po o fea le mea lea o le a agai atu ai galuega tetele nei aemaise lava galuega e tali atu ai i fesuiaga o le tau. Ia aua ou te iloa o a outou Afioga i alii ma tamaitai sui usufono e faapena lava ona outou talosaga mai i lea Paeaiga ma lea Paeaiga. E faapena foi ona afiio mai Sui o Nuu ma afioaga ma aumai foi a latou talosaga.

E i ai lava le fesili e oo lava i ai matou lea e nonofo atu i le nofoa faa-Minisita, e i ai lava le fesili foi lea, o fea ea le mea lea e agai atu uma i ai ia talosaga nei, ae pe e i ai se tali atoatoa e mafai ai ona faamanino atu, pe mafai ai foi ona fuafua e le Malo mo lea piliota ma lea piliota ia galuega e tataua ona fai? Ia o le mea moni lava, o le faagasologa o le tatou galuega lea o lo o faasolo atu nei, ia o lo o fuafua lava i luga o le tulaga foi lea, o le tulaga lamatia. O le a le risk factor o lo o i ai i totonu o talosaga taitasi o lo o tuuina mai. Ia e silafia lelei e lau Afioga i le Fofoga Fetalai ma le mamalu o le Palemene, e i ai lava mea e tutupu e ao ona vave tali atu i ai, ae i ai foi isi mea, e mafai lava ona tatou tuu faavaitaimi aemaise pe a lelei ona tatou fuafuaina.

Lau Afioga i le Fofoga Fetalai, e le mafai ona tatou talanoa i tatou taligalu o talivai ia ma isi galuega ia o auala sola, ae tatou te le talanoa foi po o a mea e mafua mai ai, e mafua mai fai mai o le suiga o le tau. Ia ae tele foi isi gaoioiga faaletagata soifua, o lea e tele ona afaina ai, i o tatou fanua, fai ma faataitaiga o le lauina o le oneone i totonu o le atunuu. O le isi mafuaaga tele lava lea ua solo ai le laueleele i o tatou talafatai ona e faapena ona lau le tatou oneone.

E faapena foi i o tatou tafatafa vai, tatou te talanoa soo i le puipuia mai o le tatou vai ae lea lava tatou te iloa, e taina pea lava ia eleele ma fanua o lo o faamoemoe e le gata e apoina ia le vai, ae faapea foi tafatafa vai i le mea o lo o faagasolo mai ai ia o tatou vaitafe, aepeitai, ona o le taina o tatou fanua ia, ua faapena ona tafia ai ia o tatou eleele. E faigofie lava ia le tatou talanoa i le fai o le talivai, i le fai o le taligalu, ae ou te faamanatu pea lau Afioga i le Fofoga Fetalai ma le mamalu o le Palemene, faafogafoga mai foi le tatou atunuu, o mafuaaga na. E moni ua siisii le sami e pei ona saunoa le Afioga i le Palemia, le vevela lea ua maua i le suiga o le tai, ae e feoloolo atu Samoa i lo tatou atumotu ia e leai ni mauga.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea e feoloolo mai le tulaga o i ai tatou. Ae a le mafai lava ona muamua lava ona tatou puipui malu le tamaoiaiga lea po o le tatou Punaoa Faalenatura, ia e pei lava o le a tatou fai lava le sasa mo tatou, tatou talosaga pea, tatou talosaga pea e fai o le tau faasoasoa o nai a tatou lava tupe maua, ae faapena ona ave pea pea a tatou talosaga i fafo, mo a tatou taligalu, mo a tatou talivai, mo tulaga uma ia tatou te tali atu ai i le suiga o le tau.

FOFOGA FETALAI: Ou te faamalie atu i le saunoaga a lau Afioga i le Sui Palemia, ou te vaelupeina lou finagalo ona ua tatou toai taunuu i le tatou malologa.

O le mea la lea o le a faataatiaese Galuega ma le Fono a le Palemene mo le tatou malologa masani.

Na faataatiaese Taualumaga a le Fono Aoa mo lana malologa masani i le itula e 4.46 i le afiafi ma toe amatalia i le itula e 5.22 i le afiafi.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoa Faitulafono.

E faia le malologa o malele ma saunoa le Afioga i le Sui Palemia, ua i ai foi le manatu ua faaopopo le malosi o le Palemene e faaauau ai le tatou galuega.

Ou te tapa ma le faaloalo lau Afioga i le Sui Palemia.

Afioga Hon FIAME NAOMI MATAAFA: Faafetai i lau Afioga i le Fofoga Fetalai, matu fau i le taliga o le sua i lau Afioga ma le mamalu o le Palemene. Faafetai i le Tamaitai Failautusi o le Fono ma le aufaigaluega aua foi le auaunaga aua le soifua maloloina o sui usufono mamalu o le Fono. Ia outou manuia lava, maua ni a outou faaipoipoga.

Ia lau Afioga i le Fofoga Fetalai, faaauau atu ai lea o se matou faamatalaga i le tatou talanoaga lava lea i le talosaga mai a sui usufono mamalu. O le faamoemoe lava o a tatou CIM Plans ia o lo o toetoe nei ina maea ona faataunuu, ina ia mafai ona faataatia lelei se ata, tatou malamalama uma ai i fuafuaga faagasolosolo, mo a tatou galuega ia. Ia ae ou te toe faamanatu atu, e ese le taugata o nei mea o taligalu ia ma talivai, ae tele lava a tatou gaoioiga e mafai ona fai, e faalagolago ai i le mamalu o le atunuu aemaise o pulega a alii ma faipule, e le o se mea fou lenei mea o le puipui mai o le tatou siosiomaga, i le tatou tu ma le tatou aga faa-Samoa, aemaise ia tulaga ia o le afaina ai o tatou gataifale ia ma le afaina ai o le suavai o lo o tatou manaomia.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga i le Fofoga Fetalai, i le itu lava lea o le puipuia mai o le tatou siosiomaga, ma tau faaitiitia ai lo tatou faalagolago i le tele o maa ma sima ma uamea ma mea faapena e fai ai galuega tetele nei, o le totoina lava ia o laau, ma e o lo o i ai se polokalame o lo o faagasolo e le Matagaluega o lo o taua o le 2miliona o le totoina o laau, ma e faapena le talosaga atu i le atunuu ina ia faapea ona tatou galulue faatasi, toto i o tatou gataifale, toto i o tatou tafatafa vai, toto i o tatou fanua o lo o apo ai le suavai, o isi mea uma ia e mafai ona tatou tali atu ai i suiga o le tau.

Na saunoa foi le Afioga i le Minisita mo Faatoaga i fuafuaga, atonu e mafai foi ona galulue faatasi le polokalame lea o le 2miliona laau e lagolagosua ai foi i le galuega a lea foi vaega tele o le tatou atunuu. Sa ou talanoa lava i le tamaoaiga o lo o tau faasoa atu mo le tali atu i le suiga o le tau, ia pe maua i le mamalu o le Fono, o le amataga o le tausaga nei na talia ai le tatou talosaga sa tuu atu i le Climate Fund e fesoasoani mai ai mo tatou . Ma o lea na maua mai ai sia tatou tupe e latalata lava i le \$60miliona tala. Ma e ou te tautala e fai ma faataitaiga i galuega tetele i le tali atu i le suiga o le tau, o le tupe lea, o lo o faaagaga mo le talafatai nei i Apia, ae amata mai lava i tumutumu mauga se i oo mai i Apia tatou te manatua Eveni ma le lolovaia o le taulaga. Ua pei o se Tsunami foi lea ua tupu i o tatou vai, ma e o le tulaga o le lamatia aemaise o le tatou taulaga o Apia o lo o tapuvae tasi mai i ai ia le gaosiga o le tamaoaiga, o lea na fuafua ai e le tatou Malo le talosaga lea, ina ia tatou galulue e puipuia mai le siosiomaga e faasaoina ai ia le laueleele aemaise o tagata soifua i le itu lenei o le atunuu, le tatou taulaga i Apia.

Ia e fai lava o le vai i Vaisigano le isi galuega tele lea ua amata ona faagasolo i a tatou lava seleni, ia ae o le faamoemoe, e amata mai lava i luga i le mea o lo o tali ai a tatou vai ia tatou reservoir e fofoa mai ai ia tatou vaitafe, talivai, o le vaaiga i le taulaga, aemaise lava i itu ia tatou te molimauina le lolovaia, o alavai lava ina ia mafai ona tapena lelei, e faasao mai ai ia le tatou taulaga. E pei la o se faamatalaga faataitai lea, ma e ou te manatu, o se poloketi tele lea ma e o lea ua amata ona gaoioi i ai ia le Komiti a le Malo, o lo o i ai maua ma le Afioga i le Minisita o Tupe, e le gata foi i lea o le Minisita mo Galuega Tetele, ia ma le faamoemoe, ia o le a faapena ona tatou tali atu i se tulaga ogaoga, ona o le suiga o le tau mai aafiaga o le tatou taulaga i Apia nei.

Ia lau Afioga i le Fofoga Fetalai, ua maitauina foi i le Tala o le Tupe o lo o i ai le faamoemoe e siitia ai le aoina mai o le tamaoaiga po o se tupe e ala lea i a tatou fanua o lo o lisi atu, ma e o le a faapena ona fai foi le sao o le Matagaluega e tulituliloa ina ia faapena ona mafai ona faamaopoopo mai ia tupe maua a lo tatou Malo, ia e faapena ona tali atu ai i manaoga o lo o taatia mai.

Ia atonu pe na o se manatu puupuu lava o lea sa saunoa ia le Afioga i le Minisita mo Faatoaga ma Faigafaiva e uiga i se talosaga o lo o taatia mai mo fanua o le Malo e faapea e mafai ona galueaiina faapisinisi a le aufaifaatoaga.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

Ou te manatu lau Afioga i le Fofoga Fetalai, na saunoa le Minisita i faiga faavae, commercialization, ia atonu lava o lo o i ai ia lena vaega ae e pei o lea ua maitauina e fia uunaia atili ia le faamoemoe, aua o le isi lava itu lea tau atinae e faamoemoe i ai ia le tatou tamaoiga. E ala la ona fai atu ia se matou foi manatu, aua o lea lava o lo o fai le tatou faasoa i luga o faiga faavae, o lo o tuu ai i luga ia le tatou fuafuaga o le tamaoiga, o itu lava lea o le isi tamaoiga po o le punaoa mo tatou o tatou fanua, po o fanua faaleaganuu, po o fanua saoloto, po o fanua o le Malo, ae atonu o isi lava itu ia e ao foi ona silasila i ai la Malo ina ia taaina i ai ia faiga faavae, e mafai ona faaaogaina ai ia lea tamaoiga o lo o i outou aao ma o tatou lima.

Ua leva ona fai ia galuega a le isi Komiti lea e tau o le CLAG o le faaaogaina lea o fanua faaleaganuu. O le umi ia ona faagasolo galuega nei a le Komiti lenei, ma e sa amatamea ai le Matagaluega o Tupe, ona o le vaaiga lava i le itu lea, pe faapefea ea ona mafai tatou faaaogaina ia tatou aseta. Ia atonu lava o le a i ai se taimi ona i ai lea o se taunuuga maopoopo ma le lelei, e fautuaina ai le finagalo o le Malo i le faaaogaina o tatou fanua ma o tatou eleele. Ae o se mea foi lea ou te manatu, e ao ona mafaufau i ai tatou o Taitai o le atunuu, pe faapefea ona faaoga ia fanua o le Malo? Aua o tatou o sui usufono o le Malo. Pe o se mea lelei lea o le faaaogaina o fanua o le Malo e fai ai a tatou faatoaga e pei ona faatulai mai e le Minisita ma le Matagaluega o Faatoaga ia lea faiga faavae. Aua o le mea moni, a faapea o le isi lea punaoa mo i tatou, ia e luita pea lava tatou i nei mea o fua o faatoaga, faapea a maua maketi, a ua le lava foi le supply. Ia po o le tali foi lea o le mafai ona commercialize ia tatou faatoaga, ina ia faapea ona faamautinoa ai, le avatu i a tatou maketi o fua o faaeleeleaga a le atunuu ia ma maua ai a tatou tupe.

Ae le galo foi ia tatou o le tele o le eleele o Samoa, o le eleele o lo o umia faaleaganuu. Ia o le fesili lava lena mo tatou, pe faapefea ona tatou faaaogaina ia le mea lea? O le tele o fanua Samoa e mafai o lo o tatou faapea e faigata ona faaoga faapisinisi, ona pe e laitiiti ia le fanua maua e lea aiga ma lea aiga ae o lea tatou te iloa, sa i ai lava faafaatoaga ma o lo o i ai faifaatoaga i totonu o le atunuu o lo o fai ia latou atinae i luga o fanua faaleaganuu. Ae o le toatele o a tatou faifaatoaga, ia e laitiiti ia le eleele o lo o faia ai ia latou gaoioiga, ia a o le fesili, Ia pe mafai ona fesootai, ia le aufaifaatoaga lea laiti ia ma le aufaifaatoaga tetele ia o lo o amata ona alo atu i ai ia le Matagaluega a tatou i faiga faatoaga? A o le fesili lava lea, tatou te mafaufau pea i ai, ma e taua le faaalua o finagalo, ma o a outou Afioga i alii ma tamaitai sui usufono i le tatou aseta lea 80 pasene o eleele o le tatou atunuu, o eleele e umia i lalo o pulega faaleaganuu i aiga ma alii ma faipule o itumalo.

Ia tau o se manatu faatupu manatu lau Afioga, aua o le tatou galuega e fai faatasi ia le atinae ma le sailia o le tamaoiga mo Samoa. Ia o se matou tali puupuu atu lea ma le agaga faaloalo. Ia manuia lava le Fono.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

FOFOGA FETALAI: Faafetai, ua malo malele faafetai saunoa lau Afioga i le Sui Palemia. Ia ma ua oo mai le faasologa i le Taitai o le Malo i nisi o mea e faapena ona le i maua e le Kapeneta, ia o le a faapena ona oo i ai le saunoaga a le Afioga i le Taitai.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu ma le agaga faaaloalo e molimoli atu foi le faamalo i le mamalu o sui usufono o le Fono sa sausaunoa i mataupu lagalaga, ou te taofi o lea ua maea ona talifuitau ia le aiga Minisita.

E tasi lava le mataupu e fia oo i ai se manatu, o le mataupu lea sa saunoa ai foi le Minisita mo Atinae Tau Pisinisi. O le tulaga lea i fanau o lo o feoai e faatau a latou oloa, o ula, koko Samoa, o fagusea, tau mago, ofu limu, o ili, afitusi, faapapa, o niu, o vaisalo, o mea Samoa eseese. O lea e fai mai faalapotopotoga i fafo, le ILO, o manatu faapapalagi, o lea ua tatou faafaigaluegaina a tatou fanau. O se manatu foi lele e le tatau ona tupu lea mea. Ia ma o le sese o lea mea i le manatu o nisi, ona ua noatia ai fanau ae le o i aoga. Afai la o la e o i aoga ma aoga ma omai fai mea ia i o latou taimi pagaenoa, ona faapea lea o le taofi, e le afaina la le vaega lena, ona o la e o e aoga, ona faatoa avanoa loa lea o le taimi ua tuua mai ai aoga e fesoasoani i nai matua e faatau ia nai a latou oloa e maua ai le pili, maua ai se tupe e faatau ai latou meaai. O lona uiga la, e lua ituaiga fanau lea tatou te talanoa i ai, o le fanau o la e o i aoga ma nisi ua le toe o i aoga a o lea ua faatau mea ia. Ona tupu mai lea o le fesili, aisea ua tupu ai le mea lea? Ma o le tali, o le fatu atoa lena o le faafitauli e eseese taleni na aumai e le Atua ia i tatou uma, e eseese ai foi ma tamaoiga. O isi matua e maua mea, e mauoloa, na latou tapenaina lea o le lumanai mo a latou fanau. E leai lava la se mea e popole ai fanau na, e fanau mai ma taupega sipuni auro e tautau mai o latou laugutu, e leai la nifí e tou te le vaaia ni fanau faapena o feoai e tau faatau ia ni oloa ia, na o fanau o matua e le lava le tamaoiga, aemaise lava la matua pe na o le toatasi pe na o le toalua le fanau. O i la lea e mafua mai ai le tele o taimi e tatou te vaaia ai fanau nei. Ma o le mea moni lava, o lea ua taoto le faiga faavae o le tatou Malo mo le fofu. O lona uiga la, a tatou o e fofu le mataupu lea, tatou o i le fatu, o le fatu tatou te o i ai. O le a le fatu lena? Tatou o sao lava i le atinae o le atunuu ina ia uma atu, ua taufai mauoloa uma tagata e le toe maua se tagata e le o toe mauoloa, ua mauoloa uma lava, fananau mai a latou fanau, e leai lava se tamaitiiti e le fanau mai ma taupega sipuni e tautau mai i o latou laulaufaiva, se i tulou. O le fatu la lea e tatau ona tatou agai i ai. A fofu le mea lena, ua fofu atoa uma lava nei mea, lea tatou te atugalua ai. O le atoaga atoa lena o le mataupu. Ona o le toatele e saunoa i le mataupu lena, e matua confuse atoa, e le manino, e le malamalama, aemaise lava i latou na soifua mai i aiga mauoloa, e tautala i mataupu ia e le malamalama, aua foi e le i ola mai ai.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga faaauau i luga o le faitauga faalua**

E le tasi la se fofu lau Afioga i le Fofoga Fetalai, e tele fofu e tatau ona fai i ai. Ma o na foi fofu e malamalama uma ai lava i tatou uma na soifua mai i le ituaiga olaga lea. O mea uma lava ia e fai e le Malo, o mea uma lava ia ma galuega, o atinae o aoga, atinae o le falemai, mea uma nei, o lea e agai tonu lava i i i le siitia lea o le tamaoiga o tagata uma lava o le atunuu, i le agaga lea e tasi a siitia loa, e le tatau la ona toe vaia se isi o toe fealua e fai nei ituaiga faiga, aua foi o lea na o lou nofonofu lava ae sau lava le seleni ia i atinae. E popoto uma fanau a Samoa, a popoto mai foi ona o le lelei o le tatou tautua faale soifua maloloina, e leai ma se isi e toe mai. Aua foi o le isi lea mea, e matua leai se aoga o se tamaitiiti e potu mai ae faaletonu lona soifua maloloina, na ona sau lava o le a amata ae lavea loa i le gasegase oti. E matua le aoga atoa lava le investment a le aiga na alu ai.

O galuega uma la lea sa...galuega tau faatoaga, galuega eseese, atinae e fai i totonu o nuu, e oo lava foi i le suiga o taavaleafi ma le itu e o ai, e tasi lava le taunuuga o nei mea uma, ia siitia le tamaoiga o aiga uma i totonu o Samoa. O le fesili; e mafai ona tatou ausia a o tatou feola pea? Ou te manatua lava le mea na tupu i le tatou Alii, i le fafine foi lenei na alu atu sasaa le suauu ae muimui ia soo o Iesu, maumau le suauu manogi, sa tatau ona ave e faatau maua mai ai tupe e tufa ma tagata matitiva. Ua outou manatua le fetalai a lo tatou Alii, *“E tou te mafuta pea ma tagata matitiva.”* O lona uiga, o a le tele o galuega tatou te faia, o a galuega tetele tatou te faia, e le mafai, le mafai ona tatou taofia le mativa, leaga o le mativa, e tupu foi le mativa i le filifiliga a le isi tagata ina ia tumau i le mativa, ona ola lea i le ituaiga olaga soonafai ma oo lava i le tulaga lea.

Ua outou silafia le Malo o Amerika, o le Malo e mauoloa i Malo uma, ae te maua i Amerika le tulaga mativa ma tagata e momoe i lalo o aualalaupapa, ma tagata e feoai ma latou avega, mo mea o taga tetele o la e i ai i totonu o pepa, o mea o fasi lavalava, o palanikeke. E alu alu lava ua fia moe, talai loa, taatia loa o fea lava le mea ua fia moe ai, moe loa. Ua ou vaai i ai i mea ia i Amerika, ua ou vaai ai i Initia. O fea le atunuu tatou te o i ai, tatou te vaai pea i ai, aisea? Leaga e i ai le filifiliga saoloto na aumaia e le Atua i le tagata e pule ai lava ia ma le mea e fai. O lea foi na fai e Atamu ma Eva, e aumai le parataiso tatou te o i ai, ae nonofo ma filifili seoli. O lea la ua tatou faapeaolaina ai lava faapenei, ona o le filifiliga na fai e Atamu ma Eva, o lea e oo mai lava i le taimi lenei o lea lava e mulimuli ai lava ia le toatele o tatou. O a mea lelei e faia e le Malo, e i ai lava tagata latou te le mananao ai lava i le ituaiga soifuga lena. Ae le faapea la o le a taofia ai tatou. Ia tatou toaaga pea e fau le Malo o le atunuu ia lelei.

O lea ua uma ona sausaunoa Minisita i auala e fofu ai mea ia, o lea foi e i ai tatou auala faaleaganuu, o pulega mamalu a alii ma faipule. E i ai foi le sao o le itupa o faifeau i aulotu, e i ai le sao o faalapopotoga e faatu i totonu o le atunuu e tai pei lava o isi mau faalapopotoga ia e tele a latou galuega lelei lea e fai, e tai pei o le Victim Support.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

O lea la e i ai faalapotopotoga i totonu o le atunuu e fofo ai mea ia. O lea foi e i ai leoleo, e o foi latou e fai, ae fiu foi leoleo, e atamamai foi matua pe a oo lava i le tulaga e o ai lava latou e fai le mea e fiafia latou e fai. Ae le avea lea ma mea tatou te give up ai ma tupu ai se agaga musua ae tatou te taumafai pea e faatino o tatou tiute. E i ai le tausaga i le 1983 a o i o lou ofisa faafeagai ma Moles i le va lea o Moles ma le ofisa lea i ai le eleele mutia lea e taatia i luma, sau lava i o i le fale o Moles agai mai i i ia Nelesoni, o Patele. O le taimi lena i le 1983, sa matua tumu ai mea o taulaga ie, o mea o laulau, faatau ai i ina mea a nai olomatutua nei o le toatele o le atunuu, e i ai ma latou fanau e fesoasoani e feoi solo i faleoloa e ave i ai nisi o mea ia e faatau ai e taumafai ina ia vave ai ona taulia a latou mea. E toasefululua tina ua ou te i i le aso lea ua omai, e fetagisi lava. Ou fai atu, ðO le a le faafitauli?ö ðUa matou omai ia te oe, o oe lea e aupito lata i le ogaeleele o lo o faatau ai a matou mea e aai ai a matou fanau. E mamao tele i o Tofilau ma Minisita, a o oe lea e aupito lata, ua matou sulufai mai, ua faaleaga uma a matou mea, e oo lava i laulau, ua omai le Ofisa o Fanua ma Fuagafanua o latou e faafoea le eleele lea, o latou e pulea i lalo o le Tulafono, omai lava ao uma mea ia ave tatia. Sa omai foi ma lapatai mai matou ananafi ma talaatu ananafi, a o mea nei Tuilaepa lea matou te faia, e matou te ola ai. Na pau lea o le faiga o lea e maua ai nai a matou seleni e faaaooga ai nai a matou fanau. Ia ua omai nei ia te au ae le o au o se Minisita o mea nei. Ona ou nofonofo lava lea ma ou tau mafaufau po o le a le faiga. A o au, ua ootia lou loto i lou vaai i nei tina, ona ou tago loa lea telefoni ma ou talanoa ia Tofilau, ou fai atu, ðTofilau, e i ai le mataupu lea.ö Ona ou faamatalaina lea i le toeaina. ðO le Minisita ma le Pule lea e behind ai i tua o le mea lea, a o lea la ua ou sulufai atu ia te oe o lea e i i tina ia, e tataua ona fai se tatou fesoasoani, faataga pea tina ma a latou fanau e faatau mea ia.ö Fai mai Tofilau, ðO anafea na tupu ai le mea lena?ö Ou fai atu, ðo nei, o lea e i luma i i olomatutua.ö Ua iloa la, o lea o le a ou faatonua le Minisita, o le mea lena ou te manao e vaai o tatou tatou tagata e omai e fai mea nei e ola ai nei i le taulaga.ö Ua matua fiafia lava. E le i atoa le itula ae ou alu atu i luma, o la e ua toe tautau uma a latou mea faatau. Pe a outou manatua, o le matua mataga o le taulaga i lena taimi, ae ua le avea le mataga ona o le agaga foi lea o le taitaiga o le HRPP, o le party do stands for the rights the human rights of our people. Ia o le tulaga la lena, ma o i ina, o le faataimuaga lena o le fausia, o le 1983 lea ou te talanoa atu ai. O le 1989 fau loa le maketi tele lea i Fugalei, avatu ai loa tagata i totonu tuu lelei ai i totonu o le maketi, liliu ai foi ma le maketi lea e i tai ma create ai loa a tatou flea maketi.

Lau Afioga i le Fofoga Fetalai, ua ou avatua le tala lea, ona o le vaega lenei o le Vaega Faaupufai e Puipuia Aia Tatau a Tagata aemaise lava latou e matitiva e le tagolima. O le ala lena e alu alu lava ia nei mau upu e fai, ae taofi mai lava le lima tui tagata ona ia tatou fai alofa, o la e foi e afio le Atua i la tagata. Tasi lena Afioga a le Alii, ðPe ana manatua e outou o lo o afio le Atua i tagata uma lava.” Masalo e leai lava se mea leaga e faia e le isi tagata i le isi tagata.

26 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga faaauau i luga o le faitauga faalua**

Lau Afioga i le Fofoga Fetalai, ia o le lauga lena, tatou agai loa e auiliili le tatou Tala o le Tupe e faatu atu ai le lafo.

FOFOGA FETALAI: Malo faafetai, ua le uma le fia faalogologo i le saunoaga a lau Afioga i le Palemia ma le Taitai o le Malo. Malo faafetai.

Ua maea ona talifuaitau le Malo i le faaiuga o le saunoaga a le Afioga i le Palemia e tusa ai o mataupu na laga e sui usufono i saunoaga faalauaitale i tulaga tau tupe ma le tamaoaga o Samoa ae faapea foi faiga faavae tau tupe a le Malo. Ua maea foi ona faatu le lafo mo le faitauga faalua o le Tulafono Tau Faaofi, o le aso 30 Me 2017 ma ua faaluaina foi.

Na tuuina atu le Fesili ma faamaonia ai le lafo na faatuina i le aso 30 Me 2017, ma faitauina faalua ai le Tulafono Tau Faaofi o le Faatatauina o Tupe 2017/2018.

**TULAFONO TAU FAAOFI O LE FAATATAUINA O TUPE 2017/2018
– iloiloga auiliili**

FOFOGA FETALAI: O lea a sagai atu le Fono Aoa o le iloilo auiliili le Tulafono Tau Faaofi o le Faatatauina o Tupe 2017/2018 ma le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe e faaiuina aso 30 Iuni 2018 ma faapea ona silasila i le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe e faaiuina aso 30 Iuni 2018.

O lo o i ai Teuteuga i le Tulafono Tau Faaofi ma Faasaoga o le Lomiga o le Ata Autu o le Tupe 2017-2018 o lo o tuuina atu i le Pepa Faaopoopo o Galuega Nu.2.

E tusa ai ma Tulafono Tumau 134(1), e amata le iloiloga o le Tulafono Tau Faaofi i ona Faamatalaga:-

**FAAMATALAGA MUAMUA
VAEGA TUPE MA TALA FAATATAU**

MATAGALUEGA

TUPE ALU FAATATAUINA

FOFOGA FETALAI: O lea o le a faagasolo le auiliilina o Mea Taitasi ma e faamanatu atu, e maua avanoa o sui i le tai 15 minute o so o se sui usufono e fesili ai i Mea Taitasi e aofia ai Matagaluega o le a faagasolo ai le tatou galuega.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

FAATOAGA MA FAIGAFAIVA **\$17,341,655.**

Faamaonia.

PISINISI, ALAMANUIA MA LEIPA **\$19,189,691.**

Faamaonia.

FESOOTAIGA MA FAAMATALAGA TEKONOLOSI **\$7,655,608.**

Faamaonia

AOGA, TAALOGA MA AGANUU **\$100,313,401.**

Faamaonia.

TUPE **Aofai Tupe Alu Faatatauina** **\$75,695,977.**

FOFOGA FETALAI: O lo o i ai le Teuteuga a le Komiti o Tupe Maua ma Tupe Totogi, tulai mai lau Afioga i le Taitaifono o le Komiti.

Afioga ALHIMALEMANU ALOFA TUUAU (Taitaifono Komiti o Tupe Maua ma Tupe Totogi): E faatalofa atu i lau Afioga i le Fofoga Fetalai sui usufono mamalu uma o lenei Palemene ia faapea foi sui o Matagaluega ma Faalapotopotoga uma ua faapea ona tatou faatasi i lenei afiafi.

Lau Afioga i le Fofoga Fetalai, ou te faatu le lafo, *Ina ia faaitiitia le Vaegatupe Faatatauina mo le Matagaluega o Tupe e ala i le aveesea o le aofaiga e \$1,931,500 o lo o i le Galuega Faatino e avea ai ma Sui o le Malo i lalo o le Faletupe o Atiina Ae o Samoa ma faitauina ai le Aofaiga o Tupe Alu Faatatauina mo le Matagaluega o Tupe \$73,764,477.*

Faaluaina e le sui usufono mo Palauli le Falefa.

FOFOGA FETALAI: Tapa ma le faaalalo lau Afioga i le Taitaifono o le Komiti o Tupe Maua ma Tupe Totogi e faamalamalama lau lafo.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

Afioga ALIIMALEMANU ALOFA TUUAU: Faafetai mo le avanoa. Lau Afioga i le Fofoga Fetalai, na maua i sailiiliga a le Komiti o Tupe le vaegatupe e \$1,931,500 na faatatauina i lalo o le Matagaluega o Tupe mo le tologiina i le Faletupe o Atiina-Ae a Samoa, mo aitalafu a le Malo, peitai o lea aitalafu ua maea ona tologiina i le tausaga faaletupe 2016/2017 ia Iulai 2016.

O lea aitalafu, na mafua mai ona o le 2008, a o feagai le tatou atunuu ma faaletonu o le Tamaoiaiga o le Lalolagi, Global Economic Crisis. Na talia ai e le Kapeneta le fautuaga i le faapafala o tului o faaunegatupe, mo le lua tausaga i le Faletupe o Atinae, e faapea foi le toe tuu mai i tua o talosaga na faaooina atu e le Faletupe o Atinae i le Faamasinoga, ia faapea foi ma pisinisi ua tapunia foreclose mo le faatauina atu.

E 31 le au faipisini ma pisinisi faafaletalimalo e 18 na aafia i le faamamaavega lea e toe fetuunai ai, restructure, nonogatupe ona ua matua le mafai lava ona tologiina a latou aitalafu i le Faletupe o Atinae. I le faatinoga la o lea faamaoniga o le approval a le Kapeneta i le faamamaavega, na aumai ai ma le maliaga e toe faatumu ai e le Malo le \$3.9miliona o le tului a le Faletupe o Atinae lea na faapafala. Ma e lua tausaga na faamoemoe e toe tologi ai le \$3.9miliona lea a le Faletupe o Atinae. Na amata la i le Tausaga Faaletupe i le tausaga 2014/2015, ma le 2015/2016 le tologiina o le tai \$1,931,500 i le tausaga ma na maea ia Iulai 2016 ona faatumu lea tupe. Peitai na maua e le Komiti, o lo o faaauau pea le faatatauina o lea tupe, i le Tala Faatatau o le Tupe 2017/2018. Ma le faaaloalo lava lau Afioga i le Fofoga Fetalai, faafetai mo le avanoa.

FOFOGA FETALAI: Malo faafetai.

Faamaonia le vaegatupe e \$73,764,477 e pei ona faaititia mo le Matagaluega o Tupe.

MATAUPU TAU LE VA I FAFO MA FEFAATAUAIGA \$22,607,740.

Faamaonia.

SOIFUA MALOLOINA \$88,478,915.

Faamaonia.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

FAAMASINOGA MA PULEGA TAU FAAMASINOGA \$12,279,017.

Faamaonia.

PUNAOA FAALENATURA MA LE SIOSIOMAGA \$26,667,188.

Faamaonia.

LEOLEO \$30,189,444.

Faamaonia.

PALEMIA MA LE KAPENETA \$7,739,197.

Faamaonia.

TUPE MAUA \$11,752,982.

Faamaonia.

**TINA MA TAMAITAI, ATINAE O NUU, AFIOGA MA AGAFESOOTAI:
\$10,708,066.**

Faamaonia.

GALUEGA, FELAUAIIGA & ATINAE ESEESE \$39,309,694.

Faamaonia.

LOIA SILI \$3,132,198.

Faamaonia.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

PULE MA LE SUETUSI SILI **\$3,522,368.**

Faamaonia.

KOMESINA O FAIGA PALOTA **\$1,963,794.**

Faamaonia.

FONO AOAQ FAITULAFONO **\$6,940,211.**

Faamaonia.

KOMESINA O SULUFAIGA **\$1,119,496.**

Faamaonia.

KOMISI O TAGATA FAIGALUEGA A LE MALO **\$4,938,096 .**

Faamaonia.

FAAFOEINA O MOLIAGA FAASOLITULAFONO **\$1,404,964.**

Faamaonia.

FAALAPOTOPOTOGA TUMAOTI **\$2,598,323.**

Faamaonia.

FUAINUMERA FAAMAUINA **\$5,314,479.**

Faamaonia.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

KOMISI O LE TOEFUATAIGA O TULAFONO A SAMOA: \$1,291,513.

Faamaonia.

FALEPUIPUI MA LE VAAIA O TAGATA SOLITULAFONO \$9,673,758.

Faamaonia.

**AOFAI O TUPE ALU AOA O FAATATAUINA A MATAGALUEGA
2017/2018 \$509,896,272.**

Faamaonia.

FOFOGA FETALAI: Ona sa i ai le faaititiga e \$1,931,500 i le Matagaluega o Tupe, o lea ua suia ai le Aofaiga i le \$509,896,272.

Faamaonia.

FUAIUPU 2: Faamatuu atu ma le faatatauina o le \$511,827,772 mai le Faaputugatupe a le Matagaluega o Tupe.

FOFOGA FETALAI: O lo o i ai le Teuteuga i le Fuaiupu e pei ona faaalua i le Pepa Faaopoopo o Galuega Nu.2.

Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te faatu le Teuteuga i le Fuaiupu 2(1) e faapea:

“TEUTEUGA:

Ia aveese le aofaiga e “\$511,827,772” ma suia i le aofaiga e “\$509,896,272,” ina ia faitauina ai le (1) e faapea:

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

E mafai ona tuuina atu mai le Faaputugatupe a le Matagaluega o Tupe ma faaaogaina i galuega faatino po o galuega faatino laiti e tuuina atu e Matagaluega taitasi po o galuega faatino e tuuina atu e isi vaega, po o mo galuega e aveai ma sui o le Malo mo le Tausaga Faaletupe 2017/2018 ni aofaiga o tupe e le sili atu i le aofaiga e \$509,896,272.”

Faamaonia le Teuteuga.

Faamaonia le Fuaiupu 2(1) e pei ona Teuteuina.

FUAIUPU 3: Faamatuu atu ma le faatatauina o le \$493,052 mai le Teugatupe a le Tausi Mavaega.

Faamaonia.

FUAIUPU 4: Faamautu atu ma le faatatauina o le \$15,354,833 mai le Faaputugatupe a le Matagaluega o Tupe.

FOFOGA FETALAI: O lo o i ai le Teuteuga i le Fuaiupu 4 e pei ona faaalua i le Pepa Faaopoopo o Galuega Nu.2.

Tulai mai lau Afioga i le Taitaifono o le Komiti o Tupe Maua ma Tupe Totogi.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te faatu le Teuteuga i le Fuaiupu 4(1) e faapea

“TEUTEUGA:

Ia aveese le aofaiga e “\$15,354,833” ina ia faitauina ai le (1) e faapea;

E mafai ona tuuina atu mai le Faaputugatupe a le Matagaluega o Tupe ma faaaoga i Tupe Faaalu e le i fuafuaina mo le Tausaga Faaletupe 2017/2018 ni aofaiga o tupe e le sili atu i le aofaiga e \$15,296,888.”

Faamaonia le Teuteuga.

26 IUNI 2017

**Tulafono Tau Faaofi o le Faatatauina o Tupe 2017/2018
– iloiloga auilili**

Faamaonia le Fuaiupu 4 e pei ona Teuteuina.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Faatatauina o Tupe 2017/2018.

Faamaonia.

Na faagasolo le Tulafono Tau Faaofi o le Faatatauina o Tupe 2017/2018 faatasi ma Teuteuga.

**TULAFONO TAU FAAOFI O LE FAATATAUINA O TUPE 2017/2018
- faitauga faatolu**

Afioga Hon SILI EPA TUIOTI: Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o le Faatatauina o Tupe 2017/2018 i lona faitauga faatolu.*

Faaluaina e le Minisita mo Aoga, Taaloga ma Aganuu, Minisita mo le Soifua Maloloina ma le Minisita mo Galuega, Felauaiga ma Atinae Eseeese.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Maota.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2017 – faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga ma Tupe Maua 2017 i lona faitauga muamua.*

Faaluaina e le Minisita mo Faatoaga ma Faigafaiva, Minisita mo Tina ma Tamaitai, Atinae o Nuu, Afioga ma Agafesootai ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga muamua.

26 IUNI 2017

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA I LE ATUNUU 2017
– faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2017 i lona faitauga muamua.*

Faaluaina e le Minisita mo Faatoaga ma Faigafaiva, Minisita mo Aoga, Taaloga ma Aganuu, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O AUUPEGA MALOLOSI 2017
– faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Auupega Malolosi 2017 i lona faitauga muamua.*

Faaluaina e le Minisita mo Faatoaga ma Faigafaiva ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
GALUEGA TAU LEOLEO 2017– faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tau Leoleo 2017 i lona faitauga muamua.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga muamua.

26 IUNI 2017

**TULAFONO TAU FAAOFI O LE FAAMAUINA O TAGATA
SOLITULAFONO I FAIGA AIGA MATAGA 2017 – faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faamauina o Tagata Solitulafono i Faiga Aiga Mataga 2017 i lona faitauga muamua.*

Faaluaina e le Minisita mo Faatoaga ma Faigafaiva ma le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE PUEINA O ATA TIFAGA (FAIGA
FAATOSINA FAAPISINISI O LAFOGA) 2017 – faitauga muamua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Pueina o Ata Tifaga (Faiga Faatosina Faapisinisi o Lafoga) 2017 i lona faitauga muamua.*

Faaluaina e le Minisita o Tupe ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE MALOSIAGA FAASAOINA 2017
– faitauga muamua**

Afioga Hon SILI EPA TUIOTI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Malosiaga Faasaoina 2017 i lona faitauga muamua.*

Faaluaina e le Minisita mo Aoga, Taaloga ma Aganuu ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

26 IUNI 2017

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA 2017 – faitauga faalua**

FOFOGA FETALAI: Talu ai ua taulimaina nei le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu ai loa le Fono Aoa mo le faitauga faalua o le Tulafono Tau Faaofi.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2017 i lona faitauga faalua, ma ou te fia tautala faamalamalama i ai.*

Faaluaina e le Minisita mo Faatoaga ma Faigafaiva, Minisita o Tupe, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Aoga, Taaloga ma Agamuu.

FOFOGA FETALAI: Ou te tapa lau Afioga i le Minisita mo saunoaga faamalamalama i le Tulafono Tau Faaofi.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, faafetai mo le avanoa e mafai ai ona tulai atu e fai sina faamalamalamaga i le Tulafono lenei e Tau Faaofi o Lafoga o Tupe Maua 2017.

O le Tulafono lenei e 8 ni vaega o le Tulafono o lo o suia ae 6 ni vaega taua e suia ai le Tulafono lau Afioga. E talitonu foi o lenei Tulafono ua leva ona logologoa ona faamatalaga i lo tatou atunuu, ona o le lafoga lenei na aveesea le tuusaunoaga sa tuu atu i tupe maua o faafeagaiga, ae le gata i lea o Lana Afioga Mamalu, O Le Ao o le Malo. O le suiga foi o le Tulafono lea lau Afioga o lo o i ai ia Capital Gains o le a suia mai i le Tulafono lea.

O le a ou amata mai i le tuusaunoina o faafeagaiga mai le Tulafono lea. Sa faasolo le matou faatalanoaina o le Tulafono lenei mai ia Mati o le tausaga lenei. E 2 sa fai i Upolu e 2 foi sa fai i Savaii, tasi i Salelologa ma le tasi sa fai i Asau.

O le agaga ia o le Tulafono, ia mafai ona tuu sao uma tagata i le atinaeina o le atunuu lautele. E pei na ona pau lea o le vaega o le atunuu sa tuusaunoa mai ai le Tulafono lenei mai le 1962 ma le 1965, o Susuga i Faafeagaiga ma Lana Afioga Mamalu, O Le Ao o le Malo.

E 19 Taitai o Ekalesia sa matou faatalanoaina i le matou faatalanoaga lea, e oo foi i le vaega o le Chamber of Commerce sa matou faatalanoaina foi. O le agaga ma le auga autu o le Tulafono, o le taumafai ia tofua sao uma le mamalu o le atunuu, i le atinaeina o le atunuu. E talitonu ia le matou Matagaluega e le o se galuega sa faigofie ona faatino, ae o le galuega foi ua matou mautinoa, e tataua ona faataunuaina, aua le manuia lautele o le 197,000 o le atunuu, ona e tutusa uma i le matou vaai i Tupe Maua e tataua ona tapenapena.

E tele mau manaoga o itumalo eseese uma o le tatou atunuu, pei lava o le Tala o le Tupe talu ai nei i saunoaga a sui usufono, i le tele manaomia o atinae o lo o faatino.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

E leai se agaga lava i se isi itu o le faamoemoe o le Matagaluega, pau lava le taulaiga a le Matagaluega i lana matafaioi na matou galulue ai, o le sailiili auala i tupe e mafai ona maua, aua le tamaoiga lautele o le atunuu. O le agaga la lena i le Tulafono ua aumai nei i le Maota ina ia mafai ona aveeseina ai le tuusaunoaga lea sa i totonu o Faafeagaiga ma Lana Afioga Mamalu, O Le Ao o le Malo.

O le isi suiga o le Tulafono lenei o le Salary Scale o le atunuu. O le taimi nei o lo o \$12,000 e faagata ai le leai o se lafoga e tipiina o le lafoga ma i tagata faigaluega. A faapea e \$12,000 lou totogi i le tausaga, e leai se tupe o le lafoga e totogiina mai, ae o lea o le a sii i luga i le \$15,000 e leai se tupe e totogi mai o le lafoga mo le aufaigaluega lautele. E talitonu o se faamamamaavega lea o lo o i totonu foi o le Tala o le Tupe i lenei Tausaga Faaletupe, ia o lea ua faatino le galuega a le Matagaluega.

O le isi o le Capital Gain, o le Tulafono lea o lo o i totonu lava o le Tulafono o Lafoga le Capital Gain. Pau le suiga lea na suia i le 2012, o le tuu i ai o le tuusaunoaga e 3 tausaga e faagata ai le totogi mai o le lafoga lea, ae o tua atu o le 3 tausaga, e leai se lafoga e totogia ai i le Tulafono tuai. O le suiga lea ua i ai, afai e faatau ese sau aseta, ae maua ai sau Capital Gain po o sau polofiti i luga atu, afai e te faataueseina atu le aseta lea i totonu o le 12 masina talu ona e umia, e totogi le 27 % o le Capital Gain. Afai e te faataueseina atu i tua atu o le 12 masina seia oo lava po o le a lava le umi e te umia ai le aseta lea, e 10% le Capital Gain e totogi. O le eseese lena o lea ua tuu i ai le...ua tuusaunoa atu le umi i tua atu o le tasi le tausaga seia oo lava po o le a le umi e te faatau ese atu ai lea aseta.

Ua i ai foi le faamamaavega i e o lo o avea a tatou export i fafo atu o le tatou atunuu. O lea ua i ai le faamamaavega i le 100% o le lafoga faapau. E te entitle i le 100% pe a faapea o lea e te avea le export i fafo ia oloa ia e te fausia iinei ma export. A faapea e te faafoi mai i totonu o le atunuu le 100% o oloa ia, na e faatau atu i fafo le tupe maua, e te entitle i le 13ma le ½pasene o le lafoga, ae faapea e leai, e totogi sao lava le business tax e 27%. Ae a export, faafoi mai uma i totonu le tupe maua mai oloa ia na auina atu i fafo, e tax credit la le 12ma le ½pasene e tusa e 50%.

O le isi o le tax credit lea e faaoga nei i le taimi lenei e le aufaipisinisi, o le tulaga o lo o i ai i le taimi lenei, faataitaiga o se faipisinisi e 500,000 lana lafoga ua tataua ona totogi i le Ofisa o Lafoga, ona talosaga lea mo le tax credit lea e ave invest le tupe lea i se kamupani e tele lava i le hotel le mea lea e invest i ai, ona talia lea e le matou Matagaluega ma invest. O le tupe ua le maua e le matou Matagaluega pe a faatino uma, e ova i le 50 ma ona tupu miliona tala. O lea la o le a faagata nei i le faaiuga o le masina lenei, 30 o Iuni o le a le toe mafai ai ona fai ai ni tax, ae o isi lava o fesoasoani i tax holidays ma incentives ma mea ia, o la e tumau lava ia faamamaavega ia, i le fausiaina o hotels, aemaise foi o pisinisi e ala mai i totonu.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

Ae pau lea o le vaega ua ou talosagaina ina ia aveese, ona o le tupe ua tele tele le tupe e alu ai, ona amata mai le Tulafono lenei i le 2003, toe faafou i le 2008, toe oo mai i le 2013 toe continue, lea la ua oo ma i lenei vaitau, ia te au lava ia o le Minisita o Tupe Maua, ou te talitonu ua lava foi le fesoasoani ua ave, ona o isi foi kamupani ua matou toe faafoia mai ia investments nei e totogi ai a latou lafoga, ona ua mua ona ave e invest, a ua le totogi ia lafoga tuai sa tatau ona totogi mai. O la ua toe aumai i tua totogi ai lafoga, i le tulaga ua matou faia i lenei vaitau.

Ia pau na o vaega tetele o le Tulafono ua matou lau Afioga o lea e taumafai atu ai le Matagaluega, pe faatino i le Fono lenei. O le tuusaunoaina o lafoga a faafeagaiga faatoa faatino i le 2018 le aso 1 o Ianuari, e amata ai ona faatino le lafoga lea a faafeagaiga. Ae o le taimi lenei a pasia e le Palemene i finagalo o le Palemene, ia ona tapenapena atu lea o le matou pitolaau ina ia oo atu i le amataga o le tausaga fou ua mafai ona faatino le galuega lea.

E pei o se faamalalamalama lautele lea i lau Afioga i le Fofoga Fetalai, ia aemaise le mamalu o le Palemene. Ia e talitonu lava, o tatou uma e tatou te galulue mo le manuia lautele o le tatou atunuu. E matou te galulue foi e tele foi o matou foi Ekalesia ma matou faafegaiga o lo o tausia, ae ou te talitonu, o le agaga ia ma le faamoemoe maumaututu o au nei o le Minisita ma le Matagaluega, ia saofaga uma le mamalu o le atunuu i le atiaeina o le atunuu lautele i le 197,000 o ona tagata. Faafetai i lau Afioga.

FOFOGA FETALAI: Malo faafetai, ia masalo e leai se sui e fia saunao.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai mo le avanoa, e le taumate foi o la e manino le mafuaaga na faavae ai le Tulafono, o le agaga lea ia faatutusa tagata uma, e sailiili auala e maua ai tupe maua. Ia e le tele ni au fesili i lau Afioga i le Minisita, e pei o le atugaluga ia te au, se e fou lava nei mea i le faalogo ma le faaaloalo, ma o le agaga foi lea, so o se mea fou lava, e faigata ona talia e lou tagata, ia atonu e i ai ma nisi uso a sui usufono. E le i fesiligia ni finagalo o nisi, ae o le agaga na ou tulai atu ma le faaaloalo, ou te le teena le Tulafono, ae i ai lava si ou popolega i le mea lea na faapea na fai ia le soalaupulega o le mataupu ia Mati i le tausaga nei. O le soalaupulega la o le mataupu, o lea e foliga mai e na o le 15 lava Taitai o Ekalesia sa i ai, ae o le matou itumalo e ova ma le 15 Ekalesia. Afai la e 40 ma ona tupu ia tatou constituencies po o tatou itumalo, o lona uiga o le matua maualalo lava o lenei pasene ua fai i ai le consultancy a le tatou vaega.

Ou te faaoololomaau i lau Afioga i le Taitai o le atunuu, aemaise lau Afioga i le Minisita, o lea faatoa faatino le Tulafono i le aso 1 o Ianuari 2018, ia ina ne i tatou fetauai i le Palemene ae o lo o faafofoga le atunuu, ae pei o lou agaga ma lou faaoololomaau i lau Afioga, pe a pe a tolopo ia le tatou mataupu, se i talanoa muamua le tatou Faaupufai po o le a se tasiaga o le Tulafono.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

E i ai le upu faapalagi foi lea faapea, *ōThere is many ways of skinning a cat.* E le faapea e fai atu o le tetee, atonu lava e i ai se auala e faigofie ona taliagofie e le atunuu, e le gata i le atunuu, ia ae o nai faafeagaiga. O faafeagaiga foi, o tagata ia ua omai ua faaunuuua i o tatou nuu ma itumalo, ua le o toe nonofo i o latou nuu, ua o ese ma o latou aiga, o lea ua nofomau, ua fai ia o tatou nuu ma itumalo ma o latou alaafaga ma o latou aiga. Ua soifua ai foi ia latou fanau ma aoga ai, o lona uiga, ua avea ia o tatou nuu ma itumalo ma aiga o nei faifeau. E faaunuuua i o tatou itumalo. A o le agaga lea e vaavaai atu ai i le Tulafono? O lea e fai mai, ia a uma loa le masina, ona avatu lea o lau form e faatumu, aumai pe fia sina au mea na maua i le Aso Sa o vaiaso ia e 4 ua tuanai atu.

O lau fesili lau Afioga i le Minisita, e ono tatau foi la ona fai mea ia ia tatou, aua a tatou o i maliu, ma umusaga ma aso fanau, tele o mea, e le motu lava tatou ma faaaloaloga e aumai i nuu ma aiga e i ai ia latou faalavelave ia ua tatou asi ai, e le gata i lea, e i ai foi teutusi. E tautala o au, aua e faapena, so o se mea lava e fai i lo matou itumalo, e faapena lava ona faaaloalo mai. Pe faamata la ua le alagatau foi ona fai se tatou return i faaiuga o masina e sele lea tupe mo le Malo? Ia e pei o vaega ia e le fair ai le Tulafono i lou lava manatu na o au, ou te le i talanoa foi i nisi, masalo pe toalua ea Minisita na ou talanoa i ai analeila, ae ou te le i talanoa i nisi o le matou vaega, i le agaga a lea e mafatia ai lou loto i le Tulafono leni. Ua alu lava ia le Aso Faraile, Aso Toonai ma le Aso Sa o ou mafaufau pea i ai. E mamafa i lou loto, ona e toetiiti lava leai se isi o tatou e leai se aiga ma faifeau. O tagata foi ia e faifeau i o tatou nuu ma itumalo, ua mafana a tatou mafutaga, ua pei lava e tau lava o tatou matua faaleagaga, ia ae pei ua mafana le mafutaga ma i latou ia.

O le mea la lea ou te talosaga ai ma ou faaoololomaau, pe a faapafala le tatou mataupu, feiloai le tatou Vaega Faaupufai, toe sailili mai nisi tagata e omai e fai se isi soalaupulega, ma faifeau o itumalo taitasi, o la e i ai pulenuu e auala atu ai, ia pe fai se fono tele i itumalo taitasi, fono uma ai ia faifeau o Ekalesia. E le gata i lea, o lea na ou faalogo i le tala tailo ne i te i ua sese lau faalogo ae fai mai na fai le fono a Malua e teena ia le tatou Tulafono. E leai se isi o tatou e le aiga ma le tele o faifeau, o faifeau foi e maua mai ai le faamanuiaga o tatou. E ese i lou talitonu i lea mea lau Afioga i le Taitai o le Malo, o le faamanuiaga e aumai e ta te fiafia e ta te faatalofa i so o se faifeau lava, pe maua atu pe o le a le mea pe ave i ai se mea pe leai, ae a ou faatalofa i ai, e te lagona lava le mafanafana o le oo mai o le Agaga o le Atua ia ta ita. E le gata i lea, se o tagata ua ave i ai ia le tatou faamuamua. A o le mea lea ua tatou faia, toetiiti lava pei o le mea foi lea sa fai e le Aufaresaio i aso ia e ula ia Iesu ma Lana Auaposeitolo o atu.

O le isi mea lau Afioga i le Minisita, na ou faalogo o fai lau saunoaga e leai lava se tagata ao lafoga e alofagia, faamolemole lau Afioga e le auai lou manatu i lau saunoaga.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

O Sakaio, na ae i luga o le laau ae tilotilo atu i ai Iesu, ae o Sakaia sa ao lafoga. Ia vaai i le alofa i ai o Iesu lea na valaau ia Sakaio e sau i lalo la te o e fai se la tala. Ia ai na seā seā Sakaio i na aso ia leai sa alofa lava i ai Iesu. O le ala foi o le maliu o Iesu, mo tagata faaletonu e le mo tagata lelei.

O le fuafuaga lea e i ai faapea e \$50miliona atonu e maua mai i le fuafuaga lea e i ai. O lea foi ou te tilotilo i le tatou Budget lea e \$2miliona lea e Projected Income mai i faifeau, o lea e i ai le manatu tatou te popole pe a pasia le tatou Budget, e leai se mea e afaina ai, ae aumai se tupe i totonu o le tatou Unforeseen e cover ai lea vaega ae mafai ona tatou pasia se isi mea e tuutuu i luga o lea e i ai le 2/3 majority ia tatou. E pei o lau faamatalaga lea e fai atu i le paia ma le mamalu o le Maota, ia aemaise le faafofogaaga a le tatou atunuu, se o le mamafa ia o lenei Tulafono, e faigata ia ona ou taliaina, ae talia pe afai ua toe fai se isi soalaupulega lelei, se tatou fonu le HRPP, tatou talanoa faatasi. Ou te talitonu lava o le toatele o sui usufono o le Maota nei, e i ai le tofa lea, finagalo e toe faapafala le tatou mataupu, tatou talatalanoa, le iloa pe tasi lava le saunoa mai a lo tatou Tautai, ia ua lelei, faafetai e sao lou finagalo. Ia ae o le mea manaia, soalaupule ma talatalanoa, aumai se autasiga mai i faifeau e le i oo i ai le soalaupulega. Ia o le a faapefea e na o le 15 ia Church Leaders ia e tau mai i i, ia o fea la o i ai le 15 o lea na fai le Fonu a Malua e tetee, o lea foi e talitonu lou agaga e faapena foi le Fonu lea e fai i le vaiaso lea a le Metotisi, e mautinoa foi lava e tetee lenei Tulafono. E pei o nai manatu ia lau Afioga i le Minisita, aua ne i tetena i lou finagalo le tuualalo lea e avatu, leai o le tuualalo o le alofa faaleuso ia te oe, ia o taua uma lava e omai i Atua, lea foi lava e le faapea e fai atu o se agaga o se le fiafia i le Tulafono, leai, talia le Tulafono, ae tataua ona tatou toe soalaupule lelei ma toe tilotilo i nisi auala e mafai ai ona sae le pau o le pusi e pei o lea upu, skin a cat.

Ia o le tuualalo lea ma le faaaloalo i lau Afioga i le Fofoga o le Fonu. Afai foi e paopapa i le talatalanoa atu a le sui usufono, malu ave i fale i o outou finagalo. E leai o le agaga lava o tatou o le Pati e tasi, e tatou te faifaima faatasi aua le lumanai o le tatou atunuu. Manuia le Fonu.

FOFOGA FETALAI: Ia se i tulai mai le Afioga i le Palemia.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faamalo i le Minisita e ana le Tulafono. Ou te faamalo i le lototele, ina ua ou fesili i ai, ae o lana tala e mamafa ia te ia lana tautoga, lana tautoga o le faamaoni. Ma e o tiute uma lava e fitoitonu uma i le Minisita, o le a agai e faatino.

E taua ia o le faaaliga a le Minisita, sa ou fesili lata mai nei lava i le iuga o si a latou faatalanoaga, ae ona tau maia, e lagolagoina uma lava e Taitai o Ekalesia ia le Tulafono se i vagana le toalua, le toalua na lagolago i le taimi a o latou talanoa, ae a oo loa ina fai saunoaga faalauaitetele, ua ese ia upu e sau.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

Toetiiti lava tai pei o le mea foi lea na fai e Peteru, io, io ia Iesu ae vevesi loa, leai loa.

Lau Afioga i le Fofoga Fetalai, o le mea lea na faaletonu ai le Malo i le 1981, e faaletonu lava i mea tau tupe, ma o mea ia e tatau ona fai e le Malo, a moomia loa seleni, o le tiute lena o le Minisita, ua faaee atu i ai le tiute o lana matafaioi lea, o le silasila i vaega eseese uma, e mafai ona saili mai ai le seleni, e fai ai ia mea ia e mananao ai ia le atunuu atoa, e auala i sui usufono o le atunuu atoa lea ua i totonu o le Palemene lenei.

Ou manatua lava mea ia e tutupu i Peretania, i le o o le Malo ave i le atunuu, ae le amanaia sui o le atunuu lea e saofafai i totonu o le Palemene o Peretania. O le a la le mea na oo i ai? Aua foi e le malamalama le toatele, o le mea lena na oo i ai le Malo o Peretania. O la la ua toe alaga nei isi, ia ua masaa le ipuvai. O le tulaga foi ia i le lafoga, i le faaupuga lautele lava o Tupe Maua. E taua tele ia te au le vaega lea ona e i ai le faifeau na fai mai ia te au, Aisea le mea o le a toe totogi ai lafoga i seleni lea e foai mai e matou te ola ai? Ae ua uma ona toesea ai lafoga? O lau tali, o le vaaiga faalelafoga po o le saofaga, e le ona ua tau o le sao, o lou sao lea i lou Malo. O le vaaiga la i le galueaiina o le sao lea, i le lalolagi atoa lava, e vaai i lau Tupe Maua, e le tilotilo pe sa totogi muamua ai le lafoga, e le tilotilo po o fea na maua ai. Pau lava le mea, o lau Tupe Maua, o le tupe lena e maua lava i vaiaso uma po o le tai lua vaiaso maua, lua vaiaso maua, lua vaiaso maua, lua vaiaso maua. O nisi lava tupe e oso solo mai, e le o ni tupe maua mea na, i le definition lea o mea o Income. Ma o le tulaga lena o lea na ala ai ona pale le Vaega lenei, na mafua ona pale le Vaega lenei, ona o le augata o le Faigamalo na i ai muamua e faaleleia ana Tupe Maua i le fai o lafoga, fefe e fai lafoga. O le mea lena, e te fefe loa e fai se mea, o i ina tonu lava e auala mai ai le fili.

O au lea sa faafeagai ma le VAGST, e ese le savali tetee a le isi Ekalesia, toe ese le savali tetee a Tumua ma Pule, e agai mai ia te au, o lau Tulafono, VAGST. Alalaga tagata, talofa i le atunuu o le a fia aai. Ae o le a le mea na tupu? Na ona amata faagasolo lava o le Tulafono, e leai lava nisi na feoti i le totogiina o le lafoga. Infact aua latou te le i lagona foi, aua o le lafoga lenei o le VAGST, e fulisia lava i mo mea o tagata e tetele faatau, tagata e tetele faatau, o tagata maumea, e pau la i ai le mamafa o le VAGST. E le faatusa nei lafoga e aumai i le aso, ae ala ona ou taua le itu lea, ona na matua afaina ai lava Faigamalo i aso ua tuanai i le l vaaia lelei o latou seleni e faatino ai manaoga o le atunuu. E pei e faigata ia te au ona ou nofonofo ma ou faalogo i se sui usufono e tulai mai e faamanatu mai i le Kapeneta mea ia e tatau ona fai i lou itumalo. Ae a oo mai loa i le tulaga o lea o le a aapa le Kapeneta e saili mai sao o tagata taitoatasi, e mafai ona faatupe ai ia atinae ia, ona ese lea o le mea e tu ai.

Lau Afioga i le Fofoga Fetalai, o le faapuupuuga lava lena o lenei mataupu o saofaga po o lafoga, masalo o le upu e tatau ona fai, o saofaga. E i ai lau tala na fai i le taimi ia na maua ai e i tatou le Ipu o le Lalolagi, faalogo i lauga a toeaia faifeau, talofa e, talofa e i nai tama, tui tino, lea ua omai ma le Ipu o le Lalolagi.

26 IUNI 2017

**Tulafono Tau Faaofi o Teuteuga o le Tulafono o Lafoga o Tupe
Maua 2017 – faitauga faalua**

Tigaina i le tui, tui o latou tino, o mai ma le Ipu, Ipu o le Lalolagi, ona o le latou manatu mai i lo latou atunuu pele o Samoa. Lo latou atunuu pele o Samoa. Afai la e pele le atunuu, ae alu atu le ituaiga mea faapea, fai sina ou sao i lou atunuu pele, ae teena. O le la le ituaiga Samoa, o le a la le ituaiga Samoa e i ai lou Samoa, e pele ia te oe lou atunuu, ae le fia faia sou sao?

Lau Afioga i le Fofoga Fetalai, ia e pei o si au tamai aniani lena, e tele lava o tatou tagata e avatu loa lava le atalii i le falemai, ae le maua ia togafitiga pe leai se fomai toatamai loa. Ia pe o atu foi, faaletonu le tali mai, toatamai, ae o i lea e alu ai le tele, o aoaoga, a lelava faiaoga, toatamai, faitio, ia liliu le Matagaluega o Aoga e fai le latou galuega, e tatau foi ona fai sina ou sao, i tulaga lea e te faamanuiaina ai.

E oo i lou sau i taavale afi, pu pu aualatele, faaletonu lou auala ua tatau ona fai le auala lea, fai i le a? E fai i le a? E fai i le sao o tagata o le atunuu lena, e pei e le manaia le sao o isi, ae na o le faalue o isi e mumusu e togi se latou maa.

Lau Afioga i le Fofoga Fetalai e pei o le tulaga lena i mamafa tele, aua a tatou agai loa i le Tusi Paia, faulai le Tusi Paia i mea tau lafoga. E oo lava i le tatou Alii e totogi Ana lafoga, ae tuu ane loa ia Paulo, o le matua malolosi o upu a Paulo, ave i le Ekalesia i Roma, totogi a outou tiute, totogi a outou lafoga. So o se Faalapopotoga, so o se tapenaga faapea e fai e le Malo, o tapenaga uma na ma sauniga uma na, e fai e le Atua. O le tagata la e na te teena mea na, ua sala lava latou, ona o sauniga uma nei, o sauniga tau le Atua.

Lau Afioga i le Fofoga Fetalai, e tumu le Tusi Paia i mea faapena, e oo lava ina ua o atu le ia aufaresaio e faaosooso lo tatou Alii, tasi lava le tali a le Alii. O le ata o ai? O le ata o Kaisara lea e i i le tupe e totogi le lafoga. Ia ave pea mea a Kaisara ia Kaisara, totogi lafoga. Lau Afioga i le Fofoga Fetalai, e pei o le tulaga lena ne i te i ua soona mamafa tele na mea i outou finagalo, ae matua manino lava le Tusi Paia, e matua tumu i mataupu tau lafoga. E sao ai le sui usufono o Aleipata, o le alofa ia o Iesu i le toeaina lea na ae i le sukamoro, e alofa tele i ai Iesu. O le a le mea na alofa i ai Iesu? Leaga o la e fai lana galuega, o la e fai lana galuega, o le galuega e taua mo le fausia o Isaraelu. E le mafai ona fausia Isaraelu e fausia tele i le fesoasoani e moomia, o le ala foi lena a afio lo tatou Alii e fai ia Ana talaiga, omai tagata e aumai tupe, aumai tupe i ai i le Alii, e oo i mea o tautaliga auro. O le teutupe la a Iesu, o Iuta, a aumai la mo mea o tautaliga, o mama e auro, ona alu lea o Iuta alu e faaliliu tupe, ae pisi le isi vaega lea e faasoa, e faasoa atu. O le ala lena e ala ai ona tumutumu mea o tagata i i taimi uma e lauga ai Iesu. E tumu mai ia tagata e maua mea, e fia faalogo i Afioga e ola ai, ae tumu mai ai foi ma le aumamai, aua foi o la e fia maua se vavega, tumu mai i ai ma le aumatitiva, aua e uma, ona omai lea o tagata nei e foai mai a latou tupe, ae toe liliu atu Iesu toe faasoa atu i ai latou. E leai se mea e ese o tupe e maua mai, po o le a le auala, toe faaoga, o lou sao lena i le atinae o Samoa.

Manuia le Fono lau Afioga.

26 IUNI 2017

TOLOPOINA

FOFOGA FETALAI: Malo, faafetai. Ia o lea ua i ai le muagagana, o Taoto le ataata o Tauleleia, taatia le ato a Maluafiti, o aua le saunoaga a le Afioga i le Taitai o le Malo, aua le faapupulaina foi o lenei Tulafono. Ia, atonu e aoga foi le tatou tolopo mo le aso a taeao, moe le toa, ia tomanatu le paia o le Palemene, ia alafai i le malu o le tai taeao i le aso a taeao, ia ua sui nisi manatu fou, ma nisi lagona.

Ae talu ai ona o lea ua tatou toai taunuu i le mutaaga ma le siui o le tatou galuega faatulagaina o lenei aso, ia e i ai le manatu ua lava ia lea galuega ua vela le fala, ua api foi le uli.

Ae tatou te le i tolopo, ou te tapa le sui usufono mo Aana Alofi Nu.2 e na te faaiuina mai i se tatalo, e faaiu ai le tatou Fonotaga i lenei aso.

Na tolopo Felafolafoga a le Fono Aoao i le itula e 7:05 i le aftafi seia aulia le itula e 9:00 i le taeao o le Aso Lua, 27 Iuni 2017.